

Inatsisissatut siunnersuummut nassuiaatit*Nassuiaatit nalinginnaasut***1. Inatsisissatut siunnersuummut tunuliaqutaasut**

Kommunalbestyrelsit nunaqarfinni aqutsisut il.il. pillugit inatsit maanna atuuttoq 1994-imi atortussanngortinneqarpoq kingusinnerusukkullu allannguuteqartinneqarluni inatsisartut inatsisaat nr. 6, 12. juni 1995-imeersukkut (Kommunit Nakkutilliisoqarfiat), inatsisartut inatsisaat nr. 8, 14. november 2004-imeersukkut (Aningaasaqarnermut ataatsimiititaliat annertusisamik piginnaatinneqarnerat) aammalu inatsisartut inatsisaat nr. 19, 20. november 2006-imeersukkut (Oqarasuaatikkut ataatsimiittarnerit). Naalakkersuisut inatsisissatut siunnersuutikkut ugguuna kissaatigaat allannguutit inatsimmut ataatsimut katersorneqarnissaat.

Kiisalu Naalakkersuisut ukiakkut 2007-imi isumasioqatigiissitsipput kommunaldirekturinit misilittagaqarluartunit aamma Kalaallit Nunaanni Kommuneqarfiit Kattuffiannit (Kanukoka-mit) peqataaffigineqartumik. Isumasioqatigiinnermi kommunalbestyrelsit, nunaqarfinni aqutsisut il.il. pillugit inatsisartut inatsisaat tamarmiusoq misissorneqarpoq misilittakkallu saqqummiunneqartut inatsisissatut siunnersuummi ilanngunneqarput. Taamatuttaaq inatsisissatut missingersuutaagallartoq Kanukokamut kommuninullu tusarniaassutigineqarsimavoq. Tusarniaanermi akissutigineqartut tunngavigalugit inatsisissatut siunnersuutip allaffissornikkut suliareqqinneqarnissaa pisariaqalersimavoq. Missingersuummut siulliusumut kommunit aamma Kanukoka-p allannguutissatut siunnersuutaat matumani siunnersuummi tamakkiisumik ilanngunneqarput.

Kommunini aqutsinermut inatsisissatut siunnersuut maanna inatsisartut ataatsimiinneranni Naalakkersuisunit saqqummiunneqarsimavoq (UKA 2008/61) Inatsisartut Aaqqissusseqqinneq pillugu Ataatsimiititaliaata isumaliutissiissutaa tunngavigalugu Naalakkersuisut inatsisissatut siunnersuut tunuartippaat, ataatsimiititaliap siunnersuutaat tunngavigalugit aaqqissuunnissaa siunertaralugu. Inatsisissatut siunnersuutip maanna saqqummiunneqartup Ataatsimiititaliap siunnersuutaat amerlanerit tunngavigalugit suliarineqarpoq.

Nakkutilliineq nalinginnaasooq Nunap iluani pissutsinut allaffeqarfimmi ingerlanneqartoq Kommunillu Nakkutilliisoqarfianni nakkutilliineq ingerlanneqartoq maanna kommunalbestyrelsit, nunaqarfinni aqutsisut il.il. pillugit inatsisartut inatsisaanni atuuttumi piginnaatitsineq ersarinngilaq. taamaanneralu Nunap iluani pissutsinut allaffeqarfimmi kommunit ingerlanneqarneranni nakkutilliinermut

atatilligu arlalitsigut ajornartorsiuteqartarnernik kinguneqartarsimavoq. Taamaattumik inatsisissatut siunnersuummi nalinginnaasumik nakkutilliinermi aammalu Kommunit Nakkutilliisoqarfiata nakkutilliinerata piginnaatitaaffiinik ersarissumik avissaarsimanissaanik Naalakkersuisut siunnersuuteqarput.

Naalakkersuisuttaaq kommunalbestyrelsit, nunaqarfinni aqutsisut il.il. pillugit inatsisartut inatsisaat manna atuuttoq sukumiisumik misissorsimavaat, inatsisip ersarinnerulernissaa paasiuminarnerulernissaalu siunertaralugit.

2. Inatsisissatut siunnersuutip imarisai

2.1 Aalajangersakkat nalinginnaasut

Kommunit aqunneqarnerat pillugu aalajangersakkat nalinginnaasut kapitalimi matumani aalajangersarneqarput. Aalajangersakkat maanna aalajangersakkanut atuuttunut naapertuuttuupput. Kommunini suliassaqarfiit aaqqissuuteqqinneqarnerat pillugu inatsisartut inatsisaata atortussanngortinneqarnerata kingunerisaanik tulluarsaalluni naqqiissuteqartoqartarnissaa siunnersuutigineqarpoq. Taamattaq siusinnerusukkut siunertamut aalajangersagaq inatsimmi allassimasuugaluartoq nassuiaatinut nuunneqassasoq siunnersuutigineqarpoq.

2.2 Kommunalbestyrelsi

Kommunini ataasiakkaani kommunalbestyrelsimi ilaasortat amerlassusiat aammalu kommunalbestyrelsit inissitsitertarnerat kapitalimi uani aalajangersarneqassasut siunnersuutigineqarpoq.

Aammattaq kommunalbestyrelsit sulinerat aalajangersarneqarpoq. Akissarsiaqartitsinernut aalajangersakkat immikkut kapitalimut nutaamut (kapitali 8) siunnersuummi nuunneqarput. Tassunga tunngatillugu immikkoortoq "2.9 Akissarsiat" takuuk.

Kommunerujussuanngortussani kommunalbestyrelsit annertunerusumik ammasumik sulineri ingerlanneqassasut naalakkersuisut pingaartippaat, taamaattumillu siunnersuutigalugu kommunalbestyrelsini ilaasortat ataasiakkaat kommunalbestyrelsimi suliaqarnermi allagaatinik suliamut attuumassuteqartut annertunerusumik misissuisinnaanngornissaat. Kiisalu Naalakkersuisut siunnersuutigaat piffissaliussanik aalajangersaasoqassasoq ullormut oqaluuserisassat aammalu kommunalbestyrelsip ataatsimiinnerini allagaatitigut atortussat kommunalbestyrelsimi ilaasortanut nassiunneqareertarnissaannut atatillugu.

2.3 Borgmesterip aamma borgmesterip tulliata atuunnerat

Kommunimi ingerlatsinerup ersarinnerulernissaanik Naalakkersuisut kissaateqarnerisa kingunerisaanik suliani kinguartinneqarsinnaanngitsuni imaluunniit apeqquserneqarsinnaanngitsuni aalajangiisoqartillugu borgmesterip

kommunalbestyrelsimik aalajangiinerup kingornagut ilisimatitsisarnissaanik aalajangersagaqalissasoq Naalakkersuisut siunnersuutigaat.

Borgmesteri pillugu kapitalimi aalajangersakkat sinneri siunnersuutigineqarpoq tulluarsaalluni naapertuussarneqassasut kommunini suliaasaqarfiit aaqqissuuteqqinneqarnerat pillugu Inatsisartut inatsisaata akuersissutigineqarnerata kinguneranik, aammalu inatsisiliornermi paasinarnerusumik aammalu atuaruminarnerusumik anguniagaqarneq aallaavigalugu.

2.4 Ataatsimiititaliat ilaalu ilanngullugit

Naalakkersuisut siunnersuutigaat ataatsimiititaliani sulinermi aalajangersakkat tulluarsaalluni naapertuussarneqassasut kommunini suliaasaqarfiit aaqqissuuteqqinneqarnerat pillugu Inatsisartut inatsisaata akuersissutigineqarnerata kinguneranik. Taamattaq naqqiissuteqartoqarpoq inatsisit paasinarnerusumik aammalu atuaruminarnerusumik anguniagaqarneq aallaavigalugu.

2.5 Kommunip aningaasaqarnikkut ingerlatsinera

Naalakkersuisut siunnersuutigaat attartortarneq aamma attartoriaaseq leasing nalinginnaasumik attartortarnermut allatigullu pisussaaffiliisarnernut sanilliunneqartalissasut. Maanna kommuniusut attartorneq aamma attartoriaaseq leasing atorlugu ingerlatsisarnert aningaasanut ingerlatsinerminnut atatillugu maannamiit annertunerusumik atortarnissaat kissaatigivaat. Taamaattumik Naalakkersuisut assigiimmik attartorneq aamma attartoriaaseq leasing atorlugu qaqugukkut akuersisoqartassanersoq maleruagassiorniarpaat, taamaalilluni kommunalbestyrelsit qinnuteqaataat ataasiakkaat aalajangiisuujuunnaarsillugit attartorneq imaluunniit leasing atorneqassanersoq akuersissuteqarnermi.

Siunissami kommunit angissusiat isigimaarlugu taamalu aningaasaqarnikkut ingerlatsinermi sulii eqaannerusumik ingerlatsisinnaalernissaat tunngavigalugit, Naalakkersuisut siunnersuutigaat siunissami kommunit naatsorsuutaat kukkunersiuisunit naalagaaffimmiit akuerineqartunit taamaallaat kukkunersiorneqartalissasut. Kapitalip sinnerani naleqqussaaneq siusinnerusukkut taaneqareersutut periuseqarluni ingerlanneqassasoq siunnersuutigineqarpoq.

2.6 Nunaqarfinni siulersuisut

Naalakkersuisut siunnersuutigaat siunissami nunaqarfinni marlunni amerlanerusuniluunniit ataatsimoortumik nunaqarfimmi aqutsisoqalissasoq. Naalakkersuisulli arajutsisimanngilaat nunaqarfeqarmat innuttaqqortuujusunik imaluunniit avinngarussimasumik inissisimasunik, taamaattumillu taamatut ataatsimoorfeqarnissamut annertuumik ajornartorsiuteqarsinnaasunik. Taamaattumik Naalakkersuisut siunnersuutigaat nunaqarfinnut taama inissisimasunut immikkut akuersissuteqartoqarsinnaaneranik periarfissaqassasoq.

Naalakkersuisut aammattaq kissaatigaat naqissusissallugu nunaqarfinni siulersuisut kommunalbestyrelsimiit piginnaatitaanikkut sulissasut, taamaattumillu

siunnersuutigalugu iluarsaaqqinnermi ilanngunneqassasoq kommunalbestyrelsi nunaqarfinni siulersuisut ingerlatsinerini nakkutiginnittussaataassasut.

2.7 Nakkutilliineq

Siusinnerusukkut eqqaaneqareersutut Naalakkersuisut kissaatigaat kommunit ingerlatsinerinik nakkutilliineq ersarinnerulissasoq. Nalinginnaasumik nakkutilliinerup Kommunillu Nakkutilliisoqarfiani nakkutilliinermi aalajangersakkat immikkoortinneqarnissaanik Naalakkersuisut taamaattumik siunnersuuteqarput.

Nalinginnaasumik nakkutilliineq Nunap iluani pissutsinut allaffeqarfimmiit ingerlanneqassasoq siunnersuutigineqarpoq, tassaniimmat ulluinnarni kommuninut attaveqartarnej, aammalu tamatumuunakkut ulluinnarni ingerlatsinerup malinnaavigineqarnissaa periarfissaqarluni.

Taamaasillunilu kommunit aqunneqarnerinik nalinginnaasumik nakkutilliineq taamatut allannguuteqartitsinikkut naalakkersuisoqarfinnik nalinginnaasumik nakkutilliinermut naleqqersuunneqarsinnaalissaaq.

Naalakkersuisut siunnersuutigaat Kommunit Nakkutilliisoqarfiat kommuninik nakkutilliinermi aatsaat akuliunneqartassasoq inatsisitigut unioqqutitsisoqarneranik nalinginnaasumik nakkutilliinermi pineqaatissiisoqartariaqarneranik naliliisoqartillugu, inatsisinik unioqqutitsisoqarneranik tunngavewqartumik.

Nunaqarfinni siulersuisut kommunalbestyrelsiniit piginnaatitaaffeqarnikkut sulipput. Nunaqarfinni siulersuisut kommunalbestyrelsimiit piginnaatitaaffilerneqarnerup iluani sulineq kommunalbestyrelsip nakkutigisassarissavaa.

Nalinginnaasumik nakkutilliinerup aamma Kommunit Nakkutilliisoqarfiata nakkutilliinerata taamaallaat kommunalbestyrelsip ingerlatsineranik toqqaannartumik susassaqarfigissavaat.

2.8 Akissarsiat

Naalakkersuisut kissaatigisimavaat akissarsiaqarnermi tunngassuteqartut tamaasa kapitalimi immikkut katersorneqassasut, taamaaliornikkut aalajangersakkanik tamakkiinerusumik isiginnittoqarsinnaalersillugu.

Naalakkersuisut inatsisissatut siunnersuummi kommunini akissarsiaqartitsineq pillugit isumaqatigiinniarsinnaatitaaneq Kanukokamit aamma Naalakkersuisunit tigummiinnaqassasoq siunnersuutigaat.

2.9 Pineqaatissiisarnej aamma taarsiissuteqartitsisarnej

Naalakkersuisut siunnersuutigaat pineqaatissiisarnej aamma taarsiissuteqartitsisarnermi aalajangersakkat atuuttut ingerlatiinnaqassasut. Aalajangersakkat kapitalimi ataatsimi katersorneqarput inatsisit atuaruminarnerunissaat paasiuminarnerunissaallu anguniarlugu.

2.10 Atortuulersitsineq

1. januar 2009 kommunit kattussuunnerat ilutigalugu inatsisissatut siunnersuut atortuulersinneqassasoq siunnersuutaavoq.

3. Pisortanut aningaasaqarnikkut allaffissornikkullu kingunerisassai

Kommunit ikinnerulernerisa kingunerissavaa ingerlatsinerup perrannerulenera, taamalu suliat naammassineqartarnerini pitsaassuseq annertunerusoq anguneqarluni. Aammattaaq immikkoortut annertunerulernerini periarfissaqalissaaq immikkut ilisimasat pitsaaneruseq iluaqutigineqarsinnaalernerat, taamaalillunilu sulisut immikkut pisinnaasallit tigummiinnarneqarsinnaalerlutillu suliat sukkaneruseq ingerlanneqarsinnaalerneru, taamalu ingerlatsineq ersarinnerulertuni, taamaalillunilu innuttaasut inatsisitigut illersuugaanerat annertunerulersinneqarluni.

Kommunini ingerlatsiviit annerusut 2009-miit Namminersornerusuniit sulianik nussuineq piareersassavaat. Naalakkersuisut naatsorsuutigaat Namminersornerusuniit kommuninut ingerlatsinermi sulianik nussuinikkut innuttaasunut sulianik naammassinnittarneq qaninnerulissasoq aammalu marloqiusamik allaffissorneq pinngitsoorneqassasoq. Siunnersuut kommunalbestyrelsimi kommunillu iluani namminermi suliaqarnerup annertunerulernissaanik kinguneqassanngitsoq naatsorsuutigineqarpoq, soorluttaaq inatsisissatut siunnersuutip kingunerisaanik annertunerusunik aningaasartuuteqarnissaaq naatsorsuutigineqanngitsoq. Naartunermi, erninermi meeravissartaarnermilu Inatsisartut inatsisaata kommunalbestyrelsinut nunaqarfinnilu siulersuisuinut atuuttussap sivitsorneqarnera pillugu aningaasatigut siunniutissaa naatsorsorneqarsimangilaq.

4. Aningaasarsiornikkut allaffissornikkullu aaqqissuussinerit inuussutissarsiornermut il.il. kingunerisassai

Siunnersuut inuussutissarsiornermut il.il. aningaasaqarnikkut allaffissornikkullu kinguneqassanngilaq.

5. Avatangiisinut pinngortitamullu kingunerisassat

Siunnersuut avatangiisinut pinngortitamullu kinguneqassanngilaq.

6. Allaffissornerup innuttaasunut kingunerisassai

Kommunit qitiuneruseq inississapput aammalu nutaanik isumagisassaqaqalissallutik, tassa innuttaasut pisortanut pingaarnertut saaffigisartagalerilissammatsigit. Inatsisissatut siunnersuut aaqqissuussaannermut iluarsaaqqinnermut nangitsineruvoq, aammalu qitiusumik

ingerlatsinerujunnaarnermut ersersitsinerusuussalluni, innuttaasullu inatsisitigut isumannaannerusumik inissisimalernerannik kinguneqassalluni.

Tamanna innuttaasunut ataasiakkaanut isumaqassaaq oqartussaasunut attuumassuteqartunut ajornannginnerusumik saaffiginnissinnaalerneq, aammalu sukkanerusumik eqaannerusumillu sulisunit immikkut pikkorissutsikkut piginnaasaqartunit sulianik ingerlatsinermik taamaalillunilu innuttaasunut ataasiakkaanut inatsisitigut isumannaannerusumik inissisimanermik kinguneqassalluni. Siunnersuutillu innuttaasut periarfississavai kommunini aalajangersaasarnernut sunnuteqarnerusinnaalersillugit, sumiiffinni siunnersuisoqatigiinni peqataanermikkut.

7. Kingunerisassat pingaarutillit allaasinnaasut

Siunnersuut allanik pingaarnerusunik kinguneqassanngilaq.

8. Naalagaaffeqatigiinnermut namminersornermullu attuumassuteqartut

Inatsisissatut siunnersuut kommunini suliassaqarfiit aaqqissuuteqqinneqarnerat pillugu inatsimmut (UKA 2007/30) aallartinneqartumut ilaavoq. Naalakkersuisut isumaqarput inatsisissatut siunnersuut Namminersornermut Ataatsimiititaliap innersuussutaasa kingorna suliniutinut aallartinneqarsimasunut ilaalluni aningaasaqarnikkut nammineerneruleriartornermut ilalersuissasoq. Naalakkersuisut aamma isumaqarput siunnersuutip Kalaallit Nunaata danskit aningaasatigut ataatsimoortumik tapiissutaannik pisariaqartitsinera annikinnerulersissagaa, pisortat ingerlatsinermut aningaasartuutaasa ikinnerulersinnerisigut.

Inatsisissatut siunnersuut ingerlatsinermi sipaaruteqartitsissaaq, aammalu qanimut oqartussaaqataanermut nukittorsaasuussalluni. Kommunimi ingerlatsineq innuttaasumut qaninnerulissaaq taamaaliortoqarneratigullu sukkanerusumik eqaannerusumillu sullissisinnaanermik periarfissiissalluni.

9. Pisortanik kattuffinnik il.il tusarniaaneq

Siunnersuut siullermik tusarniaassutigineqarluni nassiunneqarpoq 4. december 2007, KANUKOKA-mut kommunit sinnerlugit, Kommunit kukkunersuisoqarfiannut kommunernes revision-imut (KR), Deloitte-mut, AK-mut, IMAK-imut, PIP-mut, Sundhedskartellet-imut, ASG-mut, SIK-mut GA-mut aamma Namminersornerullutik Oqartussat iluannut, tusarniaaffiup akineqarnissaa 15. januar 2008 killeqartillugu.

Tusarniaanermi akissuteqartut makkuupput: Kommunernes Revision, Ivittuut Kommuneat, Maniitsup Kommunea, Aningaasaqarnermut Pisortaqaarfik, Avannaani Aaqqissuusseqqinnermi Allattoqaarfik, Akileraartarnermi Pisortaqaarfik, IMAK, GA, AK, PIP, SIK aamma KANUKOKA kommunit sinnerlugit.

PIP, Aningaasaqarnermut Pisortaqarfik aamma AK nassiussamut oqaaseqaateqanngillat.

Manna inatsisissatut siunnersuut tusarniaassutigineqarpoq 26. maj aallarnerfigalugu Inatsisissatut siunnersuut iluarsartuutaq (mannamut siunnersuutigineqarsimasup akerlianik imaqartoq kommunalbestyrelsinut sumiiffinni sinniisoqarnissamik pilersitsisinnaanermik periarfissiisq) KANUKOKA-mut maanna kommuniusunut taamalu aammalu kommunerujussuassani ikaarsaariarnermi ataatsimiititalianut kiisalu KANUNUPE-mut tusarniaassutigineqarsimavoq 4. juli 2008 killigitillugu Tusarniaanermi akissutini ikaarsaariarnermut ataatsimiititalianiit ersippoq Kujataata kommunia siunnersuutaasunut oqaaseqaatissaqanngitsoq.

Kangia/Kitaani ikaarsaariarnermut ataatsimiititaliaq isumaqarpoq § 4-mi periarfissaqartitsisoqartariaqartoq kommunalbestyrelsimi inassitsiterfiusumik ataatsimiinneq kommunalbestyrelsi pisortatigoortumik atuutilinngikkaluartoq ingerlanneqarsinnaasunngorlugu. Inatsisitigut taamatut periarfissaqartitsineq kommunalbestyrelsinut qinersisarnermut inatsimmiinnani kommunit aqunneqarnerannut Inatsisartut inatsisaanniittariaqarluni.

§ 6-imi Borgmesterimik qinersisarnermi aalajangersagaq ersarinnerusumik allaaserineqartariaqartoq.

Ikaarsaariarnermi ataatsimiititaliap akuersaarsinnaanngilaa § 8 imm. 6 naapertorlugu Naalakkersuisut kommunalbestyrelsit iluminni ingerlatsinerannut akulerussinnaatitaanissaat.

Oqarasuarnikkut atortorissaarutit atorlugit najuussinnaannginnermi kommunalbestyrelsip ataatsimiinnerini peqataasinnaaneq § 11, imm. 1 naapertorlugu taamaallaat peqquteqavilluni najuussinnaannginnermi atorineqarsinnaavopq. Kisiannili tamatumani aalajangersakkat kommunalbestyrelsimit namminermit aalajangersarneqarsinnaasariaqarput, assersuutigalugu kommunalbestyrelsip suleriaasiani, tassanilu aalajangersarneqarluni assersuutigalugu qaqugukkut oqarasuaatit atorlugit ataatsimeeqataasoqarsinnaanersoq.

§ 23, imm. 4-mik allanngineq tusarniaanermi akissutaasunik tunngaveqarpassinngilaq. Borgmesterimik tunuartitsinissamik aalajangerneq kommunini naqisimaneqanngitsumik ingerlatsinermut inuttullu ima oqimaatsigivoq, tunuartitsineq eqqartuussivitsigut misilinneqarsinnaasariaqarluni. Suliami pissutsit Kommuninut nakkutilliisoqarfimmut saqqummiunneqartussaanerannik aalajangersagaq tassaavoq ataatsimiittartunut eqqartuussivittut oqartussaassuseqanngitsunut inatsisinillu atortitsinermik ilisimasaqartuunissamik piumasaqarfineqanngitsunut suliassanngortitsineq, tamannalu Borgmesterimik tunuartitsinermi Borgmesterip iluarisarsiortoqannginnissaanut inatsisitigut illersugaanissaanut naammattumik isumannaarinerunngilaq.

§ 25, imm. 1, nr. 1-imi maanna aningaasaqarnermut ataatsimiititaliaq aningaasarsiornermut allaffissornermullu tunngasunik nakkutiginnittussaataalerpoq.

Akuersarneqarsinnaangilaq aningaasaqarnermut ataatsimiititaliaq imatut nukittorsarneqassasoq, allaat kommunalbestyrelsiaqqatut ingerlalersinnaalluni, tamatumami kingunerissammagu aalajangigassat ataatsimiititaliami matoqqasumik ataatsimiittumi aalajangersarneqartarnerat, innuttaasut, tusagassiorfiit imaluunniit kommunalbestyrelsimi ikinnerussuteqartut najuuffiginngisaannik. Kiisalu § 26-i imm. 1-imi aveqqasut sisamat aveqqasut 5-iannik ilasariaqarpoq.

§ 33-imi kommunalbestyrelsimut ilaasortaangitsunik kommunimi suliassaqarfinnut toqqaasoqarsinnaanera peerneqarsimavoq. Meeqquerivippassuit kommunerujussuannortuni eqqarsaatigigaanni ajornarluinnassaaq kommunalbestyrelsimi ilaasortat siulersuisuni tamani issiatitaqarnissaat.

Kangia/Kitaani kommunip nunaqarfinni siulersuisunik ataatsimoorussanik pilersitsisinnaaneq tapersersorpaa.

Kangia/Kitaani ikaarsaariarnermut ataatsimiititaliami amerlanerussuteqartut sumiiffinni siunnersuisoqatigiinnik pilersitsisinaanermut periarfissaq tapersersunngilaat. Allaniq periarfissaqarpoq, innuttaasut naqisimaneqanngitsumik ingerlatsineranut peqataatinneqarnissaannut.

Ikinnerussuteqartut inassuteqaatigaat sumiiffinni siunnersuisoqatigiinnik/nunaqarfinni siulersuisunik pilersitsisinaanermut siunnersuusiortoqassasoq, pilersitsinernilu erseqqissaatigineqassasoq pisussaaffinnik pisinnaatitaaffinnillu tunniussisoqartassasoq, innuttaasut oqartussaaqataanerat sunnuteqarsinnaanerallu ajorseriartikkumanagu.

Qeqqani ikaarsaariarnermut ataatsimiititaliap iluarisimaarlugu maluginiarpaa sumiiffinni siunnersuisoqatigiinnik pilersitsinissamut periarfissaq eqqunneqartoq, sumiiffinni innuttaasut sapinngisamik ulluinnarni inuunerminnut sunnuteqarsinnaanerat aqutissiuunneqarsinnaaqqullugu, taamaasillunilu oqartussaaqataaneq aqutissiuunneqarluni.

Qeqqani ikaarsaariarnermut ataatsimiititaliaq isumaqarpoq naalakkersuineramik suliaqartut akissarsiassaat ikaarsaariarnermi ataatsimiititaliani kingornalu kommunalbestyrelsini sulinerannut naapertuuttuusariaqartut.

Avannaani ikaarsaariarnermut ataatsimiititaliamit nuannaarutigineqarpoq ataatsimoorussanik nunaqarfinni siulersuisunik kiisalu sumiiffinni siunnersuisoqatigiinnik illoqarfinni pilersitsinissamut periarfissaqartitsisoqarnera.

Ikaarsaariarnermut ataatsimiititaliap kissaatigaa arlaannut attuumassuteqarneq pissutigalugu suleqataasinnaangittarnermut tunngasumik maleruagassat kommunit aqunneqarnerannut inatsimmi ersarissarneqartariaqartut, tassungalugu atatillugu ikinnerussuteqartut aamma illersorneqartariaqartut.

KANUNUPE-p tusarniaanermi akissummini oqaatigaa nunaqarfinni siulersuisut oqartussaaffii annertusarneqartariaqartut. KANUNUPE-p maluginiarpaa siunnersuummi § 53, imm. 2,

tassani ersimmat kommunalebestyrelsi nunaqarfinni siulersuisunut aningaasanik atugassiiinnaasoq. Ilanngullugulu iluarisimaarneqarpoq inatsisissatut siunnersuummi § 50, imm. 2-mi Naalackersuisut pisinnaatinneqarmata nunaqarfinni siulersuisut isorliunerusuniittut, nunaqarfinnilu anginerusuniittut maannakkutut ingerlaannarsinnaasut.

KANUNUPE-p iluarisimaarlugu oqaatigaa nunarfinni siulersuisuni ilaasortat kommunerujussuarnik pilersitsereernerup kingorna qinikkanut allanut naligiissinneqassammata.

Naalackersuisut tusarniaanermi akissutit tiguneqareerneranni § 4 allannguuteqartinnngilaat. Naalackersuisut nalilerpaat qinersineq pillugu maalaarutit ilaasortallu qinigaasinnaassusiannut apeqqutit nalilersorneqarnerat naammassineqareersimasariaqartoq, kommunalbestyrelsinnngortut inissititsinninneranni, taamaaliornikkut eqqortumik inissititsertoqarnissaa anguniarlugu.

Naalackersuisut § 6-imi annertunerusumik ersarissaasoqarnissaa pisariaqartinnngilaat.

Naalackersuisut § 8 imm. 6-imut maalaarutit paasillugit aalajangersagaq taanna uani siunnersuummi ilaatinneqanngilaq.

Naalackersuisut § 11, imm. 3-mut atatillugu maalaarutaasut tusaatissatut tigullugit kommunalbestyrelsit suleriaatsiminni oqarasuarnermi atortorissaarutitik atuisinnaanermik periarfissanik aalajangersaasoqartarnissaa aqqutissiuuppaat.

Kommunini aalajaatumik aqutsisoqarnissaa eqqanaarumallugu Naalackersuisut pissusissamisoortinnngilaat Borgmesterimik suliunnaarsitsinerit eqqartuussivinni misilinneqartarnissaat. Taamaattumillu eqqartuussivitsigut misilinneqartitsinnaaneq § 23, imm. 4 naapertorlugu periarfissaanngilaq. Aalajangersagarlu atorneqarsimanngisaannarpoq.

Naalackersuisut pissutissaqartinnngilaat § 25, imm. 1-imi siunnersuut aningaasaqarnermut ataatsimiititalianut tunngasoq allanngortissallugu. Aalajangersakkami isumannaarneqarpoq Aningaasaqarnermut ataatsimiititaliat kommunimi ingerlatsinermut tunngasuni malinnaasinnaanerat, tamannami ataatsimiititaliap suliassaasa pingaarnersarimmassuk.

Naalackersuisut ilanngullugu maluginiarpaat tusarniaanermi oqaaseqaatigineqartuni amerlanerussuteqartut sumiiffinni siunnersuisoqatigiinnik pilersitsisinnaaneq tapersersoraat.

Naalackersuisut maanna inatsisartut ataatsimiinneranni (UKA 2008/61) inatsisissatut siunnersuummi kissaatigineqarsimasoq akuersaarsimavaat. Inatsisartut Aaqqissuussineq pillugu Ataatsimiititaliaa isumaqatigiillutik Naalackersuisut kaammattorsimavaat sumiiffinni sinniisut pillugit aalajangersakkat inatsisissatut siunnersuummit peerneqassasut. Inatsisissatut siunnersuutip matumani pineqartup kommunalbestyrelsit sumiiffinni sinniisunik pilersitsisinnaanerat atorunnaarsippaa.

Inatsisartut Aaqqissuusseqqinneq pillugu Ataatsimiititaliaata kissaataat malillugit Naalackersuisut allannguutissatut siunnersuutit ataasiakkaat ilanngussimavaat taakkunanngalu tulliuttuni taaneqartut ukuupput:

- Kommunalbestyrelsinu aamma nunaqarfii siulersuisuini ilaasortat naartunermi, erninermi meeravissiarternermilu kajumissaatisianik annaasaqaratik sulingiffeqarnissamut pisinnaatitaallissapput
- Kommunit ukiumoortumik aningaasartuutissanut missingersuutaasa tamanut saqqummiunneqarnissaannut piffissaliussaq ullunut 14-inut sivitsorneqassaaq (siunnersuummi siullermi piffissaliussaq ullut arfineq marluupput)
- Kommunip aqqanik allannguisarnermut periaaseq pillugu aalajangersagaq peerneqarpoq, Kalaallit Nunaata nunap immikkoortortaanut kommuneqarfinnullu agorneqarneranik Inatsisartut inatsisaanut sanilliullugu aalajangersakkamut naapertuutinnginnissaa pinngitsoortinniarlugu.
- Kommunalbestyrelsip nutaamik qinikkap inassitsiternissaa pillugu aalajangersagaq erseqqissarneqassaaq: Inassitsiterluni ataatsimiinneq ingerlanneqassaaq qinersinermi ataatsimiititaliami qinersineq pillugu malaarutaasimasinnaasunik aammalu ilaasortanngortut qinigaasinnaanerat pillugu naliliisoqareerneratigut.
- Innuttaasut qinikkatut pisortanillu toqqagaasernerat pillugu aalajangersagaq peerneqarpoq, tamanna qinikkatut pisortanillu toqqakkatut suliaqarneq pillugu nalunaarummut atuuttumut sanilliullugu aalajangersakkat aporaannissaat pinngitsoortinniarlugu.

Aalajangersakkanut ataasiakkaanut oqaaseqaatit

§ 1-mut

Aalajangersagaq maanna § 2-mut atuuttumut imarisamigut naapertuuppoq.

Imm. 1-imut

Aalajangersakkap naqissuserpaa kommunalbestyrelsip kommunimi suliaasaanut akisussaasuunera.

Imm. 2-mut

Aqutsinnermut malittarisassaq taamaallaat imaqassaaq kommunalbestyrelsimi ilaasortat amerlassusaannik, borgmesterip tulliisa qassiunissaannik, ataatsimiititaliat ataavartut amerlassusissaannik taakkualu oqartussaaffissaannik, nunaqarfinni siulersuisut qassiunissaannik taakkualu ilaasortaasa amerlassusaannik oqartussaaffigisassaasalu suunissaannik.

Aammattaaq anguniagaavoq matumani inatsimmi paragraf-it aqutsinnermut malittarisassami uteqqinneqartassanngitsut, assersuutigalugu aningaasaqarnermi ataatsimiititaliap sunik oqartussaaffeqarneranik.

Imm. 3-mut

Kommunalbestyrelsip anguniassavaa, suleriaatsimi aalajangersakkat tamarmik Kommunalbestyrelsimut suleriaasissami katersorneqassasut, tamakkulu aalajangersakkat aqutsinnermut malittarisassamiissanngitsut.

Imm. 4-mut

Suleriaasissamut aammalu aqutsinnermut malittarisassat nassiunneqarnissaanut piumasagaat tunulequtaqarpoq Naalakkersuisut kommunalbestyrelsip suleriaasiani aalajangersakkanik aamma inatsisit atuutsinneqarnerannik nakkutilliinermik ingerlataqarmata. Kommunalbestyrelsip suleriaatsimut malittarisassaq aamma aqutsinnermut ileqqoreqqusaq Naalakkersuisunut nassiutinngippagit sulineq nalinginnaasumik malittarisassaq imaluunniit aqutsinnermut nalinginnaasumik malittarisassat kommunalbestyrelsip sulinerani paatsuungasoqartillugu atorneqassapput. Periutsit taamaattut aamma atuutissapput kommunalbestyrelsip suleriaasissaq aamma aqutsinnermik malittarisassat aalajangersarsimagaluarlugit taakkua Naalakkersuisunut nassiussimanngippagit.

Imm. 5-mut

Aalajangersakkap siunertaraa qulakkiissallugu kommunalbestyrelsimi aqutsinnermut suleriaatsimullu malittarisassaqaartuaannarnissaa. Aalajangersagarli kommunalbestyrelsip kommunimi namminerisamik aqutsinnermut suleriaatsimullu malittarisassaqaarnissaanut pisussaaffeqarneranik atorunnaarsitsinngilaq.

Kiisalu suleriaatsimut aqutsinnermullu malittarisassat nalinginnaasut maleruagassat qanoq paasineqarnissaannik nalornisoornermi isummertarnermut atorneqartussaapput.

§ 2-mut

Aalajangersagaq maannamut atuuttumut § 4-mut naapertuuppoq.

Imm. 1-mut

Kommunip ilisarnaataanik oqartussat atuinerisa avataanni atuinissamik kommunalbestyrelsip akuersissummik tunniussitinnani qulakkeertariaqarpaa ilisarnaammik allanit atuneq imatut pissasoq, atorneqarnera kommunit oqartussaaffiinit ersarissumik attuumassuteqannginnera tamanit nalornisoqarsinnaajunnaarlugu.

Kommunalbestyrelsip siumoorlugu qulakkiissavaa suliffeqarfinnut namminersortunut kommunip ilisarnaataa kisimiitillugu ilisarnaatitut imaluunniit ilisarnaatitut pingaarnertut biilini imaluunniit allakkat pappiliartaani ilisarnaatitut kisimiitillugu atorneqannginnissaa.

Qinnuteqaat kommunalbestyrelsimut nassiunneqassaaq, akuersissullu tunniunneqarpat tamanna imaqassaaq ilisarnaat qanoq sivilisutigisumik atorneqassanersoq.

Kommunalbestyrelsip akitsuummik akiliutissamik ataasiartamik aalajangersaasinnaavoq imaluunniit piffissamut aalajangersimasumut akilertagassatut, kommunip ilisarnaataata qanoq atorneqarnissanut akuersissuteqarneq qanoq ittuunersoq naapertorlugu.

Assersuutigalugu naqitiganngorlugu ilisarititsiniutitut imaluunniit takoqqusaarutitut kommunip ilisarnaataata atorneqarnissaa akuersissutigineqarpat, tamanna ataasiartuuppat, ataasiartumik akilerneqarnissaa aalajangerneqarsinnaavoq, piffissamili sivilisuumi, soorlu puussiani ataasiarlugu atorneqartartuni ilisarnaatitut atorneqarpat piffissami aalajangersimasumi akilertagassatut aalajangerneqarsinnaalluni.

Kommunalbestyrelsip kommunip ilisarnaataata atorneqarnissanut qinnuteqaatip suliarineqarneranut atatillugu aningaasartuutaasut qaangerlugit akiliutissamik annertussusiliisinnaanngilaq.

Akiliut kommunip isertittagaatut allatulli missingersuusiorneqassaaq, missingersuusiallu akuersissutigineqareersut avataatigut aalajangiivigineqassaguni ilassutitut akuersissutigineqartariaqarsinnaavoq.

Kommunip ilisarnaataanik atuinissamik akuersissummi ersarissumik takuneqarsinnaasariaqarpoq piumasaqaataasut suut malillugit ilisarnaammik atuinnermut akiliut aalajangersarneqarsimanersoq, taamaasillunilu misissorneqarsinnaalluni akuersissutit naligiissuseq tunngavigalugu tunniussisoqarsimasut.

§ 3-mut

Aalajangersakkap maannamut § 5-imi aalajangersagaq taarserpaa.

Imm. 1-imut

Siunnersuutigineqarpoq siunissami Avannaata kommuniani aamma Tunup/Kitaata kommuniani kommunalbestyrelsit 21-t tikillugit qinerneqarsinnaasut aammalu Qeqqata kommuniani aamma Kujataata kommuniani 15-nit tikillugit qinerneqarsinnaallutik. Aalajangersagaq aaqqissuusseqqinnerup maanna ingerlanneqartup kingunerivaa.

Imm. 2-mut

Siunnersuutigineqarpoq kommunalbestyrelsimi ilaasortat amerlassusissaat assigiinngiijaartumik kommuninngortussat angissusissaat naapertorlugu amerlassuseqartinneqassasut.

Naalackersuisut siunnersuutigaat qinersinissaq sioqqullugu ukioq naatinnagu kommunalbestyrelsinngortussat amerlassusissaat kommunalbestyrelsip aalajangertassagaa.

Ilaasortat amerlassusiat 2-mik agguarneqarsinnaassanngilaq aqutsinermilu malittarisassami allassimassalluni. Suliassaqarfiit aaqqissuuteqqinneqarnerata ingerlanneqartup siunertaasa ilagivaat allaffissornermi aningaasartuutaasuniit ilanngaasoqassasoq inuussutissarsiorerup ineriartortinneqarneranut nuunneqartussanik. Tamanna tunuliaqutaralugu kommunini suliassaqarfiit aaqqissuuteqqinneqarnerat pillugu Inatsisartut inatsisaanni kommunini sisamani kommunalbestyrelsit amerlassusaasa qaffasinnerpaaffissaannik ilanngussisoqarpoq. Naalackersuisut isumaqarput qaffasinnerpaaffissaliinerup ingerlateqqinneqarnissaa pingaaruteqartoq, kisiannili kommuuni kommunalbestyrelsimi ilaasortat amerlassusaannik ikinnerusunik aalajangiussaqaassappat akornutissaqartinnagu.

§ 4-mut

Aalajangersagaq maannamut atuuttumut § 6-mut naapertuuppoq.

Imm. 1-mut

Ersarissarneqarpoq kommunalbestyrelsip nutaamik qinigaasup inissitsiterluni ataatsimiinnissaa, aatsaat ingerlanneqarsinnaasoq Qinigaasinnaassuseq pillugu Ataatsimiititaliap kommunalbestyrelsimi ilaasortat qinigaasinnaanerisa misilinneqarneri naammassereerpagit.

Kommunalbestyrelsimi ilaasortat qinigaassut, kommunalbestyrelsi atuuttuusoq ingerlaannassaaq, qinigaasinnaassutsip misilinneqarnerisa naammasinissaata tungaanut. Kommunalbestyrelsip inissititerluni ataatsimiinnissaanut qaaqquusissut allakkatigut pissaaq, tamatumani fax-i imaluunniit e-mail atorneqarsinnaavoq.

Imm. 2-mut

Ataatsimiinneq inummit ataatsimiigiaqqusisumit aqunneqassaaq. Aalajangersakkami inissitsiterluni ataatsimiinnermut ilaasortaq qaaqqusisoq peqataasinnaangippat periusissaq sillimaffigineqarpoq. Aalajangersakkami isumaqatigiinniarnerni eqqartorneqartuni taamaallaat inissititerneq ataatsimiinneq pineqarpoq, tassunga ilanngullugu borgmesterimik qinersineq.

§ 5-mut

Aalajangersagaq maanna atuuttumut § 21, imm. 2, nr. 2-mik nangitsineruvoq, § 19-milu borgmesterip allaffissornermut pisortatut atuuffianut tunngasuulluni matumanilu inatsisartut inatsisaanni kisiartaalluni kommunip allaffissornera pillugu aalajangersagaalluni.

Aalajangersakkap aalajangiuppaa, allaffissorneq kommunalbestyrelsi qullersaralugu aqutseriaatsimut ilaasoq. Allamik immikkut inatsimmi aalajangersaasoqarsimatinnagu kommunalbestyrelsi ingerlatsivinnut nammineerluni aalajangersagaliorsinnaavoq.

Aalajangersakkami tassani kissaatigineqarpoq erseqqissassallugu kommunalbestyrelsip aamma aningaasaqarnermut ataatsimiititaliap sulisunik atorfinitsitsisarnerni soraarsitsisarnernilu suliassaasa avissimanerat, taamaasillunilu kommunalbestyrelsip taamaallaat kommunaldirektøri atorfinitsittarlugulu soraarsinnaagaa, aningaasaqarmermulli ataatsimiititaliap sulisorqarnermi pissutsit allat aqussallugit, tak. § 25, imm. 1, nr. 2.

§ 6-mut

Aalajangersakkap imm. 1-4-aa, maannamut atuuttumut § 8-mut naapertuuppoq.

Imm. 1-imut

Aalajangersakkap naqissuserpaa inissitsiterluni ataatsimiinnermi borgmesterimik qinersineq siulliulluni oqaluuserisassaniissasoq.

Siusinnerusukkut kiap borgmesterimik qinersineq aquttussaagaa aalajangersaavigineqarsimanngilaq. Tamanna maanna siunnersuummi ersarissumik § 4, imm. 2-mi allassimalerpoq, tassani ersimmat kommunalbestyrelsimi ilaasortaq inissitsiterluni ataatsimiinnissamut qaaqqusisuusoq tassaasoq borgmesterimik qinersinermi aqutsisuussusaq.

Imm. 2-mut

Aalajangersakkap naqissuserpaa, borgmesterimik qinersinermi amerlanerussuteqarnissaq piunasaqaataasoq. Siullermeerluni qinersinermi

amerlanerussuteqartoqanngippat qinerseqqittoqassaaq. Qinersinermi tamatumani qinigassani amerlanerussuteqavittoqanngippat aamma nutaamik qinersisoqaqqissaaq amerlanerpaanik qinerneqarsimasut marluk akornanni. Qinersisoqaqqinnerani naligiittumik taasisoqarpat makitsisoqassaaq. Makitsisitsineq kommunalbestyrelsimut ilaasortamit inissitsiterluni ataatsimiinnermi aqutsisuusumit ingerlanneqassaaq.

Imm. 3-mut

Aalajangersakkami viceborgmesterimik qinersineq maleruagassiorneqarpoq, viceborgmesterimillu qinersineq borgmesterimik qinersinertut ingerlanneqassasoq aalajangersarneqarluni. Aammattaaq naqissuserneqarpoq borgmesterinngorlaap qinersineq aqussagaa. Borgmesteri peqanngippat qinersineq kommunalbestyrelsimi ilaasortap inissitsiternissamut qaaqqusisuusup aqussavaa.

Imm. 4-mut

Aalajangersakkami maleruagassiorneqarpoq aaqissuussineq kommunalbestyrelsip aalajangernera naapertorlugu 1. viceborgmesterimik aamma 2. viceborgmesterimik qinersisoqarnissaanik imaqartoq. Taamaattoqartillugu § 34 naapertorlugu d'Hondt-ip naatsorsueriaasia atorlugu qinersineq ingerlanneqassaaq. Aalajangersakkap erseqqissarpaa viceborgmesterimik ataatsimik qinersisoqartillugu amerlanerussuteqarneq tunngavigalugu qinersineq ingerlanneqassasoq, kisiannili 2. viceborgmesterimik qinersinermi kisitsisit agguarnerat naapertorlugu qinerseriaaseq (forholdstalsvalg) atorlugu qinersineq ingerlanneqassasoq.

Imm. 5-imut

Aalajangersakkap erseqqissarpaa, borgmesterimik aamma viceborgmesterimik qinersineq kommunalbestyrelsip qinigaaffianut tamarmiusumut atuuttusoq. Taamaalilluni aallaaviatigut imaappoq; kommunalbestyrelsip atuuffiata iluani kommunalbestyrelsip borgmesteri aamma viceborgmesteri tunuartissinnaanngikkaa imaluunniit peersissinnaanngikkaa. Akerlianik § 23 naapertorlugu borgmesteri suliassaminik naammassinnikkumangippat kommunalbestyrelsip tunuartisisinnaanera periarfissaqarpoq.

§ 7-mut

Aalajangersagaq maannamut atuuttumut § 9-mut naapertuuppoq.

Imm. 1-imut

Aalajangersakkap naqissuserpaa, kommunalbestyrelsimut qinersinermi qinigaasunut borgmesteritut aamma viceborgmesteritut qinigaanermik akuersissuteqartussaaneq pisussaaffiusoq. Tamatumani pissusissamisoortutut isigineqarpoq kommunalbestyrelsimut ilaasortassatut qinigaasut kommunalbestyrelsimut qinigassanngortinnermikkut aamma borgmesteritut imaluunniit viceborgmesteritut

qinerneqarsinnaaneq akuersissutigisimammassuk. Qinigassanngortittoq kingornagut borgmesteritut imaluunniit viceborgmesteritut qinigaanissamik kissaateqanngippat qinigassanngortittariaqanngilaq.

Imm. 2-mut

Aalajangersakkap kommunalbestyrelsi periarfissippaa borgmesteri imaluunniit viceborgmesteri qinigaaffiup sinnerani atuuttussaajunnaartitsisinnaanermut, borgmesteri imaluunniit viceborgmesteri atorfimmit tunuarniuteqassapat. Tunuarniuteqarnerup akuersissutigineqarneri suliani ataasiakkani nalilersuinikkut pisassaaq.

Imm. 3-mut

Aalajangersakkap naqissuserpaa, borgmesterimik imaluunniit viceborgmesterimik nutaamik § 6 naapertorlugu qinersisoqassasoq, borgmesterip imaluunniit viceborgmesterip atorfik qimappagu. Aammattaaq erseqqissarneqarpoq, kommunini 2. viceborgmestereqartuni viceborgmesteritut inuttaaruttoq d'Hondt-ip naatsorsueriaasaa naapertorlugu eqimattat (suleqatigiit) viceborgmesteriusimasumik toqqaasimasut aamma nutaaq toqqassagaat.

§ 8-mut

Aalajangersagaq § 10-p maannamut atuuttup imarisaanut naapertuuppoq.

Imm. 1-imut

Ukiumut naatsorsuseriffiusumut tamarmiusumut kommunalbestyrelsi ataatsimiinnissami missingersuummik aalajangersaasassaaq. Ataatsimiittarnissamut pilersaarut ukiup siuliata naanerani saqqummiuneqartassaaq. Saqqummiussineq kommunip nittartagaani imaluunniit piffimmi aviisimi saqqummiuneqarsinnaavoq.

Ataatsimiinnissanut pilersaarut aammattaaq Nalaakkersuisunut nassiunneqartassaaq, kommunit nakkutigineqarneranut atatillugu ilisimatitissutigineqassammat qaqugu kommunalbestyrelsip ataatsimiinneri ingerlanneqassasut, aamma Naalakkersuisut ataatsimiinnerni najuukkusuppata.

Imm. 2-mut

Aalajangersakkap qulakkeerpaa ataatsimiinnerit pilersaarusioneranut atatillugu annerpaamik kommunalbestyrelsi nutaamik qinigaasup kiffaangissuseqarnissaata qulakkeerneqarnissaa. Pissusissamisussanngilarmi kommunalbestyrelsi qinigaarllaq kommunalbestyrelsip atorunnaartup ataatsimiinnissami pilersaarutaanik tunngaveqarluni ingerlatissapat.

Imm. 3-mut

Kommunalbestyrelsip immikkut ittumik ataatsimiinnissanut qaaqqusinnaatitaaneq borgmesterimiippoq. Taamaattoq borgmesteri pisussaaitaavoq kommunalbestyrelsimi immikkut ataatsimiigiaqqusinissamut kommunalbestyrelsimi ilaasortat 1/3-iisa tamanna piumasagaatigippassuk.

Immikkut ittumik ataatsimiinnissamik nalunaarut kommunip innuttaannut aamma Naalackersuisunut ataatsimiinnissaq sioqqullugu periarfissaqarpat nalunaarutigineqassaaq. Kommunalbestyrelsip ataatsimiinnissaanut qaaqqusinerit avammut ilisimatitsissutigineqarnerat aamma ullormut oqaluuserisassat avammut saqqummiunneqarnerat kommunip nittartagaanut ingerlanneqartassasut aalajangiussimappagu, kommunip nittartagaani immikkut ittumik ataatsimiinnissat aamma saqqummiunneqarneri ataatsimiinnissaq sioqqullugu ingerlanneqartassapput. Avammut saqqummiussineq piffimmi aviisini ingerlanneqarpat saqqummiussinissamut piumasagaatit eqqarsaatigalugit eqaannerusumik ingerlatsisoqassaaq.

Imm. 4-mut

Siunnersuutigineqarpoq aalajangersagaq allanngortinneqassasoq ullormut oqaluuserisassat aamma ataatsimiinnermi atorussat nassiunnissaannut piffissamik aalajangersimasumik killeqartitsinermik ilanngussinikkut. Piffissaliineq ilanngunneqarpoq qulakkeerniarlugu ataatsimiinnissaq sioqqullugu kommunalbestyrelsimut ilaasortat suliassamut pitsaasumik paasisaqarsimanissaat. Aalajangersagaq aammattaaq sunnuteqassaaq kommunalbestyrelsip ataatsimiittarneri pillugit ammanerusumik ingerlatsinissamut, soorunami nipangiussisussaaitaaneq tamatumani ilanngullugu eqqarsaatigineqassalluni.

Imm. 5-imut

Aalajangersagaq kommunalbestyrelsip sulinermini avammut ammasuunissaanut nukittorsaataassaaq. Suliassat allattorsimaffiat saqqummiunneqartussaq ullormut oqaluuserisassanut missingersuut pinngitsoorani assigisariaqanngilaa. Imarisaanut allattorsimaffilli minnerpaamik suliassat sunik imaqarnerinik imaqassaaq. Allattorsimaffimmi suliassat ammasumik ataatsimiinnermi aamma matoqqasumik ataatsimiinnermi suliassatut aalajangersarneqarsimasut ilanngunneqassapput, soorunami nipangersimasussaaitaaneq eqqarsaatigereerlugu.

Ataatsimiinnermi aalajangersarneqartunut imaqarniliap saqqummiunneqarnerani nipangiussisimasussaaitaanermut inatsimmi pisussaaittaaffik kisimi killiliisuvoq. Ataatsimiinnermi matoqqasumi aalajangiineq pippat, taanna nammineq kisimi pissutaatinneqarsinnaanngilaq aalajangiinerup imaqarniliamut avammut saqqummiunneqartumut ilanngunneqannginneranut.

§ 9-mut

Aalajangersagaq maannamut atuuttumut § 11-mut naapertuuppoq.

Imm. 1-imut

Suleriaassissami nalinginnaasumi matup matuneqarnissaanik malittarisassanik ikkussisoqarsinnaavoq. Matunik matusineq atorneqartariaqarpoq suliassani inunnut ataasiakkaanut aammalu suliffiit unammillersinnaanerannut tunngassuteqartunik suliaqartoqartillugu.

Kommunimi atorfillit kommunalbestyrelsip kiffartuunneqarnissaanik pisariaqartitsisoqartillugu soorunami ataatsimiinnermi matoqqasumi peqataasinnaapput.

Imm.2-mut

Aalajangersakkap kommunalbestyrelsi periarfissippaa inuit kommunalbestyrelsip avataaniittut kommunalbestyrelsip matoqqasumik ataatsimiinneranut aggersaasinnaangorlugit. Tamatumani piunasaqaatigineqarpoq pineqartoq suliarineqartumi paasissutissiisnaassasoq pineqartorlu kommunalbestyrelsip akisussaassuseqartumik pisariaqartumik suliassami aalajangiinissaanut ilisimasaqartuussasoq.

Naqissuserneqassaaq aalajangersakkami siunertaanngimmat aalajangersassallugu, inuit aalajangersakkami immikkoortoq 2 malillugu aggersarneqartut kommunalbestyrelsip piunasaqarneranik malinnittussaananerit, tamanna ataasiakkaani immikkut aammalu pineqartup kommunalbestyrelsimut pisussaataaaffii pillugit aalajangerneqartariaqarmat inatsisit allat naapertorlugit. Aalajangersakkami imm. 2-a malillugu kommunalbestyrelsimi ilaasortaq attuumassuteqarnini pissutigalugu aalajangeeqataasinnaajunnaarsimasoq aggersarneqarsinnaassanngilaq.

Imm. 3.-mut

Aalajangersakkap naqissuserpaa kommunalbestyrelsimi ilaasortanut, atorfilinnut, allanullu matoqqasumik ataatsimiinnermi peqataasunut nipangiussimasusaatitaaneq atuummat pinerluttulerinermi Inatsimmi. Tamanna kommunalbestyrelsinu matoqqasumi ataatsimiinnerni atuuppoq, taamattaaq ataatsimiititaliani ataavartuni aamma immikkut ataatsimiititaliani isumalioqatigiissitalianilu atuulluni.

Imm. 4.-mut

Aalajangersakkami Naalackersuisunut innersuusisoqartillugu, Naalackersuisut nammineerlutik pineqanngillat, kisiannili nakkutilliisoqarfimmit aallartitaannut ataatsimiinnerni matoqqasuni peqataasinnaatitaasut pineqarput. Ataatsimiinnerni matoqqasuni suliani peqataasinnaatitaaneq taamattaaq atuuppoq suliassaqarfinni inatsisini immikkut nakkutilliisoqartussaananeranik aalajangiisimasoqartillugu, soorlu inunnik isumaginninnermut tunngasuni.

Aalajangersagaq maannamut atuuttumut § 13-imut naapertuuppoq.

Pingaarnertut aalajangersagaavoq kommunalbestyrelsimi suliarineqartut ataasiaannartumik suliarineqartassasut, inatsimmi allamik aalajangersaasoqarsimatinnagu.

Aqutsinermik ileqqoreqqusap akuersissutigineqarnera, tak. § 1, imm. 2, aamma missingersuutip akuersissutigineqarnera, tak. § 41, kommunalbestyrelsimi marloriarluni suliarineqartassaaq.

§ 11-mut

Aalajangersagaq maannamut atuuttumut § 12, imm. 2 aamma 3-mut naapertuuppoq.

Imm. 1-mut

Kommunalbestyrelsi aalajangiisinnaassuseqarpoq ilaasortat affaat ataatsimiinnermi peqataappata. Piumasaqaataavoq ataatsimeeqataasuni aalajangertoqassatillugu amerlanerussuteqarnissaq. Taamattaaq naqissuserneqassaaq inatsisini aalajangersagaqarmat allanik aalajangersaanerni periutsinik allanik piumasaqaateqartunik.

Imm. 2-mut

Aalajangersakkami aalajangerneqarpoq aalajangersakkami § 15, imm. 1 naapertorlugu ilaasortaq ataatsimiinnermi ornigulluni peqataasinnaangippat oqarasuaatikkut imaluunniit isiginnaarutitsigut aammalu telefaxikkut ataatsimiinnermi peqataanissamut ilaasortaq periarfissaqartinneqartoq. Telefaxikkut piumasaqaat ilanngunneqarpoq aalajangiinnermi imaqaarniliami atsiornissaq qulakkeerniarlugu, tak. § 16, imm. 1.

Imm. 3-mut

Aalajangersakkami aalajangiunneqarpoq kommunalbestyrelsip suleriaatsiminni maleruagassiorsinnaagaat ataatsimiinnerit oqarasuaatikkut ataatsimiinnertut, videokonference-tut kiisalu telefax-ikkut ingerlanneqarsinnaanerit. Aalajangersagaq aamma siunissamut qulakkeerinninniarnuvoq attaveqaatitsigut teknologi atorneqarsinnaasusaaq iluaqutigineqarsinnaasooq, minnerpaamilli isumannaarneqartariaqartoq ilaasortat isummernerisa tiguneqarnissaat ataatsimeeqataasunillu tamanit paasineqarnissaat. Aammattaaq qulakkeerneqassaaq attaveqaatitsigut teknologip atorneqarnerani aalajangiinnermi imaqaarniliap atsiorneqarsinnaaneranut periarfissaqassasooq, tak. § 16, imm. 1.

§ 12-mut

Imm. 1-mut

Aalajangersagaq nutaajuvoq, aalajangersakkallu aamma ilagivaa, kommunimi ingerlatsinerup ammanerusumik aamma ersarinnerusumik ingerlatsinissap qulakkeerneqarnissaanik Naalakkersuisut kissaataat.

Kommunalbestyrelsimi ilaasortat kommunip allaffissornerani suliat inaarutaasumik ilusilinnik misissuisinnaanerat periarfissippai. Sulianut misissuisinnaanermut siunnersuut naapertorlugu taamaallaat tunniussisoqarsinnaavoq, kommunalbestyrelsimi ilaasortap ilaasortatut sulinerminnut atatillugu misissuinerani, aammalu suliasat naammassineqareersimasut pineqartillugit. Taamaalilluni missingersuutinik, notat-inik taamaaqataanillu kommunip allaffissorneraniit tunniussisoqarsinnaanngilaq, aammalu aningaasaqarnermut

ataatsimiititaliami ilaasortaangitsunut aningaasaqarnermut ataatsimiititaliap suliaanut tunngasunik tunniussisoqarsinnaanani.

Imm. 2-mut

Aalajangersakkami siunnersuutaavoq suliamik paasisaqarnissamik kissaateqarnerit borgmesterimut saaffiginnissutigineqartassassut.

Imm. 3-mut

Aalajangersakkami siunnersuutigineqarpoq Borgmesterip sulianut paasisutissiinnaanermi itigartitsissuteqarsinnaasoq, sulianik kinguarsaasoqassappat, imaluunniit taamaaliorneq ajornartorsiutinik pilersitsisnaappat. Assersuutigineqarsinnaapput allakkatigut suliat ataatsimut inissisimanngippata imaluunniit allakkatigut suliat annertoorujussuuppata.

Itigartitsineq sunaluunniit soorunami toqqammavilersorluarsimassaaq.

Imm. 4-mut.

Siunnersuut naapertorlugu suliamut atugassat nuutinneri nassiunneqarsinnaapput. Naalakkersuisulli siunnersuutigaat suliat nuutinnerinik tunniussinissamut kommunalbestyrelsi aalajangersaasinnaanissaanik periarfissaqassasoq. Aalajangersakkap kommunalbestyrelsi periarfissippaa suliamut nuutitanik tunniussinissami najoqqutassanik nalinginnaasunik aalajangersaasinnaalersillugu taamaalillunilu suliani aalajangersimasuni nuutitsinerit amerlassusaannik nalinginnaasumik killiliisinaalersillugu. Killiliineq taamaallaat nuutitat qassiusinnaaneranut attuumassuteqarpoq, taamaalillunilu nammineerluni ingerlatsivimmut ornigulluni suliamut attuumassutilinnik qimerluuisinnaanermut attuumassuteqarani.

§ 13-mut

Aalajangersagaq maannamut inatsisartut inatsisaannut atuuttumut § 12, imm. 1-imut naapertuuppoq.

Ilaasortap siunnersuutaa suliassaappat kommunalbestyrelsip oqartussaaffiginngisaanut tunngassuteqartoq imaluunniit siunnersuutip aalajangiivigineqarnissaa inatsisinik unioqqutitsilluni aalajangiinerusussaappat kommunalbestyrelsi pisussaassaaq siunnersuutip oqaluuserineqarnissaa itigartitsissutigissallugu, kisianni siunnersuut kommunip suleriaasissaa naapertorlugu piffissaq eqqorlugu saqqummiunneqarsimappat oqaluuserisassanut ilanngunneqarnissaa borgmesterip itigartissinnaanngilaa.

Oqaaseqatigiit aappaanni erseqqissarneqarpoq, kommunimi ataatsimiititaliat nammineerlutik oqartussaaffeqartinneqanngitsut, tamanna inatsisiliornermi erseqqissumik aalajangersarneqarsimatinnagu.

Aalajangiisinnaatitaanermik piginnaatitaaffik kommunalbestyrelsimiippoq, taamaalillunilu ataatsimiititaliani nammineerluni aalajangiisinnaaffeqassappat tamanna inatsisitigut toqqammaveqartariaqarpoq.

§ 14-imut

Aalajangersagaq maannamut inatsimmut atuuttumut § 15-imut naapertuuppoq.

Imm. 1-mut

Aalajangersagaq isigineqassaaq pisortat ingerlatsinerat pillugu Inatsisartut inatsisaannut suliassani aalajangersimasuni soqutigisaqarneq pissutigalugu aalajangeeqataasinnaannginnermut pissutissaatitaasussanik aalajangersaaffiusumut atatillugu.

Siunnersuummi matumani ilaasortap aalajangeeqataasinnaannginneranik aalajangiinissami periusissat taamaallaat pineqarput. Ilaasortat ilaata soqutigisaqarnini pissutigalugu aalajangeeqataasinnaannginnissaa pillugu apeqqut nakkutilliisutut oqartussaasut misilitassaraat, inaarutaasumilli aalajangiinnissaa eqqartuussisuniippoq nakkutilliisutut oqartussaasunut killilersuutitut pituttorsimanngitsumi, tak. siunnersuutip § 67-a. Naalakkersuisut pisinnaatitaanngillat kommunalbestyrelsip suliamik ingerlatsinera naapertuunnersoq pillugu naliliissallutik, imaluunniit tamanna eqqortumik ingerlatseriaaseqarneq tunngavigalugu ingerlanneqarnersoq nalilissallugu, soorluttaaq kommunit aalajangiineranik atorunnaarsitsisinnaanermut Naalakkersuisut periarfissaannik killiliiffigineqartut.

Soqutigisaqarneq pissutigalugu aalajangeeqataasinnaannginnermut maleruagassanik nalinginnaasunik siunnersuut imaqaanngilaq. Soqutigisaqarneq pissutigalugu nalinginnaasumik aalajangeeqataannginnissamut tunngavissaqarnersoq pisuni ataasiakkaartuni pisortat maleruagassaataat nalinginnaasut naapertorlugit aalajangiisoqartassaaq.

Imm. 2-mut

Aalajangersakkap naqissuserpaa soqutigisaqarneq pissutigalugu aalajangiisinnaanngitsoqarneranik pasinartoqartillugu kommunalbestyrelsimut ilaasortap nammineerluni nalunaaruteqartussaataitanera.

Imm. 3-mut

Aalajangersakkap siunertaraa qulakkeerneqassasoq kommunalbestyrelsimi naalakkersuinikkut oqartussaanerup nikisinneqannginnissaa ilaasortat ilaata soqutigisaqarnini pissutigalugu aalajangeeqataasinnaatitaanngitsutut oqaatigineqarneratigut.

Ilaasortat ilaat soqutigisaqarnini pissutigalugu aalajangeeqataasinnaatitaannginnerup saniatigut allamik peqquteqarluni najuutinngippat sinniisussap aggersarneqarnissaa pillugu apeqqut aalajangiiffigineqassaaq § 15 malillugu, ilaasortaq najuutinngitsoq soqutigisaqarnini pissutigalugu aalajangeeqataasinnaatitaanngitsutut oqaatigineqassagaluarpuunniit.

Imm. 4-mut

Aalajangersakkami siunertaavoq qulakkeerneqassasoq, aalajangeeqataasinnaannginneq pissutigalugu sinniisussap aggersarneqarnissaa pillugu maleruagassat atornerlunneqannginnissaat, suliassami kommunalbestyrelsimi amerlanerussuteqarluartut aalajangiiviginiagaata aalajangiivigineqarnissaa pinngitsoortinniarlugu imaluunniit inatsisiliornerup imaluunniit isumaqatigiissutit inatsisitigut pisussaaffeqarfiusut pissutissaqartippassuk piffissap aalajangersimasup iluani aalajangiisoqarnissaa.

Taamaattorli suliassap sularineqarnissaata kinguartinneqarnissaa pisortat imaluunniit namminersortut soqutigisaannut annertuumik ajoqutaassappat ilaasortaq soqutigisaqarnini pissutigalugu aalajangeeqataasinnaatitaanngitsoq suliassap oqaluuserineqarnerani peqataatinneqarsinnaavoq kommunalbestyrelsi aalajangiisinaajunnaassanngippat, tak. ingerlatsinermut inatsisip § 4-ni imm. 2.

§ 15-mut

Aalajangersagaq maannamut atuuttumut § 16-imut naapertuuppoq.

Imm. 1-imut

Aalajangersakkami pineqarpoq ilaasortap ataatsimiinnermut ataatsimut najuutinnginnissamut pisinnaatitaanera aamma sinniisussap ataatsimiinnermut ataatsimiigiaqquneqarsinnaanera.

Suleqatigiit ilaasortamik qinigaasitsisimasut piumasaaqateqarsinnaapput sinniisussap ataatsimiinnissamut ataatsimut ataatsimiigiaqqusinnissamut. Tamatumani apeqqutaanngilaq suleqatigiit pineqartut kingusinnerusukkut atorunnaarsinneqarsimanersut imaluunniit allanngortinneqarsimanersut, tassa qinigaaqatigiissimasut akornanni sinniisussap ataatsimiigiaqquneqarnissaanik

piumasaqaateqarnissaq isumaqatigiinngissutaalissappat tamanna aalajangiivigineqartariaqarmat amerlanerussuteqartut aalajangiinerisigut.

Borgmesterip ataatsimiinnissamut nalinginnaasumik piareersaaneranut atatillugu ingerlaannartumik sinniisussamik aggersaasoqarneq ajorpoq. Tamatuma kinguneraa, kommunalbestyrelsimi ataatsimiinnissat piffissaalluartillugu suleqatigiit pilersaarusiortarnissaq sillimaffigisariaqaraat.

Naqissuserneqassaaq inissitsitissalluni ataatsimiinnissamut aamma kommunip missingersuusuaasa aappassaaneerlugit oqaluuserineqarnissaanut sinniisussamik aggersaatitsinissamik piumasaqaateqartoqarsinnaammat, naak peqataasinnaanginneq taaneqartunik peqquteqanngikkaluartoq, kisiannili assersuutigalugu kommunalbestyrelsimi ilaasortaq angallanneq pissutigalugu anngussinnaanginnera pissutigalugu.

Tamanna pissuteqarpoq ataatsimiinnerni taakkunani pingaarutilerujussuarnik aalajangiivigisaqartarneq, taamaattumillu ilaasortap ataatsip najuutinnginneranik pissuteqartumik sunnerneqartariaqanngitsumik.

Imm. 2-mut

Aalajangersagaq peqqusivoq pissutissaqavilluni sivikinnerpaamik qaammatini marlunnik sivilisussuseqartumik peqataasinnaanginnermi sinniisussamik ingerlaannartumik ataatsimiigiaqqusinissamik. Aalajangersagaq atuutilersinneqarnikuvoq sinniisussanik ataatsimiigiaqqusisarnermi periutsit eqaannerulersinniarlugit paasinarsigaangat pissutissaqavilluni kommunalbestyrelsimi ilaasortatut isumagisassat piffissami sivilisungaatsiartumi sivikinnerpaamillu qaammatini marlunni, imaluunniit agguaqatigiisillugu kommunalbestyrelsip ileqquusumik ataatsimiinnerini marlunni, sivilisussuseqartussaasumik peqataaffigineqarsinnaangippata.

Maleruagassarli isigineqassanngilaq kommunalbestyrelsimi ilaasortat sulinnigiffeqarallernermut assingusumik najuutinnginnissaminnut nalunaaruteqarnissaannut nalinginnaasumik tunngavissatut, tamannami kommunalbestyrelsimi ilaasortatut inuiaqatigiinni sullissisuuneranut akerliummat. Piffissami pissutissaqavilluni ataannartumillu najuussinnaangikkallarnek peqqutaasariaqarpoq. Assersuutigalugu piffissap ingerlanerani ilaasortaq ataatsimiititaliat ataatsimiinneranni najuuttarsinnaaguni kommunalbestyrelsip ataatsimiinnerini ataatsimeeqataanngitsoortarnissaanut pissutissaqanngilaq.

Akorntigisap pigallartuunera aalajangiisuunngilaq, tassami piffissap qinigaaffiup sinnerani ataatsimeeqataanngitsoortarnissap assigiinnassammagu ilaasortap kommunalbestyrelsimiit tunuarnissaata akuerineqarnissaa, tassalu:

1. sinniisussap kommunalbestyrelsimi ilaasortanngortinneqarnissaa
2. ilaasortap najuutinngitsup qinigaaqatigisimasaasa ataatsimiititaliani inissat inuttaqanngitsut inuttalissagaat.

Ilaasortaq kommunimi najukkaminiit nuukkallarpat kommuninut qinersisarnerni inatsimmi kommunalbestyrelsimiit tunuarnissaq pillugu maleruagassat malinneqartussaapput.

Imm. 3-mut

Kommunalbestyrelsimi suleqatigiit piumasaqarnerisigut imm. 1 naapertorlugu, imaluunniit borgmesterip imm. 2 naapertorlugu sulissuteqarneratigut sinniisussamik ataatsimiigiaqqunesineqaraluarpalluunniit kommunalbestyrelsi pisussaavoq aalajangiivigissallugu sinniisussap ataatsimiigiaqquneqarnissaanut piumasaqaataasut naammassineqarsimanersut isummerfigissallugu. Pingaartumik pineqarput ilaasortap kingoraarneqartup najuutinngikkallarnissaanut pissutaasut tunngavissaqarnerisut imaluunniit sinniisussaq aggersarneqarsimanngippat tamanna pisariaqarnerisooq.

Kommunalbestyrelsip aalajangiinera nakkutilliisutut oqartussaasunit misilinneqarsinnaatitaavoq, pisariaqartinneqarsimappallu eqqartuussivinnut ingerlateqqinneqarsinnaalluni.

Imm. 4-mut

Aalajangersakkap naqissuserpaa, sinniisussaq kommunalbestyrelsimi ilaasortap piffissami atorffissarisaminit pisinnaannginnerani taamaallaat atuuffeqassasoq.

Imm. 5-mut

Borgmesteritut qinigaasup piffissami sivisunerusumi peqannginnissaani kiap borgmesteritut atuunnissaa pillugu apeqqummi kommunalbestyrelsip pituttorsimanani aalajangiisinnaanissaa siunnerfigalugu aalajangersagaq ilanngunneqarpoq. Borgmesterip isumagisassaanik borgmesterip tulliata tiguisinnaanera, tak. § 22, taamaallaat pineqarpoq borgmesterip pisinnaanngikkallarnera qaammatinik sisamanik taakkuluunniit inorlugit sivisussuseqartussaasutut nalilerneqarpat.

Borgmesterimik nutaamik matumani aalajangersagaq malillugu qinersisoqarsimanngippat, borgmesterimik qinersisoqassanngilaq borgmesterip najuutinngikkallarnera qaammatinik sisamanik sivisunerusumik sivisussuseqaraluarpalluunniit. Taamaattumik borgmesterimik nutaamik aatsaat qinersisoqassaaq kommunalbestyrelsip siumoortumik nalilerpagu borgmesteri piffissamit tassannga sivisunerusumik peqassanngitsoq.

Malittarisassaq manna malillugu borgmesterimik nutaamik qinersisoqarsimappat taanna borgmesterip najuutinngikkallarfiissaanut tamarmiusumut qinigaassaaq, taamaattumillu tunuartinneqarsinnaassanani, § 23-mi piumasaqaataasut naammassineqarsimanngippata.

§ 16-imut

Aalajangersagaq maannamut atuuttumut § 14-imut imarisamigut naapertuuppoq.

Imm. 1-imut

Aalajangersakkami naqissuserneqarpoq kommunalbestyrelsip ataatsimiinnerani aalajangiinermik imaqarniliamik suliarinnittoqartassasoq. Aalajangiinermi imaqarniliaq ataatsimiinnermi peqataasunit atsiorneqassaaq ataatsimiinnerup kinguninnguutigut.

Aalajangersakkattaaq naqissuserpaa, allaanerusumik isummertut isummernertik imaqarniliamut ilaatinneqassasoq piumasarisinnaagaat.

Imm. 2-mut

Imaqarniliap ataatsimiinnerup kinguninnguutigut atsiorneqarnissaa borgmesterip akisussaaffigivaa. Taamatut pisussaatisineq pingaartumik pisariaqarpoq kommunalbestyrelsimi ilaasortat ataatsimiinnermi nammineerlutik najuutinngippata, kisiannili tele-kkut attaveqaatit iluaquatigalugit peqatasimatillugit.

Aalajangiinermi imaqarniliap kommunalbestyrelsimut ataatsimiinnermut peqataanngitsumut fax-iutigineqarsinnaavoq. Tamatuma kingorna kommunalbestyrelsimi ilaasortap aalajangiinermi imaqarniliaq atsiussavaa taannalu borgmesterimut utertillugu faxerutigalugu.

Imm. 3-mut

Aalajangersakkap naqissuserpaa, imaqarniliaq atsiorsimasoq kingusinnerpaamik qaammat ataaseq qaangiutsinnagu atsiorneqarnerata kingorna nakkutilliisutut oqartussanut nassiunneqassasoq.

§ 17-imut

Aalajangersagaq maannamut atuuttumut § 32-mut naapertuuppoq.

Kommunalbestyrelsip ataatsimiinnerinut piareersaassalluni aggersaassallunilu borgmesterip akisussaaffigivaa. Ataatsimiinnissamut piareersaaneq tassaavoq ullormut oqaluuserisassanik suliaqarneq aammalu kommunalbestyrelsimut ataatsimiinnermi suliaassanik ataasiakkaanik paasissutissanik suliarinnineq. Taamattaaq borgmesterip pisussaaffigivaa isumaqatigiinniarnerni aamma taasinerit aqussallugit kiisalu aalajangiinerit imaqarniliamut ilanngunnissaat isumagissallugu.

§ 18-imut

Imm. 1-imut

Aalajangersagaq inatsimmut maannamut atuuttumut § 33, imm. 1-mut naapertuuppoq, aalajangersarlugulu borgmesteri suliani apeqquserneqarsinnaanngitsuni aalajangiisinnaasoq aammalu suliani kommunalbestyrelsi ataatsimiinnissaanut utaqqinneqarsinnaanngitsunik aalajangiisinnaasoq. Piumasaqaataasoq taamaallaat naammassineqarsimassaaq, borgmesterip suliaq apeqquserneqarsinnaanngitsutut isigippagu aammalu ilaasortat allat tamarmik suliaq apeqquserneqarsinnaanngitsutut isigineqassasoq nalilerpassuk. Naammassisassami aalajangersimasumi kommunalbestyrelsimi amerlanerussuteqartoqarnissaa qularnanngitsutut isigineqarpat borgmesterip nammineerluni suliaq aalajangiiffigisinnaavaa amerlanerussuteqarneq qularutigineqanngippat.

Assersuutigalugu suliaq kinguartinneqarsinnaanngitsutut taaneqarsinnaavoq illoqarfimmi ikuallannersuarmik nalaataqarnissaamik ernumanartoqarpat, taamaalillunilu erngertumik ikiorserneqarnissamik pisariaqartitsisoqarpat.

Suliani apeqquserneqarsinnaanngitsuni assersuutigineqarsinnaavoq kommunalbestyrelsi assigisaani qanittukut aalajangiisimappat.

Imm. 2-mut

Aalajangersagaq nutaajuvoq ilanngunneqarnissaalu Naalakkersuisut kissaatigaat pisortat ingerlatsiviini ammanerusmik ingerlatsisoqarnissaanik kissateqarneq tunulequtaralugu. Siusinnerusukut borgmesteri imm. 1-imi aalajangersarneqarsimasunik toqqammaveqarluni aalajangiinernik kommunalbestyrelsimut nalunaaruteqartussaataasimanngilaq.

§ 19-imit

Imm. 1-imit

Aalajangersagaq maannamut atuuttumut § 33, imm. 2-mut naapertuuppoq.

Kommunip allaffissornikkut ulluinnarni aqutsinera borgmesterimit ingerlanneqarpoq. Imaappoq borgmesterip akisussaaffigivaa kommunip suliassai naleqqunnerpaamik naammassineqartassasut. Suliassat naammassineqarnissaat ingerlatsivinnut agguataarneqarnissaat soorunami borgmesterip akisussaaffigivaa, kisiannili borgmesterip suliassat naammassineqarnissaat pingaarnertut akisussaaffigivaa.

Kommunimut suliassanik nutaanik takkuttoqarpat ataatsimiititaliamut attuumassuteqartumut aqutsinermut ileqqoreqqusaaq naapertorlugu suliassa qarfiusumut qaninnerpaamut inissinneqassapput. Aqutsinermi ileqqoreqqusami suliassap inissinneqarnissaa nalornissutigineqartillugu kommunalbestyrelsi tamatumunnga aalajangiisariaqarpoq pisariaqarpallu aqutsinermi ileqqoreqqusami allannortitsisariaqassaaq. Ataatsimiititaliat avataanni suliassat nalinginnaasumik borgmesterip suliassa atut isigineqarsimasut

tassaasimapput sulianik piareersaanerit aamma suliassat kommunalbestyrelsip iluanni pissutsinut tunngasut, kisianni tamakku suliassat borgmesterip suliassaatut aamma inissinneqarsinnaalluarput, borgmesterip kommunalbestyrelsimut siulittaasutut inissisimanera innersuussutigalugu, tak. § 17.

Imm. 2-mut

Aalajangersagaq inatsimmut maannamut atuuttumut § 33, imm. 3-mut naapertuuppoq, aalajangersarlugulu borgmesterip akisussaaffigaa aningaasaliissuseqartoqartinnagu aningaasartuuteqartoqassanngitsoq imaluunniit isertitaqartoqarsimassanngitsoq. Aningaasaliissut tassaavoq ukiumut missingersuummi aningaasartuutissatut aalajangiunneqarsimasoq.

§ 20-mut

Aalajangersagaq maannamut atuuttumik § 34-mik nangitsineruvoq

Imm. 1-imut

Aalajangersakkap naqissuserpaa borgmesteri kommunip allaffissornikkut qullersatut akisussaasutut ataatsimiititaliani tamani ataatsimiinnerni peqataasinnaatitaasoq. Aalajangersakkap taamatuttaaq naqissuserpaa, ataatsimiititaliani ataatsimiinnermut ullormi oqaluuserisassanik aammattaaq imaqarnilianik borgmesteri nassinneqartassasoq. Aalajangersagaq aammattaaq ima isigineqassaaq kommunimi aalajangiinerni nalinginnaasumik annertunerusumik paasisitsisoqartarnissaanik kissaateqarnermik.

Borgmesterip ataatsimiititaliani ataavartuni ataatsimiinnermi peqataasarnissaata avataatigut aammattaaq ataatsimiititaliaagallartuni aammalu siunnersuisoqatigiinni ataatsimiititaliani peqataasarnissaanut ilaavoq.

Imm. 2-mut

Aalajangersakkap naqissuserpaa, borgmesteri kommunip allaffissorneranut qullersatut inissisimanermigut ataqatigiissaarinermik atuuffeqartoq. Aalajangersagaq siunnersuutigineqartumut § 29, imm. 2-mut ataatsimiititaliat suliani attuumassuteqartuni ataatsimiititaliat allat aalajangersinnaassuseqarfiini attuumassuteqartunut isumasioqatigiittussaataitanerannut ilaasutut isigineqassaaq.

Imm. 3-mut

Aalajangersagaq kommunip ingerlanneqarneranut atatillugu borgmesterip ataqatigiissaarisinnaanerani nukittorsaanneranut atavoq. Borgmesteri akuliussinnaavoq suliani ataatsimiititaliani sularineqartuni sulianilu allaffissornikkut sularineqartuni. Pineqartumi kingullermi kommunalbestyrelsimut saqqummiussineq pisassaaq ataatsimiititaliaq attuumassuteqartoq aqutigalugu, pisariaqarpallu suliaq

kommunimut aningaasatigut kinguneqartussaattillugu aningaasaqarnermut ataatsimiititaliaq aqutigalugu.

Akuliussinnaanermut pisinnaatitaaffiup atorneqarnera annertunerusumik tunngavilersortariaqanngilaq, taamaallaalli borgmesteri isummersimassaaq kommunalbestyrelsi suliamut isummertussaanaera pissusissamisussasooq. Akuliussinnaanermut pisinnaatitaaffik assersuutigalugu atorneqarsinnaavoq suliaq tunngaviatigut isummernissamik ima imaqartigippat borgmesteri isumaqarpat suliarineqartoq kommunalbestyrelsimit isummerfigitittariaqarsoralugu imaluunniit aamma ataatsimiititaliap aalajangernerera borgmesterip isumaqatiginngippagu.

Ataatsimiititaliap aalajangiuppagu suliaq borgmesterip akuliuffigisimasaa ingerlateqqinniarnagu, taava kommunalbestyrelsimut saqqummiussisussaataaneq ataatsimiititaliap pisussaaffigisaa atorunnaassaaq. Tamatumani soorunami akornusissanngilaa kommunalbestyrelsimi ilaasortat suliamik kommunalbestyrelsimut saqqummiusisinnaanerat, tak. § 13.

§ 21-imut

Aalajangersagaq maannamut inatsisimmi atuuttumut § 35-mut naatsorsuuppoq, pineqaranilu kommunip taaneqartuni iliusaata inatsisitigut atorsinnaatitaaffiit tunngasunut, kisiannili qanoq iliornissamut aalajangersagaalluni, kommunip suut qanorlu toqqammavigalugit tiguisinnaatitaanera akiliisinnaatitaaneranut aalajangersagaalluni, tamakkunatigut qanoq ingerlanneqartarneri apeqqutigineqartarsimammat, minnerunngitsumik aningaaserivinninngaaniit aammalu allagartat kommunit illuuttaannut tunngasuni nalunaarsortarnerannut atasuni.

Inuk alla allagartanik inatsimmi aalajangersakkami taaneqartunik atsiortussaq pisariaqanngilaq kommunalbestyrelsimut ilaasortaasariaqartoq kommunimiluunniit atorfeqartariaqartoq, taannali pineqartoq taamaallaat isumaqatigiissuteqarsinnaasussassaaq nammineersinnaanermut iliuseqarsinnaanermullu piumasarisat nalinginnaasut naammassisimagunigit.

Inuit atsiortut kinaassusiannut uppernarsaatit uppernarsaatitut takuneqarsinnaassapput kommunalbestyrelsip aalajangiinermi imaqarniliaani.

§ 22-imut

Aalajangersagaq maannamut atuuttumut § 36-mut naapertuuppoq.

Imm. 1-imut

Aalajangersagaq borgmesterip tulliaata sulineranut atatillugu maleruagassanut erseqqissaataavoq. Aalajangersakkami aalajangiiffigineqanngilaq qanoq pisoqartillugu borgmesteri tunuarallartassasooq, tamatumani pisut ataasiakkaat

aalajangersimasut naliliiffigineri aallaaviusassammat. Borgmesterip aalajangertassavaa pineqartup suliassani qanoq ilinikkut suliarisinnaanngikkai.

Kommunalbestyrelsip ataatsimiinnerini borgmesterip borgmesterip tullia kissaatigisinnaavaa ataatsimiinneq aqoqullugu borgmesterip oqarasuaatikkut imaluunniit videokkut isiginnaarutikkut ataatsimiinneq aqukkusunnigippagu, tak. § 11, imm. 2.

Imm. 2-mut

Aalajangersakkami erseqqissarniarneqarpoq borgmesterip qaammatisiummi ulluusuni (kalenderdage) minnerpaamik 21-ni borgmesteritut suliassani ingerlassinnaanngippagit kommunalbestyrelsip borgmesterip tullia pisussaaffilersinnaavaa borgmesterip suliaanik tamanik tigusinissaanik, allaffeqarfimmi aqutsineq taamalu aningaasaqarnermut ataatsimiititaliamut siulittaasuuneq ilanngullugit, taamalu pisoqartassalluni borgmesterip nammineq borgmesterip tullia qinnuvisisimannigippagu suliani tigoqqullugit.

§ 23-imut

Aalajangersagaq maannamut atuuttumut § 63, imm. 1-4-mut naapertuuppoq.

Imm. 1-imut

Aalajangersagaq siusinnerusukkut nakkutilliineq pillugu kapitalimi inissisimagalarpoq. Naalakkersuisulli isumaqarput aalajangersagaq borgmesteri pillugu kapitalimi inissineqarpat naleqqunnerusoq.

Aalajangersakkami pineqarpoq suliassamik ataatsimik imaluunniit suliassat ikitsunnguusunik killeqartunillu borgmesteri suliarinninngikkussanngippat. Taama pisoqarsinnaanera akuerineqarsinnaanngilaq, borgmesteri aalajangersimasumik akissarsiaqartinneqarpat, tunuartinneqarsinnaananili. Aalajangersakkami borgmesterimut suliassaminik naammassinnikkusunnigitsumut kommunalbestyrelsi immikkut akuliussinnaaneranut periarfissiivoq.

Imm. 2-mut

Borgmesterimik tunuartitsigallarneq immaqalu kingusinnerusukkut soraarsitsineq aatsaat pisinnaavoq borgmesteri annertuumik imaluunniit arlaleriarluni suliassaminik naammassinnikkusunnigippat. Annertuumik imaluunniit arlaleriarluni suliassanik naammassinninngikkusunniginneq ima paasineqassaaq, piumasaqaatit taakkua marluullutik ataatsikkut naammassineqarsimasut tunuartitsigallarneq kingusinnerusukkullu soraarsitsinermik kinguneqartoqassappat. Soorunami pisuni ataasiakkaani nalilersuisoqassaaq, naammassinninngikkusunneq qanoq annertutigissanersoq, tunuartitsigallarnermik kinguneqartariaqarluni. Taamattaq naammassinninngikkusunneq annikinnerusoq kisiannili arlaleriarlugu naammassineqarusunnigippat taamatut pisuni ataasiakkaani nalilersuereernikkut

tunuartitsigallarnermik aammalu soraarsitsinermik kinguneqarsinnaanera naammassaaq.

Imm. 3-mut

Aalajangersakkami aalajangerneqarpoq tunuartitsigallarnermik aalajangernermi Naalackersuisut tunuartitsigallarnermik aalajangerneq misilissagaat taamalu misissussallugu eqqortumik aalajangersimaneq tunngaveqarnersoq.

Imm. 4-mut

Soraarsitsinermik aalajangiineq eqqartuussisunut ingerlateqqinneqarsinnaanngilaq. Tamatumani kommunimi patajaatsumik aqutsisoqarnissaa qulakkeerniarlugu pivoq. Akissarsiaqarnernik apeqqutit § 66, imm. 2-mi aalajangersarsimapput.

§ 24-imut

Imm. 1-imut

Aningaasaqarnermut ataatsimiititaliaq eqqarsaatigalugu aalajangersagaq maannamut atuuttumut § 18, 1-mut naatsorsuuppoq aalajangersarlugulu kommunalbestyrelsi aningaasaqarnermi ataatsimiititaliamik pilersitsissasoq.

Imm. 2-mut

Aalajangersakkap maannamut atuuttup § 21, imm. 1 nangippaa, aalajangersarlugulu borgmesteri aningaasaqarnermi ataatsimiititaliamut siulittaasuussasoq.

Imm. 3-mut

Aalajangersakkap maannamut atuuttumut § 18, imm. 2-mut ilaannakortumik nangitsineruvoq, siunertaralugulu ersarissassallugu, aningaasaqarnermi ataatsimiititaliami 2-mik agguarneqarsinnaanngitsumik ilaasortaqaassasoq. Aammattaaq aningaasaqarnermi ataatsimiititaliap ilaasortaasa amerlassusaat kommunalbestyrelsimi ilaasortat amerlassusaata affaat qaangissanngilaat. Taamattaaq kommunalbestyrelsi aningaasaqarnermi ataatsimiititaliap ilaasortaannut sinniissussanik qinersissapput.

Imm. 4-mut

Aalajangersagaq maannamut atuuttumut § 18, imm. 4-mut allannguuteqarluni naapertuuppoq, tamatumani pineqarpoq aningaasaqarnermi ataatsimiititaliamut inunnik toqqaanissamik piginnaatitsissummik inerteqquteqarneq, kommunalbestyrelsi imaluunniit aqutsinissamik ileqqoreqqusap avataani aalajangersakkat naapertorlugit sinniisoqartussaananut tunngatillugu. Akerlianik § 31, imm. 3-mi taaneqartut immikkut ataatsimiititaliat, aningaasaqarnermi ataatsimiititaliamut qinikkat kommunalbestyrelsimi ilaasortaasussaapput, tamanna

peqquteqarpoq ataatsimiititaliaq inatsit naapertorlugu kommunalbestyrelsi sinnerlugu aalajangernissamik piginnaatitaammat, akerlianillu immikkut ataatsimiititaliat taamaallaat killilimmik piginnaatitaaffeqarmata sulianut aalajangersimasunut atatillugu imaluunniit kommunalbestyrelsimut, aningaasaqarnermi ataatsimiititaliamut imaluunniit ataatsimiititalianut ataavartunut piareersaanernik suliaqartarmata imaluunniit siunnersuineramik ingerlatsisarmata.

Aalajangersakkap naggataata ersarissarpaa, ataatsimiititalianut inunnik qinersinerni kommunalbestyrelsi toqqaasinnaangitsoq qinigaanerit kommunalbestyrelsip atuuffianit sivikinnerusumik atuuffeqartussanik

§ 25-imut

Imm. 1-imut

Aalajangersagaq maannamut atuuttumut § 21, imm. 2-mut naapertuuppoq.

Inatsisartut inatsisaat naapertorlugu aningaasaqarnermi ataatsimiititaliaq taamaallaat inatsisitigut pilersinneqarnissaa piumasagaataammat, aningaasaqarnermi ataatsimiititaliap suliasai inatsisartut inatsisaanni toqqaannartumik allassimanissaat eqqortuunerussasoq nalilerneqarpoq, aqutsinermik ileqqoreqqusanilu allassimassanatik.

Aalajangersakkap qulakkeerpaa aningaasaqarnermi ataatsimiititaliaq ataqatigiissaarinissaq eqqarsaatigalugu piginnaassutsinik sakkortuunik piginnaatitaassasoq, taamaalilluni immikkoortualukkaartumik aqutsisoqalinnginnissamik ineriartortoqalernissaa pinngitsoorumallugu. Pingaaruteqarpoq aningaasaqarnermi ataatsimiititaliami aamma kommunalbestyrelsimi kommunip suliasaani amerlasuuni tamakkerlugu isiginninnermik qulakkeerisoqassasoq taamaalilluni suliasat pimoorussamik tulleriarsinnaaneritik periarfissaqarsinnaaqqullugu.

Nr. 1 pillugu:

Aalajangersakkap naqissuserpaa aningaasaqarnermi ataatsimiititaliaq ataqatigiissaarisutut ingerlatsiviusoq aammalu naqissuserlugu aningaasaqarnermi ataatsimiititaliap oqaaseqaatai aningaasaqarnermi suliani tamani aamma allaffissornermi suliani piniarneqartassasut tamakkua kommunalbestyrelsip aalajangiunneqarnissaanut saqqummiunneqartinnagit.

Nr. 2 pillugu:

Aalajangersagaq ilaatigut kommunit ingerlatsinerannik atuuttumik naqissuseqqineruvoq, ilaatigullu kommunip aqunneqarnerani kommunaldirekturitut atorfik qanoq pingaaruteqartigineramik erseqqissaassutaalluni.

Nr. 3 pillugu:

Aalajangersakkap naqissuserpaa aningaasaqarnermi ataatsimiititaliaq kommunip suliassaani tamani karseqarnermut aamma naatsorsuuserinermut attuumassutilinnut suliassanut tamanut akisussaasuusoq aammalu naalakkersuisut konto-t ingerlannerinik maleruagassanik atuuttuni aalajangersagaanni eqqortitsinissap qulakkeerneqarnissaa ilanngullugu.

Nr. 4 pillugu:

Aalajangersakkap erseqqissarpaa aningaasaqarnermi ataatsimiititaliap aningaasaqarnermut aammalu immikkoortukkuutaani pilersarusiornermut atatillugu pilersarusiormissamut suliassai. Aningaasaqarnermi ataatsimiititaliaq aammattaaq pineqartuni nalinginnaasumik maleruagassanik aalajangiissasoq pisussaaffilerneqarpoq. Maleruagassat ataatsimiititalianut tamanut aalajangiinerinut pituttuisuupput.

Nr. 5 pillugu:

Aningaasaqarnermut ataatsimiititaliaq peqquneqassaaq nalinginnaasumik ileqqoreqqusanik aalajangersaaqqullugu. Ileqqoreqqusat pilersinneqartut ataatsimiititaliat allat aalajangiinerminni pinngitsooratik malittarisassavaat.

Imm.2-mut

Aalajangersagaq maannamut atuuttumut § 21, imm. 3-mut naapertuuppoq, aalajangersagarlu aningaasaqarnermi ataatsimiititaliap piginnaatitaaffii aamma ingerlatsiviit allat oqartussaaffiinut ilaqarsinnaaneranik aalajangersaalluni. Kommunalbestyrelsi aqutsinermik ileqqoreqqusani aalajangiisinnaavoq assersuutigalugu inuussutissarsiornermi suliassat aningaasaqarnermi ataatsimiititaliami ingerlanneqarsinnaasut ingerlatseriaaseq tamanna kommunalbestyrelsip qinerpagu ataatsimiititaliaq taagorneqassaaq inuussutissarsiornermut aamma aningaasaqarnermut ataatsimiititaliaq.

Imm. 3-mut

Aalajangersagaq maannamut inatsisartut inatsisaannut atuuttumut § 23, imm. 5-mut naapertuuppoq, kommunimullu missingersuusiornermi suliaqarnermut annertuumik pingaaruteqarmat siunertaralugu kommunalbestyrelsimi ilaasortat aningaasaqarnermi ataatsimiititaliami ilaasortaangitsut missingersuutit suliarineqarnerannut pitsaannerusumik apeqqutininut paasisaqarsinnaaqqullugit.

§ 26-imut

Imm. 1-imut

Aalajangersagaq maannamut atuuttumut § 18, imm. 1-mut naapertuuppoq, aalajangersarlugulu kommunit nammineerlutik ataatsimiititaliat

aaqqissuuneqarnerannik pilersaarusiussasut suliat naammassineqarnissaannut immikkut inatsiseqarnermi piumasagaataasut naapertorlugit.

Aalajangersakkap kinguneranik aqutsinermi ileqqoreqqusaq nalinginnaasoq ataatsimiititaliat ataavartut taakkualu suliassaannik malittarisassanik ataasiakkaanik imaqaqqilaq, kisiannili Naalakkersuisut nakkutilliisutut oqartussatut aqutsinermik ileqqoreqqusat kommunini ataasiakkaani immikkut inatsiseqarneq naapertorlugu pisussaaffiit akerliunersut misissorsinnaassavaat.

Imm. 2-mut

Aalajangersagaq maannamut atuuttumut § 18, imm. 2-mut ilaatigut nangitsineruvoq, siunertaralugulu ersarissassallugu ataatsimiititalianik ataavartunik ilaasortat amerlassusaat 2-mik avinneqarsinnaassanngitsut. Aammattaaq ataatsimiititaliani ataavartuni ilaasortat amerlassusaat kommunalbestyrelsimi ilaasortat affaat sinnerlugit amerlassuseqassanngillat. Aammattaaq kommunalbestyrelsi aningaasaqarnermi ataatsimiititaliami ilaasortat sinniisussaannik qinersissaaq. § 36-ip aalajangersarpaa qaqugukkut sinniisussamik aggersaasoqartassasoq.

Imm. 3-mut

Aalajangersagaq ilaatigut maannamut atuuttumut § 18, imm. 4-mut nangitsineruvoq, aalajangersarlugulu ataatsimiititaliani ataavartunut qinersineq aningaasaqarnermi ataatsimiititaliamik qinersinerup kingorna pissasoq.

Aalajangersakkap naggataani taamattaaq § 24, imm. 4-mi aalajangerneqarpoq, ataatsimiititalianut inunnik qinersinermi aalajangiisoqarsinnaanngitsoq, qinersinerit kommunalbestyrelsip atuuffiata naannerusumik atuuttussamik.

§ 27-imut

Aalajangersagaq maannamut atuuttumut § 24-mut naapertuuppoq

Imm. 1-imut

Inatsimmi atuuttumi amerlanerussuteqarluni qinersinermi aalajangersagaq maanna inatsisissatut siunnersuummi § 35, imm. 1-mi allassimalerpoq.

Immikkoortoq 2-mi ersarissarneqarpoq, ataatsimiititaliani ataavartuni ilaasortaasut tamarmik ataatsimiititaliami siulittaasutut qinerneqarsinnaanermik pisussaaffeqartut. Ataatsimiititaliami ataavartuni ilaasortaaneq ilaasortaaneq sanilliullugu siulittaasoq kommunalbestyrelsip atuuffianut tamarmut qinerneqarneq ajorpoq, taamaalillunilu amerlanerussuteqarluni qinersinikkut ataatsimiititaliami ataavartuni taarserneqarsinnaassalluni.

Immikkoortoq 3-mi siunertarineqarpoq ataatsimiititaliami siulittaasup suliassai borgmesterip suliassaanut nallersuutissallugit, tak. inatsimmi siunnersuutip § 17-ia.

Imm. 2-mut

Aalajangersakkap siunertaraa ataatsimiititaliap sulinera eqaannerusumik ingerlanneqarsinnaaqullugu, minnerunngitsumik ataatsimiititalianut ataatsimiinnissamik aggersaaneq ilaatigut ajornartorsiuteqarfiusinnaammat, assersuutigalugu ataatsimiititaliamik ilaasortat nunaqarfimmi najugaqarpata.

Immikkoortoq 1-mi ataatsimiititaliap siulittaasuata sulianik aalajangiisinaanera, ataatsimiititaliamut ataavartumut saqqummiunneqartussaagaluartumut pineqarpoq. Ataatsimiititaliami ataavartumi siulittaasoq kommunip allaffissornerata ilaanut ulluinnarni aqutsisutut assersuuneqanngilaq taamaalillunilu aalajangersakkap ataavartumik ataatsimiititaliap piginnaatitaaffiata aammalu borgmesterip allaffissornermi ulluinnarni aqutsisuatut pisinnaatitaaffiisa killiinik allanngortitsinngilaq.

Ataatsimiititaliap ataavartup siulittaasua sulianik nukinginnartunik aammalu suliani apeqquserneqarsinnaanngitsuni aalajangiisinaanermik piginnaatitaaffiup avataatigut tunineqarusuppat, tamanna ataatsimiititaliap ilaasortat tamarmik isumaqatigiissutigippassuk pisinnaavoq.

Suliani oqaariaatsip "apeqquserneqarsinnaanngitsoq" nassuiarneqarnerani piomasqaataavoq, ataatsimiititaliap siulittaasuata nalilissagaa, ataatsimiititaliami ilaasortat tamarmik, tassalu amerlanerussuteqartuinnaanngitsut suliaq apeqquserneqarsinnaanngitsutut isigissagaat.

Immikkoortup 2-mi suliassani nukinginnartuni pisoqartillugu borgmesterimut ilisimatitsisussaataaneq toqqammaveqarpoq borgmesterip ataqatigiissaarinissamut periarfissinneqassammat aammalu ataatsimiititaliap ataavartup ingerlatsineranut borgmesterip akuliunnissaanut pisinnaatitaafeqarneranik toqqammaveqarpoq. Ataatsimiititaliami siulittaasoq inatsit naapertorlugu pisinnaatitaaffeqarpat, assersuutigalugu meeqqanut inuusuttunullu ikiorsiisarnerit pillugu Inatsisartut inatsisaat nr. 1, 15 april 2003-meersoq naapertorlugu, borgmesteri siumoortumik nalunaarfigineqassanngilaq.

Imm. 3-mut

Aalajangersakkap ersarissarpaa siulittaasutut immikkut piginnaatitaaffiit ataatsimiititaliat aqunneqarneri toqqammaviatigut allanngortinneqanngitsut. Taamaalillunilu siulittaasoq ataavartumik ataatsimiititaliat aalajangiinerannik malinnaasussaavoq. Ataatsimiititaliamut atatillugu siulittaasup suliassarai ataatsimiinnerit piareersarneri, ataatsimiinnerni aggersaaneq, ataatsimiinnerni aqutsineq il.il.

§ 28-imut

Aalajangersagaq maannamut atuuttumut § 23, imm. 1-4, aamma imm. 6-imut naapertuuppoq.

Imm. 1-imut

Aalajangersakkap naqissuserpaa ataatsimiititaliat sulinerat ataatsimiinnerni ingerlanneqassasoq. Aalajangersagaq ersarissaataavoq, ataatsimiititaliaq ataavartoo kommunalbestyrelsi assigalugu ataatsimeeqatigiisititut aaqqissuusaasoq.

Tele atorlugu attaveqaatinik teknologi atorlugu aalajangersakkanik peqartoqanngilaq taamaattumillu pisut ataasiakkaat naapertorlugit kommunalbestyrelsi naliliisassaaq suut tele-kkut attaveqaatitigut teknologi atorneqartassanersut.

Imm. 2-mut

Aalajangersagaq maannamut inatsimmi atuuttumut § 23, imm. 1-mut naapertuuppoq, ataatsimiinnermi suleriaasissaq pillugu. Immikkorluinnaq ataatsimiititaliat ataavartut siulittaasup tullissaannik qinersinissaat pisariaqartunganngilaq.

Suleriaasissamik piunasaqaat ima isumaqanngilaq kommunalbestyrelsip assigisaanik allassimasumik suleriaaseqartoqassasoq. Aalajangersagaq pingaarnerusumik isumaqarpoq, ataatsimiititaliap ataavartup ingerlariussissaanik aalajangersakkamik kommunalbestyrelsi pisussaaffeqanngimmat.

Imm. 3-mut

Aalajangersagaq maannamut inatsimmi § 23, imm. 3-mut naapertuuppoq, nalinginnaasumillu § 16-mut innersuussinikkut aalajangersaalluni, ikinnerussuteqartut pisussaaffiinik aammattaaq kommunalbestyrelsini imaqarnilianut tunngatillugu aamma ataatsimiititaliami atuuttusoq aammattaaq § 16-mut innersuussutip naqissuserpaa imaqarniliaq atsiorneqarneraniit kingusinnerpaamik qaammat ataaseq qaangiutsinnagu Naalakkersuisunut assilineranik nassitsisoqassasoq.

Imm. 4-mut

Aalajangersagaq maannamut inatsimmut atuuttumut § 23, imm. 4-mut naapertuuppoq,

naammassisumillu aalajangersarlugu qaqugukkut ataatsimiititaliami ilaasortaangitsut ataatsimiititaliap ataatsimiinnerini najuussinnaatitaasut, tassami aallaaviummat ataatsimiititaliani ataatsimiinnerit matoqqasuuneri.

Immikkoortoq 1-ip ataatsimiititaliaq periarfissippaa ingerlatsisoqarfimmi ikiorsiinissamik piunasaqarsinnaalersillugu, kisiannili borgmesterip allaffissornermi ulluinnarni qullersatut aqutsisutut, pisariaqarpat ataatsimiititaliaq pineqartoq tusarniareerlugu aammalu ataatsimiititaliap siulittaasua oqaloqatigereerlugu, aalajangissallugu allatseqarnermi ikiorteqarneq sorleq ikiorsiissutaassanersoq aalajangissallugu. Ataatsimiititaliap ataavartup allatsitut toqqagaasup ataatsimiititaliap ataatsimiinnera peqataaffigissagaa kissaatiginngippagu, ataatsimiititaliap ataavartup tamanna akerlilersinnaavaa, taamaattorli borgmesterip

tamanna akerlilerpagu allamik allatsimik toqqaasinnaangilaq. Ataatsimiititaliami ataavartumik borgmesterillu allatseqarneq pillugu isumaqatigiinngissutaasoq kommunalbestyrelsimit aalajangiiffigineqassaaq.

Aammalu kommunimi atorfilik kommunalbestyrelsimit ataatsimiititaliamut ataavartumut allatsitut toqqagaasoq, ataatsimiititaliami ataavartumit ataatsimiinnernut peqataanissaa akerlilersinnaavaa, kisiannili ataatsimiititaliap ataavartoq kommunalbestyrelsi allatsissatut aalajangiinera malinnissaanut pisussaatitaassaaq suliat ingerlatsivimmi suliarineqarnerini ataatsimiititaliap ataavartut ataatsimiinnerisa aamma avataanni.

Ataatsimiititaliap ataavartoq aamma atorfilinnik aggersaasinnaavoq paasissutissanik oqaatsitigut nassuiaasinissaaq imaluunniit assigisaanik tigusaqarnissaaq siunertaralugu.

Ataatsimiititaliap ataavartoq ataatsimiititaliami ataavartumi allatsip avataatigut atorfilinnik allanik peqataasoqarnissaanik akuersissummik nalinginnaasumik tunisisinnaangilaq. Atorfillit ataatsimiititaliap ataatsimiinneranut paasissutissiissallutik aggersarneqartut ataatsimiinnerni pisussaatitaapput peqataassallutik, kommunalbestyrelsi imaluunniit borgmesteri allamik aalajangersimangippat.

Immikkoortup 2-ani pineqarpoq atorfilittaangitsut ilaatigut kommunalbestyrelsimi ilaasortat allat ilanngullugit, ataatsimiititaliani peqataasinnaatitaaneri. Aalajangersakkap erseqqissarpaa inuit pineqartut taamaallaat ataatsimiititaliap ataatsimiinnerinut aggersarneqarsinnaasut suliami aalajangersimasumik paasissutissiinissaannik toqqammaveqarpat. Akerlianik kommunimi atorfilinnut, atorfeqartuunngitsut ataatsimiititaliat ataavartut isumaqatigiinniarneri najuuffigisinnaavaat taasisitsinerilli najuuffigisinnaanagit.

Aalajangersakkami anguniarneqarpoq ataatsimiititaliani ataatsimiinnerit sulisuunngitsuniit peqataaffigineqarnissaat killilersorneqassasoq minnerunngitsumik anguniarlugu ataatsimiititaliat ataatsimiinnerini ataatsimiititaliami ilaasortat kommunalbestyrelsimi ilaasortaasut avataatigut peqataasannginnissaat, taamaalillugu isumaqatiginninniarneri kommunalbestyrelsip ataatsimiinnerini ammasuniit ataatsimiititaliami ataatsimiinnerni matoqqasusunut nuunneqarnissaat ernumassutigineqarsinnaammat.

Imm. 5-imut

Aalajangersagaq maannamut inatsimmut atuuttumut § 23, imm. 6-imut naapertuuppoq, isigineqassallunilu nalinginnaasumik kommunit aalajangeeriaasaat aammanerulernissaannik kissaateqarneq tunulequtaralugu.

§ 29-imut

Aalajangersagaq maannamut atuuttumut § 25-imut naapertuuppoq.

Imm. 1-imut:

Aalajangersakkakut aalajangerneqarpoq ukiumut missingersuummi akuerineqartumi killiliunneqartut iluanni ataatsimiititaliap ataavartup susassaqaqfini pisussaaffigissagai. Aalajangersakkakut aammattaaq aalajangiunneqarpoq naqissuserpaa ukiumut missingersuummi akuerineqarsimasut sipporneqartussanngornerat ataatsimiititaliap paasippagu taava ilassutitut aningaasaliissutissanik pinngitsoorani qinnuteqartoqassasoq.

Imm.2-mut:

Aalajangersakkakut aalajangerneqarpoq ataatsimiititaliap ataavartoq ataatsimiititalianik attuumasuteqartunik isumaqatiginninniartassasoq, ilaatigut aningaasaqarnermut ataatsimiititaliamik, ataatsimiititalianik ataavartunik allanik aammalu ataatsimiititaliat allat aalajangiisoqartinnagu isumaqatiginninniartassagai. Pisariaqartillugu Aataatsimiititaliap ataavartup isumaqatiginninniartoqartillugu pisariaqalerpat borgmesteri isumaqatiginninniarnerni ilanngutsissinnaavaa.

Imm. 3-mut:

Aalajangersakkakut aalajangerneqarpoq tamanna kissaatigineqaraangat ukiumut missingersuutitut aammalu missingersuusianut siunnersuutitut ataatsimiititaliap ataavartoq ilanngussisassasoq. Ataatsimiititaliap ataavartoq ilanngussaqaqarnissaminut pisussaavoq aningaasaqarnermut ataatsimiititaliap tunniussinissamut killissarititaa tikitsinnagu.

§ 30-imut

Aalajangersagaq maannamut atuuttumut § 26-imut naapertuuppoq.

Aalajangersakkakut aalajangerneqarpoq ataatsimiititaliami ilaasortaq kinaluunniit kommunalbestyrelsimut suliassanngortitsisinnaasoq, taamaalillugulu aalajangiisinnaassuseq ataatsimiititaliamiit nuussinnaallugu.

Taamaattorli suliassat inatsit naapertorlugu ataatsimiititaliami ataavartumi suliassarititaasut suliassanngortinneqarsinnaanngillat.

§ 31-imut

Imm. 1-mut:

Aalajangersagaq § 18, imm. 3-mik ilaatigut ingerlatitseqqinneruvoq.

Aalajangersakkakut aalajangiunneqarpoq ataatsimiititaliami ataavartumi qinersinerup kingorna ataatsimiititalianik allanik, isumalioqatigiissitalianik il.il. qinersisoqassasoq.

Imm. 2-mut:

Aalajangersakkap naggataani § 25, imm. 4-mi aalajangersarneqartoq naapertorlugu kommunalbestyrelsi ataatsimiititalianut il.il. inunnik qinersinerni aalajangiisinnaanngitsoq qinigaaffiit kommunalbestyrelsip atuuffianiit sivikinnerusumik atuutissasut.

Imm. 3-mut:

Aalajangersagaq maannamut inatsisartut inatsisaanni atuuttumi § 18, imm. 7-mut naapertuuppoq, siunertatullu erseqqissassallugu kommunalbestyrelsi taamaallaat pisinnaatitaaffeqartoq immikkut ataatsimiititaliat taakkua qanoq katiternissaannik aammalu qanoq suliaqarnissaanik.

Malittarisassat nalinginnaasut ataatsimiititalianut imm. 1-mi taaneqartunut atuuttut ataatsimiititaliani, isumasioqatigiissitaliani assigisaanilu atuutinneqartussaansut aalajangersimasumik akineqarsinnaanngillat. Taamaattoq oqaatigineqassaaq malittarisassat taamaattut pisortatigut sullissinermi nalinginnaasumik tunngaviusutut malittarisassaappata, assersuutigalugu oqaluserisassat aamma imaqarniliat suliarineqartarnerannut, kommuni pisussaassaaq aalajangersakkat taaneqartut immikkoortoq 1 naapertorlugu pilersinneqartuni atussallugit.

Ataatsimiititaliat piullugit aalajangersakkat ataatsimoortut sinnerisa kapitali 3-miittut ataatsimiititaliat pillugit atuunnissaat naatsorsuutigineqassaaq kommunalbestyrelsi allanik aalajangiisimangippat, malittarisassat aningaasaqarnermut ataatsimiititaliami ataatsimiititalianilu ataavartuni toqqaannartumik aalajangersartakkat eqqaassanngikkaanni, pingaarnerusumillu taaneqassapput malittarisassat inissitsiterluni ataatsimiinnermi atorineqartartut.

§ 32-imut

Aaqissuuseqqinnermut ataatsimiititaliap isumaliutersuummini siunnersuutigai qinikkat sulineranni aaqqissuusinermi periarfissanik nutaanik pilersitsisoqassasoq, imaalillugu kommunini ataasiakkaani oqallisigineqarlunilu eqqarsaatigineqassasoq aaqqissuussinerup qanoq ittip qinikkat sullissineranni pitsaanerpaasussap anguneqarsinnaajumaarnera.

Siunnersuummi kommunalbestyrelsi periarfissinneqarpoq aqutsinissaq kissaatigineqartoq aaqqissuutissallugu inatsisip § 25-at aamma § 26-at killiliisoralugit, piumasaqaatini aningaasaqarnermut ataatsimiititaliaq aalajangersimasunik suliaasaqarnermi kommunip pisariaqartitai naapertorlugit aqutseriaatsimik aaqqissuusisinnaasoq. Aqutseriaaseq aqutsinermik malittarisassani aalajangersarneqassaaq, tak. § inatsimmi 1, imm. 2.

§ 33-imut

Aalajangersakkap maannamut atuuttoq § 18, imm. 8 taarserpaa, erseqqissarlugulu kommunip ataatsimiititaliaanut il.il. qinigaaneq inuiaqatigiinnut kiffartuussinerummat. Siunnersuutikkulli pingaarnertut atorunnaassaaq kommunalbestyrelsi atuuffimmini kommunip innuttaanut allanut qinigaaffimminik tunniussisinnaanera. Tamanna pissuteqarpoq kommunerujussuanngortumi akisussaaffiit annertusinerisa kingunerannik inuit qinigaasimannngitsut akisussaaffilerneqarnissaaat aammalu aalajangiisinnaalernissaat nakkutilliinermik oqartussaasut misissuinissamik aammalu pineqaatissiinissamik pisinnaatitaaffeqartutut inissisimasuni siunertaqarsorinangimmat.

Aalajangersakkakkut anguniarneqanngilaq pisinnaasitsissutinik nalinginnaasunik allannguinnissaq, ilaatigut nunaqarfimmi siulersuisut pineqartillugit.

Imm. 2-mut:

Imm. 1-imi malittarisassamik pingaarnermik matuma kingorna siulersuisunut, ataatsimiititalianut, siunnersuisoqatigiinnut il. il. atortussaatisinngitsoortoqassaaq inatsisiliani allani erseqqissumik aalajangersaavigineqarsimappat, tassa kommunalbestyrelsi ilaasortarinngisaminik toqqaasinnaanngorlugu, assersuutigalugu ulluunerani paaqqinnittarfinnik sullissinerni.

§ 34-imut

Aalajangersagaq inatsimmi atuuttumi § 27-mut naapertuuppoq.

Imm. 1-mut:

Aalajangersakkakkut aalajangerneqarpoq ataatsimiititaliamut ilaasortanik marlunnik amerlanerusunilluunniit qinersisoqartillugu qinersisaaseq d'Hondt atorlugu (amerlanerussuteqarneq tunngavigalugu qinersisarneq) ataatsimiititaliani tamani immikkut atorneqartassasoq tamannattaq atuuppoq isumasioqatigiissitanut, siulersuisunut il.il. qinersisarnerne.

Imm. 2-mut:

Aalajangersakkakkut aalajangerneqarpoq ataatsimiititaliani borgmesterip ilaasortaaffiginngitsuugassarinnngisaani amerlassutsit eqqarsaatigalugit qinigaaffimmi suleqatigisaminut borgmesteri ilaatinneqartassasoq. Amerlanerussuteqarniarluni qinersinermi erserpat borgmesterip qinigaaffimmi suleqataasa pingasusariaqarnerat taava borgmesterip saniatigut ilaasortassanik marlunni qinersisoqartassaaq. Eqimattami borgmesteri ilaatinneqareerluni pingasunik ilaasortaqaassappat, marlunnik ilaasortanik allanik ataatsimiititaliamut qinersisoqassaaq. Tamanna aamma isumasioqatigiissitanut, siulersuisunut, il.il. atuuppoq.

Imm. 3-mut:

Aalajangersakkami kommunalbestyrelsip ilaasortami ilaasortaringisamilu akornanni ataatsimiititalianut assigisaannullu qinersinermini killiffeqarpat aalajangersagaq una iluarsiiisutigineqatassaaq.

Amerlanerussuteqarneq naapertorlugu inunnik arlalinnik qinersisoqassatillugu qinersisoqassatillugu tunngaviusumik naatsorsuutigineqartarpoq qinerneqartussat tamarmik naligiimmik inissisimassasut imaalillugu, suleqatigiiaat tamarmik inissat inuttalernissaannut assigiimmik kiffaanggissuseqassasut. Tamatuma malitsigaa suleqatigiiaat inissanik imaluunniit inissamik kingullermik inissittoqartussaatiillugu qinersisinaanermut periarfissaat killeqarnerussammata, pissutigalugu pisuni aalajangersimasuni ilaasortat periarfissaat nungussimasinnaammata. Aalajangersagaq assersuutigalugu ataatsimiititalianut § 31, imm. 3 naapertorlugu pilersinneqartunut attuumassuteqarpoq.

Imm. 4-mut:

Aalajangersagakakkut amerlassuteqarneq naapertorlugu qinersisarnermi periuseq d'Hondts-ip periusaanik taaneqartartoq ingerlateqqinneqarpoq.

Aalajangersagaq malittarisassamik ilassuserneqarpoq, kattusseqatigiit inissamik inuttaqanngitsumik inuttaleerusunnigippata taava inissaq kattusseqatigiinnit allanit d'Hondts-ip periuseq malillugu pissarsiarineqartassaaq.

Malittarisassap atuutinnerani nalornisoqartarmat inatsisip matuma akuerineqarneranut atatillugu ilitsersuummik nassiussisoqassaaq, tamatumani d'Hondts-ip periuseq qanoq atorneqassaneqartassanersoq erseqqissumik takutinneqartassaaq.

§ 35-imut

Aalajangersagaq maannamut atuuttumut § 28-mut naapertuuppoq.

Imm. 1-mut:

Aalajangersakkakkut aalajangerneqarpoq qinigassanngortittumik qinersinermi amerlanerussuteqartoqassasoq. Qinigassanngortittut ilaannaalluunniit siullermeerluni taasinermi amerlanerussuteqartunit taaneqanngippat, taaseqqittoqassaaq. Taasinikkut tamatumuuna aamma qinigassanngortittoq ataaseq amerlanerussuteqavissumik taaneqanngippat taaseqqittoqassaaq qinigassanngortittut marluk amerlanerpaanik taaneqarsimasut akornanni, taasinerlu taanna naligiiffiulluni inerneqarpat makitsisoqartassaaq. Makitsineq borgmesterimit ingerlanneqartassaaq.

Imm. 2.-mut:

Aalajangersakkakkut aalajangerneqarpoq kommunimi sulilerumallutik qinnuteqartut arlallit akornanni ataatsimiititaliani toqqaanissami imaluunniit kommunalbestyrelsimi taasinissami immikkut periaaseqarnissaq.

Atorfinititsinissamut atatillugu oqaluuserinninnermi tunngavissatut qinnuteqartut pillugit paasissutissat tamarmik saqqummiunneqassapput, toqqaanissamilu taakku arlaat kinaluunniit siunnersuutigineqarsinnaavoq. Taamaattumik toqqaanissaq, tamanna isumaqatigiinngissutigineqanngippat, qinnuteqartut ilaannaanut, soorlu ataatsimiititaliamit imaluunniit allaffimmit inassutigineqarsimasunut, tunngatinneqarsinnaanngilaq.

§ 36-imut

Aalajangersagaq maannamut atuuttumut § 29-mut naapertuuppoq.

Imm. 1-mut:

Aalajangersakkakkut sillimaffigineqarpoq, ataatsimiititaliami ilaasorta qinigaaffiup iluani ilaasortaajunnaarpat taamaalillunilu ilaasortamik allamik taarserneqartussangorluni.

Aalajangersakkakkut aalajangerneqarpoq suleqatigiinnut ilaasortaq tunuartoq aamma tassaassasoq ilaasortamik nutaamik qinerseqataasusaaq.

Imm. 2-mut:

Kommunalbestyrelsip ataatsimiitarnernit ataatsimiititaliat amerlanerusunik ataatsimiittarmata, ataatsimiititalianili ilaasortat tamatigoruinnangajak ikittuinnaat peqataasarnerisa kingunerannik tamakkiisumik peqataasoqartarnissaa pisariaqartinneqartarmat, tak. § 26. imm. 2-mut nassuiaatit, sinniisussap killilersorneqanngitsumik ataatsimiititaliamut ataatsimiigiaqquneqarsinnaanera ilanngunneqarpoq.

Taamaakkaluartorli kommunalbestyrelsimut ilaasortap taamatut sulini ingerlatiinnartillugu piffissap ilaani ataatsimiititaliamit imminut tunuartikkallarsinnaanngilaq, aamma tak. § 15, imm. 2-mut nassuiaatit, tamatumani aningaasaqarnermut ataatsimiititaliamut aammalu ataatsimiititalianut ataavartunut qinigaanerit pisussaaffiummata. Qinigaaffimmi suleqatigiit aalajangigassaraat sinniisussamik ataatsimiigiaqqusinermit piumasaqaatit naammassineqarsimanersut.

Qinigaaffimmili suleqatigiit pisussaanngillat ataatsimiititaliami inissaq inuttaqanngikkallartoq ilaasortap najuutinngitsup sinniisussaanut tunniutissallugu.

Aalajangersagaq taamaallaat atorneqassaaq ilaasortanut ataatsimiititaliami ilaasortassatut qinigaasimasunut, atorneqassananili pinngitsoorani ilaasortaasussanut, soorlu borgmesteri pinngitsoorani aningaasaqarnermut ataatsimiititaliamut ilaasortaasusaaq. Taamaattumik borgmesterip najuussinnaanngikkallarnerani aningaasaqarnermut ataatsimiititaliamut ilaasortamik nutaamik qinersisoqarsinnaanngilaq, ulluinnarnili allaffiup aqunneqarnera, tak. siunnersuutip § 22, imm. 2, borgmesterip tullianit ingerlanneqalersimappat borgmesterip tullia aningaasaqarnermut ataatsimiititaliamut aamma siulittaasunngusaaq.

Borgmesterip tullia aningaasaqarnermut ataatsimiititaliamut ilaasortaareerpat borgmesterillu suliaanik suliaqalerpat ataatsimiititaliami inissaq ataaseq inuttaarutissaaq.

§ 37-mut

Imm. 1-imut:

Aalajangersagaq inatsisip maannamut atuuttup § 30, imm. 1-annik ingerlatitseqqinneruvoq suliaassallu aalajangersimasut ataatsimiititaliani oqaluuserineqarnerini aalajangeeqataasinnaannginneq pillugu masskkumut periaasiusartut inatsisikkut tunngavilerlugit ataatsimiititaliani tamani atorneqartassaaq.

Malittarisassat kommunalbestyrelsinut atuuttut, tak. § 14-imut nassuiaatit, assigalugit aalajangeeqataasinnaajunaarsitaanissaq ilumut pissutissaqarnerisooq pillugu aalajangiiniarnerit pisortat ingerlatsineranni suliat sulirineqartarnerat pillugu Inatsisartut inatsisaanni malittarisassat naapertorlugit pisassapput.

Periaatsikkut inatsimmik tunngaveqalersukkut tassuuna pineqarput ataatsimiititaliani kommunalbestyrelsimilu aalajangeeqataasinnaajunaarsitaanerit pillugit apeqqutit malittarisassat assigiit malittugit suliarineqartarnissaat.

Imm. 2-mut:

Kommunalbestyrelsimi ilaasortat borgmesterimut nalunaartussaataitaanerit pillugu § 14-imi imm, 2-anni aalajangersakkanut aalajangeeqataasinnaajunnaarsitsinissaq nalornisoorfiutillugu aalajangersagaq una assinguvoq.

Imm. 3-mut:

Aalajangersakkakkut qularnaarniarneqarpoq ilaasortaq ataatsip aalajangeeqataasinnaajunnaarsinneqarneratigut kommunalbestyrelsimi pissaanerup oqimaaqatigiinnerata nikisinneqartannginnissaa.

Kommunalbestyrelsimi ikinnerussuteqartut amerlanertigut ataatsimiititaliani ataasiinnarmik ilaasortaataitaqartarnerat eqqarsaatigalugu aalajangersarneqarpoq § 14, imm. 3-mi aamma

imm. 4-mi ikinnerussuteqartunut qularnaveeqqutit aamma ataatsimiititaliani sulinerimi atorneqartassasut.

Imm. 4-mut:

Matumuuna imm. 3-annut nassuiaatit innersuussutigineqarput.

Kommunalbestyrelsip ataatsimiititaliai nalinginnaasumik ilaasortakitsuusarmata naleqquttuosorineqanngilaq malittarisassat § 14, imm. 4-iittut - naak ilaasortaq ataaseq aalajangeeqataasinnaajunnaarsitaanini pissutigalugu najuutinngikkaluartoq aammalu sinniisusaa ataatsimiititaliap suliassaminik ingerlatsinissaanut aggersarneqarsimannikkaluartoq suliap naammassineqarnissaanik ilaasortat pingajorarterutaasa marluk (2/3) piumasaqaateqarsinnaanerannut tunngasut - nussuinnassallugit.

§ 38-*imut*

Aalajangersagaq inatsimmut atuuttumi § 31-annut naapertuuppoq.

Imm. 1-mut:

Aalajangersakkakkut aalajangerneqarpoq ataatsimiititaliani ilaasortat pisortat ingerlatsivianni ataatsimiititaliap akisussaaffigisaani sullisinertik sapinngisamik akissarsiaqaatigissanngikkaat. Taamaattorli periarfissiisoqarpoq ataatsimiititaliami ilaasortaq suliassamik tiguisinnaasoq, suliassaq tamanut ammasumik sularinnittussarsiorneqareersimappat. Aammattaaq ilaasortaq qaqutiguinnaq pisartunik akilerneqarluni sulisarsinnaavoq pisortatigut ingerlatat ilaani ataatsimiititaliamit akisussaaffigineqartumi pissutsinik immikkut ittunik pisoqartillugu. Tamanna atuutinneqarsinnaavoq ilaasortaq kisimiilluni suliassap naammassineqarnissaanut pisinnaasat pisariaqartut ilaasortap kisimi naammassisinnaappagit.

Imm. 2-mut:

Aalajangersagaq ilanngunneqarpoq periaatsit tulluannngitsutut assersuutissat arlallit tunngavigalugit, tassa inuit appasinnerusumi atorfeqartut imaluunniit nunaqarfinni atorfeqartut nalinginnaasumik kommunini qinikkatut pisortanut allaffimmiluunniit pisortanut toqqaannartumik qanittumilluunniit attaveqanngitsut kommunit ataatsimiititaliaani ataavartuni ilaasortaasinnaasarsimannngimmata. Taamaattumik ilanngussisoqarpoq qanoq ungasitsigisumiinneq killiliiffigineqartalissasoq, pingaartumik siunertaralugu inuit sulianut attuumassuteqarnertik pissutigalugu ataatsimiititaliani ilaasortaasinnaajunnaarsinneqarsinnaasut taamalu sularinneqataasinnaanngitsut, imaluunniit ataatsimiititaliami ilaasortaanerisa nassatarissappassuk ilaasortap pineqartup nammineq suliffigisaminut nakkutilliisooqataalernissaa. Pingaartumik sulisoq qulliunerusumik atorfeqarluni sulisuuppat nangaanartoqassaaq, marloqiusamimmi inissittoqartannginnissaa pillugu sianigisassat ilagaat immikkoortortaqarfimmi akisussaaffeqarluni sulisup ataatsimiititaliami aalajangeeqataasinnaasutut inissinnginnissaa, taamalillunilu ilaasortap suliassanut nammineq inassuteqataaffigisimasaminut aalajangeeqataasusaaajunnaarnissaa.

Nr.1-mi pineqarput ataatsimiititaliat ataavartut suliassaqarfini pisortat aamma sulisut atorfeqarnermi periaatsit malillugit, suliassat allattorsimaffiat imaluunniit oqartussaaffiit agguataarneqarnerat malillugit suliallit immikkoortortaqarfinni

pisortanut paarlattaasartussat. Immikkoortorta qarfinni pisortatut assersuutigineqarsinnaapput isumaginninnermi pisortat, atuarfiit pisortaat aamma kommuneingeniurrit. Nr. 2-mi inuit pineqartut naliliiffigineqassapput taakku suliaasa imarisaat tunngavigalugit. Kommunalbestyrelsit ataasiakkaat namminneq ingerlatsinertik qanoq aaqqissuutissallugu annertuunik periarfissaqartitaapput, tamakkununga ilanngullugit sulisuni sunik suliassaqaassanersut atorfirminnilu qanoq taaguuteqaassanersut, killiliiniarnermili atorfiit qanoq taaguuteqarneri kisimik pingaartinneqartussaannngillat. Pingaartinneqartariaqarput aaqqissugaanermi oqartussaaffiillu agguataarneqarneranni atorfiit imarisaasa nalunaarsorneqarneri il.il. tunngavigalugit pineqartut qanoq pisinnaatitaaffeqartigineri aalajangiutissallugit. Pingaaruteqarluinnarpoq atorfilik nalinginnaasumik pisortatut akisussaaffeqarnersoq namminerlu sulisunik siulersugaqarnersoq. Atorfiup aningaasarsiaqarnerup tungaatigut inissisimanera aamma aalajangeeqataasuusinnaavoq.

Sulisunut nr. 2-mi aalajangersakkat malillugit ataatsimiititaliani ataavartuni ilaasortaasinnaanngitsunut assersuutitut taaneqarsinnaapput allattoqarfinni pisortat, immikkoortorta qarfinni pisortat, allaffinni pisortat allallu immikkut sulisoqarnermut akisussaaffliit. Aamma sullissivinni pisortat allallu sullissivinni allaffissornikkut pisortatut suliaqartitat ataatsimiititaliani ataavartuni sullissivimmu akisussaasuni ilaasortaasinnaanngillat.

Imm. 3-mut:

Nr. 1-mi pineqarput sulisut tamarmik aningaasaqarnermut ataatsimiititaliap suliassaataanik, aningaasaqarnermut immikkoortoqarfiup, akissarsianut sulisoqarnermullu immikkoortoqarfiup suliassaataanik suliallit aningaasaqarnermut ataatsimiititaliamut ilaasortaasinnaatitaassussaannnginneri.

Nr. 2-mi pineqarput pingaartumik sulisut ingerlatsiviup ilaani, nr. 1-mut ilaanngikkaluartuni, aningaasaqarnermut ataatsimiititaliamit akisussaaffigineqartuniittut, assersuutigalugu inuit pilersaarusernermik suliallit aamma immikkoortoqarfinni aningaasaqarnermut ataatsimiititaliamit toqqaannartumik akisussaaffigineqanngikkaluarlutik tassunga attuumassuteqartuni, assersuutigalugu akileraaruserivimmi inunnillu allattuiffinni sulisut.

Nr. 3-mi immikkoortoqarfinni pisortat pineqartut, imm. 2-mi nr.1-imi pineqartut assignagit immikkoortoqarfimmi pisortamut paarlattaaginnartut aningaasaqarnermut ataatsimiititaliamut ilaasortaasinnaanerata akornutissaqartinneqanngilaq.

Imm. 4-mut

Aalajangersagaq inatsisimmi atuuttumi § 31, imm. 4-mik ingerlatitseqqinneruvoq, tamatumuuna inatsisitigut aalajangiunneqarluni aapparisaq pissutigalugu aalajangeeqataasinnaajunnaarneq atortuusassasoq tamatuma pisortat ingerlatsineranni suliat sularineqartarnerat pillugu inatsimmi aalajangersarneqarnerata kinguneranik. Aappariinnerni katissimanertut assersuunneqarsinnaasuni paasineqassaaq aappariinneq sivilisunerusumik ingerlanneqarsimasoq imaluunniit aappariit najugaqatigiippata.

§ 39-mut

Aalajangersagaq maannamut atuuttumi § 38-mut naapertuuppoq. Kommunini ukioq naatsorsuiffiusoq Namminersornerullutik Oqartussat ukiumoortumik naatsorsuiffiannut naapertuutiinnassaaq.

§ 40-mut

Aalajangersagaq maannamut atuuttumi § 39-mut naapertuuppoq.

Imm 1-mut:

Aalajangersakkakut aalajangerneqarpoq aningaasaqarnermut ataatsimiititaliaq pisussaasoq ukiumut naatsorsuiffiusussamut ukiunullu arlalinnut missingersuusiortassalluni. Ukiunut arlalinnut missingersuusiaq ukiunit pingasunit sivikinnerutinneqassanngilaq. Aalajangersakkakut siunertarinearpoq kommunip missingersuutunik suliaqartarnerinut atatillugit pilersaarusiortarnissat pingaaruteqassusiisa erseqqissisinnissaat.

Imm. 2-mut:

Aalajangersakkap erseqqissisippaa siunnersuummi § 43, imm. 2 peqatigalugu aningaasartuutit isertitallu suulluunniit missingersuusiortarneri akuerineqareersimassasut. Aalajangersakkakuttaaq kommuni pissussaaffilerneqarpoq aningaasanik tigorianaannagassanik aningaasallu oqimasaqatigiissinnerannut misingersuusiortarnissamut, tamatumalu kommunip aningaasanik tigorianaannarnik nalinginnaasumik aqutsineranut pingaaruteqaannarani aammattaaq kommuni pisussaaffilerpaa naalackersuinnikkut anguniagassanik aalajangiisarnissaanut, soorlu kommunimut akiligassat ikilisinniarneqarnerannut.

Imm. 3-mut:

Aalajangersakkakut kommuni aningaasartuutissatut isertitassatullu naatsorsuutigisaviit tunngavigalugit missingersuusiortarnissaminut pisussaaffilerneqarpoq. Taamaalilluni aalajangersagaq una malillugu kommuni inatsisinut naapertuutinngitsumik iliussaaq pisortat ikiorsiissutaannit aningaasartuutissat ikinaarlugit akileraarutigulluunniit isertitassat amerlanaarlugit missingersuusiortarnerinut, sinneqartooqqusinermit § 4-mi piumasarisaaq saneqqunniarlugu.

Kommunalbestyrelsit inatsisitigut pituttorsimanngitsuni aningaasaliissutissanik immikkoortitsissapput ukiup missingersuusiortarneri iluani qinikkat anguniagaannut tullerriaarnerinullu naleqquttumik, aammali saniatigut aningaasanik killiliillutik immikkoortitsisinnaapput ingerlatsinermit sanaartornermullu aningaasaliissutit iluanni imaluunniit ingerlatsinermit sanaartornermullu sillimmasersinnaallutik,

missingersuummut akuerisamut sanilliullugu aningaasartuutit isertitalluunniit naatsorsuutigeriinngisat sillimaffiginiarlugit.

Kommunip aningaasanik pisassai pillugit, pingaartumik akiligassalinnit, kommunalbestyrelsi piviusorsiorlumik naliliinissaminut taamaalilluni aamma pisussaaffeqalerpoq.

Imm. 4-mut:

Aalajangersakkakut aalajangerneqarpoq kommuni ingerlatsinermi aningaasanillu tigorianaannik amigartooruteqarsinnaanermut taamaallaat missingersuusiorsinnaasoq,

1. amigartoorutissaq immikkut taarsigassarsinani aningaasalersorneqarsinnaappat,
2. ukiup missingersuusiorfiup iluani tamarmi ilaannaaniluunniit taarsigassarsiaqarsimaneq pisinnaappat Naalakkersuisunit akuerineqarani imaluunniit,
3. missingersuut akuersissutigittinnagu taarsigassarsinissamik Naalakkersuisunit akuerineqareersimagaanni.

Naalakkersuisut siunnersuutigat aalajangersakkap attartornermut atornermullu isumaqatigiissutinik assngusunik ilaneqarnisaa.

Naalakkersuisut attartornermut atornermullu attartoriaaseq leasing atorlugu sukumiinerusumik aalajangersaanissamut, tak. § 44, attartornermut aamma leasing atorlugu attartoriaaseq aqqutigalugu isumaqatigiissusiormi ikinnerpaaffissaliinissat aalajangersarneqartassapput.

Imm. 5-imut:

Aalajangersagaq isigineqassaaq Namminersornerullutik Oqartussat kommunillu missingersuusiornermi periaatsinik il.il. erseqqissumik ilitsersuusiormissaminnik kissaataannut piviusunngortitsinertut.

Nakkutilliisuutit kommunit missingersuusiornerini sukumiisumik malitassiorsinnaatitaalernerannut atatillugu periarfissaqalerportaaq missingersuusiornermi maleruagassat pisarialimmik eqaallisinnissaannut, taamaalilluni inuiaqatigiit ineriartornerat malillugu naleqqussarneqarsinnaanngorlutik.

Aalajangersakkakut piumasarineqanngilaq Naalakkersuisut allaffeqarfialuunniit missingersuusiornermi ilitsersuutit allassagaat, soorlu imaalluarsinnaavoq kommunit kattuffiannit allanneqartut, kingornatigullu Naalakkersuisunit nalunaarusiornikkut atortussaatinneqalerlutik.

Aalajangersagaq maannamut atuuttumut § 40-mut naapertuuppoq.

Imm 1-mut:

Aalajangersagaq § 10-mut immikkut aalajangersagaavoq, tamatumuuna aalajangersarneqarmat suliaassap kommunalbestyrelsimi ataasiaannarlugu suliarineqarnissaa piumasarineqarluni. Ukiumut missingersuut aamma ukiumut arlalinnut missingersuusialq kommunip allaffissornikkut sulinissaanut toqqammaviuvoq, taamaattumillu pingaaruteqarpoq ukiumut missingesuutip sukumiisumik suliarineqartarnissaa.

Imm. 2-mut :

Aalajangersakkakut aalajangerneqarpoq kommunalebestyrelsip missingersuutit pillugit suleriaatsini nammineerluni pilersaarusiortassagaa, tamatumani ilaassallutik allangortitsinissanut siunnersuutit saqqummiunneqartarnissaanut periaatsit.

Naalackersuisulli nalinginnaasumik suleriaasissami aalajangersakkanik pineqartuni inatsisit atuuttut tunngavigalugit ilassuteqarsinnaapput, tassalu missingersuutit siullermeerilluni suliarineqarnerini nalinginnaasumik oqallisigineqartassat, aappassaaneerinninnermilu suliarinninnermi immikkoortukkuutaarilluni aningaasaliissuteqarnissami tulleriarinerit kommunalbestyrelsimi isummerfigigalugit oqallinneqartassasoq.

Avissaarsimatitsinerup tamatuma ingerlatiinnarnissaa kissaatiginarpoq, taamaaliornikkut ukiumut missingersuummut ilaasortat ataqatigiissumik isummersinnaalissammata aammalu pingaarnersiuisumik saqqummiussisoqarsinnaassammat, taamattaaq ukiumut arlalinnut missingersuusiamut tunngatillugu kommunalbestyrelsimi ilaasortat allat kissaataanut ilisimaneqalersunut isummersinnaalersillugit.

Kommunalbestyrelsi siullermeerinninnermi missingersuummi tunngavigisaasunik allangortitsinnaavoq, tamatumalu kinguneranik aningaasaqarnermut ataatsimiititaliaq aappassaaneerinninnissamut akiumut missingersuusiami nalimmassaasinnaassalluni.

Kommunalbestyrelsi suleriaatsimik aalajangersaasimangippat nalinginnaasumik suleriaaseq atorpeqassaaq.

Imm- 3-mut:

Aalajangersakkakut aalajangerneqarpoq ukiumut missingersuutip aalajangiiffiginissaata ullulernerqarnera.

Aalajangersakkap immikkoortuata aappaanni Naalackersuisut ukiumut missingersuutip akuersissutigineqarneranut atatillugu immikkoortiterinissamik aalajangersaasinnaaneritut aalajangersakkami aamma nakkutilliisutut taasat aalajangersakkanik suliaqarsinnaaneri nalunaarneqarpoq.

Aamma Naalackersuisut nalinginnaasumik ingerlatsinermi taasisarnerit tulleriiaarneqarnissaat pillugu malittarisassanik aalajangersaasinnaapput. Ukiumut missingersuummi immikkoortiterinissami malittarisassat aalajangiunneqarnerini Naalackersuisut § 40, imm. 2-mut aamma 4-mut pituttorsimapput, taamaalillunilu ukiumut missingersuut isertitanik, aningaasartuutitik aammalu aningaasaqarnikkut nikingassutitik imaqaassalluni. Tamatuma kingunerissavaa ukiumut missingersuut siunnersuutitut ataatsimoortutut taasissutigineqartussaassanngitsoq, tamannami nallersuutissammat aalajangersimasumik ingerlatsinermut aammalu aningaasat tigorianaat qanoq inissimanissaannik taasisoqarnera, tassa § 40, imm. 2 naapertorlugu ukiumut missingersuummut ilaangimmat, kisiannilu tamatuma kingunerilugu. Sinneqartoornissamik apeqqutip oqallisigineqarnera ukiumut missingersuutip siullermeerneqarnerani oqallisigissallugu pissusissamisoorpoq, tamannalu kommunalbestyrelsip kiffaangissuseqarluni iliuuseqarsinnaaneranut killiliisuvoq.

Ukiumut missingersuutip taarsigassarsinissamik ilaqarnissaanik, tamatumani kommunalbestyrelsip Naalackersuisunit akuersissummik siumoortumik tunniussaartoqarsimatinnagu aalajangiiffigisinnaanngisaanni, § 40, imm. 4-mi inerteqqutaaneraniq piunasaqaatip aamma kinguneraa aalajangiinissami periaaseq ima ingerlanneqassasoq: § 40, imm. 4 naapertorlugu aningaasartuutit imaluunniit ikinnerusunik isertitaqarnissap qaqugukkat aalajangernissaa kommunalbestyrelsimi ilaasortanit erseqqissumik ilisimaneqarnissaa.

Ukiumut missingersuutip qanoq assigiinngiaartigisunik amerlassusilersaonissaanut aalajangerneqarnerani ataatsimoortukkaartumik aningaasartuutitik isertitanillu missingersuusiisarnissamik aammalu ukiumut missingersuut qanoq annertutigisumik kontut immikkuutaartinneqarnissaannik imaqaarsinnaaneraniq aalajangersaasoqarsinnaavoq. Taakku periusitut killiunneqarnissaat nalinginnaasumik iliuuseqarnissamut kiffaangissuseqarnermik annikillisisinnaaneri pissutigalugit qanoq immikkoortukkaartigisumik qaffasiffilerneqarnerisa assigiinngippaallarnissaat naleqquttutut isigineqanngilaq.

Aalajangersagaq § 40, imm. 5 pillugu immikkut aalajangersakkatut aamma isigineqassaaq, aalajangersakkanillu siamasinnerusunik aalajangersaanissaq ukiunut missingersuusiorneq pillugu nalunaarusiornissami pissaaq.

Imm. 4-mut:

Aalajangersagaq Naalackersuisut nakkutilliisussaataanerisa kinguneraat.

§ 42-mut

Aalajangersagaq maannamut atuuttumut § 41-mut naapertuuppoq.

Imm 1-imut:

Aalajangersakkakut aalajangerneqarpoq ukiumoortumik missingersuusiap aamma ukiunut arlalinnut missinersuusiap akuerineqarnerisa kingorna kingusinnerpaamik ullut 7-t qaangiutsinnagit pisortatigoortumik saqqummiunneqassasoq. Aalajangersagaq kommunalbestyrelsip aalajangiisarnerisa avammut ammaannerunissaannut ilapittuutaassaaq.

Imm. 2-mut:

Aalajangersagaq qanimut oqartussaaqataanerup nukittorsarnissaanik siunertaqarpoq. Missinersuusiami paasissutissat qanoq imaqarnissaannik immikkut piunasaqaateqartoqanngilaq, taamaallaalli imarisaa ilisimatitsissutinik kikkunnut illersuinanilu akerliunngitsunik imaqassaaq. Ilisimatitsissutit kommunalbestyrelsimi ilaasortanit imaluunniit kommunalbestyrelsimi partiinit ilaasortaaffeqartunit qinikkatut nammineq ilaliussanik ilaqassanngillat, atuagassianik imaluunniit takussutissanik saaqummiinissaq kommunip suliassarinnngimmagu isummanik qinikkat nammineq isummersuutaannik imaqartunik ilaqassanngillat.

Missinersuummili ilisimatitsissutit aamma ukiunut tulliuttunut missingersuutinut ilisimatitsissutit saniatigut kommunip nalinginnaasumik suliaqarfiinik ilisimatitsissutinik imaqarsinnaavoq.

§ 43-mut

Aalajangersagaq maannamut atuuttumut § 42-mut naapertuuppoq.

Imm 1-imut:

Aalajangersakkakut aalajangerneqarpoq missingersuummut aalajangiiffigineqarsimasumut kommunalbestyrelsi pituttorneqartoq, taamaallunilu taamaallaat imm. 2 naapertorlugu aningaasartuutigineqarsinnaasoq imaluunniit isertitaqarfiusinnaasoq tamakku missingersuusiami ilaatinneqarsimappata.

Imm. 2-mut:

Aalajangersagaq aningaasalissuteqartarnissamut pisinnaatitaassutsip allanut tunniunneqarsinnaaneranut inerteqqutaavoq. Taamaattorli ajoqutissaqartinneqanngilaq aningaasaliissutaasut aalajangersimasut ilaannik kommunalbestyrelsi atuisinnaatitsinnaasoq aningaasaqarnermi ataatsimiititaliamit akuersisoqarsimatillugu.

Kommunalbestyrelsip missingersuummi nuussisoqarsinnaaneranik pisinnaatitsinnaanera immikkoortumi 1-imi pingaarnertut aalajangersakkami ilanngunneqarpoq.

Aalajangersakkami siunertaavoq missingersuusiami nuussiterisoqarsinnaanernik suleriaaseq eqaallisassallugu. Piunasaqaavorli aningaasaqarnermut ataatsimiititaliaq

ataatsimiititalianut attuumassuteqartunut kommunalbestyrelsip pisinnaatitaanera naapertorlugu apeqqutini isumaqatiginninniaqqaartassasoq, tak. § 29, imm. 2.

Kommunalbestyrelsip pisinnaatitsinerani erseqqissumik nalunaarneqassaaq suna pineqarneris, tassunga ilaallutik aningaasat amerlassusissaat killilerneqarsimanersaq, ataatsimiititat sorliit aningaasaliiffilluunniit sorliit pineqarneris. Taamaattorli periarfissaqanngilaq aningaasaqarnermut ataatsimiititaliaq pisinnaatissallugu ingerlatsinerimut aningaasaliissutinut sanaartornerimut aningaasaliissutinut, killormulluunniit, nuutsisinnaanermut.

Imm. 3-mut:

Ilassutinut aningaasaliissuteqarnerup aningaasalersornissaa aalajangiinermi imaqarniliami erseqqissumik nalunaarneqassaaq, tassanilu pineqarlutik aningaasartuutissatut isertitassatullu akuersissutinut, taamaalillunilu inatsisinik saneqqutsinerussalluni soorlu aningaasalersuinissamik apeqqutip ukiumut missingersuusiortimmut tullermut kinguartinnera imaluunniit aningaasalersuinissamik apeqqutip ukiup ilaani sipaarniuteqarfissatut pilersaarummut kinguartinneqarneranik aalajangerneq.

Missingersuuti akuersissutigineqarneranut atatillugu kommunalbestyrelsip nalunaarutigisimappagu suliaassat suut aningaasaliissutinut aalajangersimasunit matuneqassanersut, taava aningaasartuutissartalimmik aningaasaliissuteqarnermut atatillugu aningaasaliissutinut taakkununga taarsiullugu sipaarniutissani nalunaarneqassaaq, suliaassanut pilersaarutinut sunut allannguut sunniuteqassanersaq aamma ilanngullugu.

Immikkoortup aappaani erseqqissarneqarpoq missingersuusiortinermi piviusorsiornissamik piumasaqaat aammalu § 40, imm. 3-mi amigartooruteqartumik missingersuusiornissamut inerteqqut ilassuteqarluni aningaasaliissuteqarnermi atornerqartassasoq.

§ 44-mut

Siunnersuutip § 44-ata imaa § 43-mut maannamut atuuttuusumut naapertuuppoq.

Nr. 1-ip kommunip taarsigassarsisinnaaneranut il.il periarfissai aalajangersarpari. Siusinnerusukkat aqqissuussinermi aallaaviusimavoq kommunip taarsigassarsisinnaanermut il.il. periarfissaqartitaanngilluinnarnissaa, kisiannili nakkutilliisuutut oqartussat nalinginnaasumik immikkut akuersissuteqartarsimanerat siunertarineqartutut ingerlanngitsoq paasinarsisimavoq, nakkutilliisuutut oqartussanit akuerineqaaqaratik aningaaserivinni kontominnik tigusivallaartarsimasut aammalu Namminersornerullutik Oqartussat akiligassaannik uninngatitsisarnermikkut annikigisassaangitsunik akiligassaqalersimammata, taamatullu kommunit atuivallaanermikkut aningaasanik taarsiinnaajunnaarnissaannik pinngitsoortitsiniarneq ingerlanneqarsinnaanani.

Taamatut akiligassaqartalerit nakkutilliisutut oqartussat ingerlaavartumik kukkunersiuisarnermikkut aammalu aningaaserivinnut Namminersornerullutillu Oqartussanut taarsigassarsinissamut nutaanik isumaqatigiissusiortarnermikkut akueriinnartariaqartarsimavaat, kommunit pineqartut akiliisinnaajunnaarsinnaanerit pinngitsoortinniarlugu.

Ajornartorsiut kommuninut missingersuusiut pillugit aalajangersakkat tulluarnerusut atorlugit aammalu nakkutilliisut oqartussanut tulluarnerusunik pillaatissiisutissanik periarfissaqartitsilernikkut kommuninit aalajangersakkat akerlianik piaaralutik akiitsoqalersimasunut anigorniartariaqarpoq.

Taamattaq nammagassat suliassallu agguataarneqarnerisa eqaannerusumik aaqqinnerisigut ilaatigut kommunit periarfissarissaarnerulissapput aningaasartornarnerpaaffinni, tassa inunnik isumaginninnermi atuarfeqarnermilu, kiffartuussinerup pitsaassusissaa namminneq aalajangissallugu, ilaatigullu Namminersornerullutik Oqartussanut akiligassanut tunngatillugu maannakkut maleruagassanik allanik suliaqarnissamut, taakku aqutsinermi atorsinnaalluatuussapput pisariaqanngitsumik akiligassaqalernissaq pinngitsoorniarlugu.

Paasinarpoq kommunit taarsigassarsinnaanissaannut atatillugu sakkortuumik inatsisiliuussineq kommunit akiligassaqalertarnerannik unikaallatitsinaviangitsoq, akerlianilli allaffissornikkut aqukkuminaatsumik kommunit missingersuusiortarnerannut aammalu aningaasatigut aqutsinerannut atatillugu nakkutilliisutut oqartussat suliassinneqassapput aammalu naapertuutinngitsumik akisussaaqataatinneqalissallutik.

Taarsiullugu innersuussutigineqarpoq kommunit taarsigassarsinnaanerat Naalackersuisunit malittarisassiuunneqassasoq tamatumuunakkut ullumikkornit eqaannerusumik suleriaaseqartoqalersinnaaqullugu, tamatumuunakkullu Naalackersuisut periarfissaqarsinnaaqullugit inuiaqatigiinni aningaasarsiornikkut ineriartornermut naapertuuttumik kommunit taarsigassarsisarsinnaassasut.

Kommunit taarsigassarsinnaanerat assigalugu maannamut aqutsinissamut inatsisip atuuttup Inatsisartunit akuersissutigineratigut kommunit akiligassannut sillimmataasinnaaneranmut, aningaasanut akiligassanut aningaasaliisinnaanerminnik uppernarsaasiisinnaaneranmut aammalu akiligassanut allanut pisussaaffeqalersinnaanerannut, attartornernut aamma attartortitsinernut [tassa akilersillugu atukkiussinernut] aammalu akiligassanut allanut pisussaaffeqalersinnaanerannut, tamatumanilu aamma ataatsimoortumik nammaqatigiilluni akiligassaqalersinnaaneranut, kiisalu aamma inatsisitigut pituttugaanngitsunik aningaasatigut tapiissuteqarnissamik neriorsuinerni, assersuutigalugit inuutissarsiornermi siunertanut ineqarnermut akiliutinik annikillilerinernut, Naalackersuisut maleruqaqqusaliorsinnaanissaat matumani Inatsisartut pissusissamisoorsoorat.

Aalajangersakkalli siunnertarinngilaa aalajangersassallugu, suut nr. 2, 3 aamma 4-mi allassimasut naapertorlugit ikiorsiissutitut tapersissallugit, tamanna pillugu

kommunip inuussutissarsiornermut tunngatillugu akuusarnera tunngavigalugu immikkut inatsisitigut aalajangersagaqarmat.

Aalajangersakkat nr. 2, 3 aamma 4-mi aalajangerneqarsimasut taamaallaat iliuusaannut aamma taakkua annertussusaannut killiliisuussapput. Nalinginnaasumik akuersissutitut taamaattunut oqaatigineqassaaq pissutsit naapertorlugit Naalakkersuisut piumasaqaateqarsinnaapput, assersuutigalugu kommunip aningaasatigut aqutsineranut imaluunniit missingersuusiat aalajangersarneqarnerannut. Taamatut piumasaqaateqarsinnaanerup annerusumik siunertaraa inatsisitigut killissarititaasut aammalu missingersuutigisimanngisanik aningaasaqarnikkut kommunit akiligassaqalinnginnissaat sillimaffigereerniarlugu.

§ 45-mut

Aalajangersagaq imarisamigut maannamut atuuttumut § 44-mut naapertuuppoq.

Imm 1-mut:

Aalajangersakkakkut aalajangerneqarpoq kommunip naatsorsuutiminik allattuinermini aningaasaatimi qanoq aqunneqarnerinik piviusorsiortumik takusassiaqarnissaa. Naatsorsuutininik allattuineq piviusumik paasisutissiissaaq kommunalbestyrelsip aalajangiinerisa aamma kommunip ingerlatsineranik aammalu ukiumut missingersuutip akuersissutigineqarsimameranut tunngatillugu.

Imm.2-mut:

Aalajangersagaq innersuussivoq aningaasaateqarfiit aningaasaataannik inissiinissamik aalajangersakkanut, tak. Justitministeriap nalunaarutaa nr. 49, 15. marts 1987, allannngortinneqartoq nalunaarut nr. 144, 16. 1988-meersukkut aammalu nalunaarut nr. 294, 3. maj 1989-simeersukkut. Matumani Inatsisartut inatsisaanni siunniussimaneqannginnera pissutigalugu kommunip inuussutissarsiornermut aningaasaliinissaannut periarfissaqarnerisa aalajangersorneqarnissaanut tunngatillugu, kommunip aningaasaataanik inissiinissamik periarfissat obligationinut killilerneqarput, oqaatigineqassaarlu justitministeriap nalunaarutaani tamanna ilaatinneqanngimmat aningaasaateqarfiit aningaasaataannik obligationinut allannngortinneqarsinnaasunut tunngatillugu.

§ 46-mut

Aalajangersagaq maannamut atuuttumut § 45-mut naapertuuppoq.

Aalajangersakkakkut aalajangerneqarpoq § 47-mi aalajangersagaq peqatigalugu qanoq ililluni kommunip naatsorsuutai suliarineqartassasut akuersissutigineqartassasullu.

Imm. 1-mut:

Aningaasaqarnermut ataatsimiititaliaq kommunalbestyrelsimut naatsorsuutininik saqqummiussisuusassaaq. Naatsorsuutit kommunip aningaasaqarnikkut pisussaaffiininik aammalu missingersuutit aamma naatsorsuutini nikingassutinik oqaaseqaatinik nassuiaataasunik imaqtartassapput. Naatsorsuutit saqqummiunneqarnerini taamatuttaaq oqaaseqaatinik ilaqtartineqartassapput aningaasaqarnikkut iliuuserisat allat attuumassuteqartunik, ilaatigut kommunip aningaasaliissuteqarnissamut pilersaarutai aammalu ukiunut arlalinnut missingersuutit il.il. ilaatinneqassallutik, assersuutigalugu ukiunut arlalinnut sivissuseqartunik suliniutinik aammalu allanik siviisunerusumik suliassanut tunngassuteqartunik ilaqtartineqartarlutik.

Imm. 2-mut:

Aalajangersakkap erseqqissarpaa naatsorsuutit saqqummiunneqarnerani kommunalbestyrelsinik inissisimanera. Naatsorsuutit imm. 1 naapertorlugu aningaasaqarnermut ataatsimiititaliami saqqummiunneqartussaammata, taamaaliornikkut kommunalbestyrelsimi aalajangiinissamut periaatsit aqutigissanngilaat. Akerlianik kommunalbestyrelsinik taamaallaat isummerfigissavaa, kommunalbestyrelsinik kissaatigissappagu naatsorsuutini immikkoortut imaluunniit naatsorsuutininut kukkunersiorneqarnerannut atatillugu oqaaseqaatit, tamatumalu kingorna kukkunersiuisunut aammalu Naalakkersuisunut nassiunneqartassallutik.

Imm. 3-mut:

Aalajangersakkakkut aalajangerneqarpoq naatsorsuutit saqqummiunneqarneranut Naalakkersuisut sukumiinnerusumik aalajangersagaliortassasut ilaatigut naatsorsuutit saqqummiunneqarnissaanut killissarititaq ilanngullugu.

§ 47-mut

Imm 1-mut:

Aalajangersakkap erseqqissarpaa siusinnerusuummi aalajangersakkamut sanilliullugu, kommunalbestyrelsinik oqaaseqaatinut isummerlunilu naatsorsuutininut naggataarutaasumik akuersissasoq. Aalajangersagaq maannamut atuuttumut § 45, imm. 4-mut naapertuuppoq, ukiunut naatsorsuutininut kukkunersiuisut oqaaseqaataannut tunngatillugu.

Aalajangersagassatut siunnersuut malillugu kommunalbestyrelsinik kukkunersiuisut oqaaseqaataasa akineqarnissaa allaffeqarfimmut ataatsimiititalianulluunniit isumagisassanngortissinnaanngilaa.

Ukiup naatsorsuiffiup ingerlanerani kukkunersiueq pillugu § 48-mut, imm. 3-mut 5-imullu oqaaseqaatit innersuussutigineqarpput.

Imm. 2-mut:

Aalajangersagaq maannamut atuuttumut § 45, imm. 5-imut naapertuuppoq kukkunerisiuisut nalunaarutaat kommunalbestyrelsillu tassunga akissutaannut tunngatillugu. Kommunalbestyrelsip aalajangenera kukkunerisiuisullu oqaaseqaataat nakkutilliisutut oqartussanut nassiunneqartassapput, siunissami nakkutilliisutut oqartussat aamma Kommunit Nakkutilliisoqarfiata immikkoortinneqarnissaasa kingunerannik.

Imm. 3-mut:

Aalajangersagaq naatsorsuutit missingersuutitulli kommunip innuttaanit takuneqarsinnaanissaanut tunngatillugu maannamut § 42-mut atuuttumut naapertuuppoq.

Takuneqarsinnaanera arlalitsigut qulakkeerneqarsinnaavoq minnerpaamilli allagangorlugu takuneqarsinnaangorlugu kommunip allaffiani, kiffartuussiveqarfinni, nunaqarfinni allaffinni assigisaanilu saqqumitinneqartassaaq.

§ 48-mut

Aalajangersagaq maannamut atuuttumut § 46-mut naapertuuppoq.

Imm 1-mut:

Kukkunerisiuisunut immikkut piumasaqartoqanngilaq taamaallaalli naalagaaffimmit Naalakkeruisuniillu akuerisaasimassapput. Siunissami kommuninngortussat angissusaat naapertorlugit Naalakkersuisut isumaqarput kukkunerisiuisut sulinerannut annertunerusumik piumasaqaateqartoqassasoq siunnersuutigalugulu siunissami kukkunerisiuisartunit naalagaaffimmit akuerisaasunit taamaallaat inatsisit malillugit kommunini naatsorsuutit kukkunerisiorneqartalissasut. Kukkunerisiuisut sulinerminni nakkutigissavaat kommunip aalajangernerinut akisussaaqataalinnginnissartik. Kukkunerisiuisut naalagaaffimmit akuerisaanissaannik piumasaqarneq aatsaat atuutilissaaq 1. januar 2012, tak. § 72, imm. 3.

Imm. 2-mut:

Kommunip kukkunerisiuisuisa akisussaaffigaat misissussallugu nalinginnaasumik aamma immikkut naatsorsuineranut kukkunerisiuinernullu aalajangersakkat malinneqarnersut.

Imm. 3-mut:

Aalajangersakkap kukkunerisiuisut naalagaaffimmit akuerisaasut nalunaaruteqaqqaaratik karsi misissussallugu aammalu kommunip naatsorsuuserinikkut ingerlatsinera sukumiisumik misissussallugu aammalu misissuinermini periaatsini kommunip atulersimasaani suleriaatsip eqqortup qulakkeerneqarnissaa anguniassallugu.

Imm. 4-mut:

Aalajangersakkakut ersseqqissarneqarpoq kommunalbestyrelsi kukkundersiuisunut paasisitsinissamik pisussaaffeqaannangitsoq aammali uppersaanissamik pisussaaffeqartoq. Kingulliullugu taaneqartumi kukkundersiuisut namminneerlutik uppersaatissanik ujaasisarnissaannut pingaaruteqarpoq. Paasisutissat pisariaqartut tassaasinnaapput naatsorsuutiniq allattuinermi ilanngussat imaluunniit angalanerni aningaasartuutit.

Imm. 5-mut:

Aalajangersakkakut erseqqissisinnearpoq kukkundersiuinermi oqaaseqaatit kukkundersiuineranut ingerlaavartunut atatillugu tunniunneqarsimasut ukiumut naatsorsuutit kukkundersiorneqarneranni oqaaseqaatit suliarineqartassasut.

§ 49-imut

Imm 1-mut:

Aalajangersagaq maannamut atuuttumut § 47-mut naapertuuppoq.

Kommunimi nakkutilliinnermut tunngatillugu kasse og regnskabsregulativimut malitsitsinermut apeqqummut ilaanngilaq kisiannili malinninnginneq kukkundersiuisut oqaaseqaateqarnerannik kinguneqarsinnaalluni, tamatumunngalu nakkutilliisuutitanit oqartussanit malersorneqarsinnaalluni, imaammat kommunalbestyrelsi kukkundersiuisut oqaaseqaataannik inatsit naapertorlugu malitsitsinissaminik pisussaataamma tak. § 48, imm. 1 aamma 2, aammalu imm. 5.

Imm. 2-mut:

Aalajangersagaq maannamut atuuttumut § 48-mut naapertuuppoq, siunertaralugulu qulakkiissallugu kommunit kontolersuinerinut, naatsorsuutit saqqummiunneqarnerinut aammalu kukkundersiuisut suleriaasaannut aalajangersakkanik assigiiartunik suliaqartoqarsinnaasoq. Assigiiartumik aalajangersagaqarnerup siunertaraa minnerunngitsumik qulakkiissallugu assersuunneqarsinnaasunik aningaasaqarnikkut pissutsinik paasisutissanik tunniussisoqarsinnaaqullugu, kommunit suliaasa ingerlanneranut atatillugu. Taamaattut aalajangersakkat pingaarutillit ilaat missingersuusiordermi aamma naatsorsuusiordermi periaatsini pioreersumi nassaassaareerput, maanna Kanukoka-p Namminersornerullutik Oqartussat sinnerlugit aqutaanni. Pisortatigoortumik nalunaarut aqutigalugu aalajangersakkami malittarisassat kommunit saneqqunneqarsinnaajunnaassapput, taamattaq aalajangersakkat assersuutigalugu piffissamik killiliinernik ilassuteqartinneqarsinnaapput.

§ 50-imut

Imm 1-mut:

Aalajangersagaq maannamut atuuttumut § 49, imm. 1-mut naapertuuppoq, taamaattorli ilassutigalugu nunaqarfiit amerlanerusulluunnit nunaqarfimmi aqutsisunik kattussisinnaaneq siunnersuutaalluni. Aammattaaq Naalakkersuisut siunnersuutigaat nunaqarfiit sorliit ataatsimut nunaqarfimmi aqutsisoqassasut kommunalbestyrelsip aalajangissagaa. Nunaqarfiit sorliit ataatsimoorussamik nunaqarfimmi aqutsisoqassanersut kommunalbestyrelsip

nammineerluni aalajangissavaa, taamatuttaaq kommunimi nunaqarfinni siulersuisut 3-nik imaluunniit 5-nik ilaasortaqaassanerinik aalajangernissaq ammatinneqartoq.

Imm. 2-mut:

Aalajangersagaq nutaajuvoq ilanngunneqarnissaalu siunnersuutigineqarpoq nunaqarfiit amerlasuunik innuttaqartut imaluunniit avinngarusimasuniittut immikkut akuersissuteqarfigineqarsinnaasut ataatsimoorussamik nunaqarfinni aqutsisoqarnermut tunngatillugu. Immikkut akuersissut kommunalbestyrelsimit Naalakkersuisunut qinnuteqareernikkut tunniunneqartassaaq, Naalakkersuisut piunasaqaatit naammassineqarsimasutut isumaqarfigippatigit.

Imm. 3-mut:

Siunertaqarsorinanngilaq nunaqarfiit aqutsisuisa siulittaasuannik qinersinermi sukumiisunik periaaseqartoqarnissaa, tamatumani qinersinermi nunaqarfiit aqutsisuisa ilaasortaasa ikinneri pissutigalugit borgmesterimut qinersinermi pingaartorsiorpalunnginnerusumik ingerlanneqarsinnaassammat.

Nunaqarfiit aqutsisuiunut kikkut qinerneqarsinnaanerinik aalajangersakkat immikkut qinersinermi inatsisikkut aalajangersarneqarput.

Imm. 4-mut:

Aalajangersagaq maanna Inatsisartut inatsisaanni atuuttumi § 3, imm. 1-mut naapertuuppoq. Inatsisissatut siunnersuummi nunaqarfinni siulersuisut kommunalbestyrelsimit pisinnaatitsineq naapertorlugu sulisarnissaasa erseqqissarneqarnissaa Nasalakkersuisunit pingaartinneqarpoq. Taamaattumik Naalakkersuisut siunnersuutigaat nunaqarfiit aqutsisui pillugit aalajangersakkat Inatsisartut inatsisaanni immikkut kapitalimi katersorneqassasut.

Aalajangersagarli kommunalbestyrelsip qanoq atsigisumik pisinnaatitsisinnaaneranut tunngassuteqartuni nalornissutigineqarsimavoq. Pingaartumik nalornissutigineqarsimavoq kommunalbestyrelsi aningaasaliissutinik qanoq amerlatigisunik atuinissamik nunaqarfinnut pisinnaatitsisinnaanersoq. Tamatuma kingunerisaanik nunaqarfinni siulersuisut pisinnaatitsissummik tunineqarpata kommunalbestyrelsip allaffissornikkut nukissat nunaqarfiit aqutsisuiunut qulakkeertussaavai, kommunalbestyrelsip nunaqarfinni siulersuisunik nakkutilliisussaataitanera pissutigalugu. Kommunalbestyrelsi nunaqarfinni

siulersuisunut aalajangiisinnaanermik tunniussaartoq allaffissornikkut suliassanik naammassinnaanermik qulakkeerinnissimangitsoq siunnersuummi kapitali 9 naapertorlugu akisussaatinneqarsinnaavoq.

§ 51-imut

Aalajangersagaq maannamut atuuttumut § 50-imut naapertuuppoq.

Imm. 1-mut:

Aalajangersagaq suleriaasissamut minnerpaanik piunasaqaatinik arlalinnik saneqqunneqarsinnaanngitsunik atuutilersitaqarpoq.

Tunnngaviumik ingerlatsinikkut malitsitsinermi periaatsit pineqartut tassaapput ingerlatsinermi inatsisip piunasaqaatai naapertorlugit suliat.

Kommunalbestyrelsimi sulinertut nunaqarfinni siulersuisut atuunnerat pillugu periaatsinik aalajangersakkanik sukumiisunik atuutitsisoqarnissaa tulluurtuusorinanngilaq. Aalajangersagaq aamma periarfissiivoq nunaqarfimmit nunaqarfimmut pissutsit assigiinngiaartorujussuusut kommunalbestyrelsit pitsaanagerusumik sillimaffigisinnaalernissaannut. Nunaqarfinni siulersuisut suleriaasissaasa aalajangersarneqarnerat kommunalbestyrelsimi suliarineqassaaq, takussutissaassallunilu nunaqarfiit annertunerusumik aalajangiisinnaanermik pisinnaatinneqarnerinik, taamaattumillu allaffissornikkut suleriaatsinik erseqqissunik nunaqarfinni siulersuisut sulinerannut aalajangersagaqarnissaq pingaaruteqarpoq, aalajangersakkanut kommunalbestyrelsip nammineerluni periaasiinut ataqatigiissaarneqarsimasunik.

Nunaqarfinni siulersuisut suleriaasissaasa aalajangersarneqarnerannut atatillugu nunaqarfinni siulersuisut tusarniaafigineqarsimasariaqarput, tak. § 52. Nunaqarfinni siulersuisuni ilaasortat akissasiaqartinneqarnerat § 55 naapertorlugu ingerlanneqartassaaq.

Imm. 2-mut:

Aalajangersagaq nalinginnaasumik aalajangeeqataasinnaanermut aalajangersagaavoq, ilanngunneqarlunilu nunaqarfinni siulersuisut annertunerusumik pisinnaatinneqarnissaannik ilimasuuteqarnerup kingunerisaanik.

Aalajangersakkakkut aammattaaq erseqqissarneqarpoq Naalackersuisut kommunini arlalinni allaffinni allaffissornikkut ikiortit nunaqarfinni siulersuisunut aamma ilaasortaasunut ajornartorsiuteqartarneq pillugu apeqqutilliisoqartarsimammat.

Imm. 3-mut:

Aalajangersagaq imaqarpoq kommunalbestyrelsimi ataatsimiititaliani ikinnerussuteqartut pisinnaatitaaffii pillugit nunaqarfinni siulersuisuni ilaasortanut aamma atuutinneqarnissaanik qulakkeerinnimmat, tak. § 30.

Aalajangersagaq taamaallaat atuuppoq suliassani nunaqarfinni siulersuisunut aalajangiisinnaanermik oqartussaafilerneqarsimasuni. Suliassani nunaqarfinni siulersuisut siunnersuutip § 52-a naapertorlugu, kinguliiniittut tak., kommunalbestyrelsimut innersuussummik imaluunniit tassunga oqaaseqaateqartoqartillugu, nunaqarfinni siulersuisuni ikinnerussuteqartut ikinnerussuteqarluni oqaaseqaammik imaqaarniliamut ilanngusisinnaatitaaneq atorsinnaavaat.

§ 52-imut

Aalajangersagaq maannamut atuuttumut § 51-imut naapertuuppoq.

Aalajangersakkakut aalajangersarneqarpoq nunaqarfinni siulersuisut nunaqarfimmi pissutsinut attuumassuteqartuni kommunalbestyrelsimut innersuussutinik nassitsisinnaatitaaffeqaarnerinik. Aammattaaq aalajangersakkap kommunalbestyrelsi pisussaaffilerpaa kommunalbestyrelsimi suliassani nunaqarfinni pissutsinut attuumassuteqartuni suliaqarnerni nunaqarfinni siulersuisut tusarniaavigineqartarnissaannik.

§ 53-imut

Aalajangersagaq maannamut atuuttumut § 52-imut naapertuuppoq.

Imm. 1-imut:

Aalajangersakkakut aalajangerneqarpoq nunaqarfinni siulersuisut aatsaat aningaasartuuteqarsinnaasut kommunalbestyrelsip aningaasaliissuteqareerneratigut. Aalajangersagaq § 43, imm. 2-mut attuumassuteqarpoq kommunalbestyrelsimi aningaasaliisinnaanermut pisinnaatitaaffimmik aalajangersaasumik.

Taamaalilluni kommunalbestyrelsit nunaqarfinni siulersuisunut aningaasaliisinnaanngillat pisinnaatitsissutip imm. 3 naapertorlugu tunniunneqarsimasut avataasigut.

Imm.2-mut:

Aalajangersakkap siullertut nalunaarpaa, kommunip missingersuusiaatigut nunaqarfinni siulersuisut ingerlatsinikkut aningaasaliiffigineqarsinnaasut. Aalajangersakkap aappaattut nalunaarpaa aningaasaliissutaasunik nunaqarfinni siulersuisut atuisinnaatitaanerat.

Aalajangersakkalli nalunaanngilaa nunaqarfinni siulersuisuni allaffissornikkut pisinnaassuseq qanoq annertutigissanersoq, tamanna aalajangerneqassammat § 50, imm. 4 aallaavigalugu.

Illuatigulli atuisinnaatitaaneq pisariaqartitsivoq, soorlu imm.1 naapertorlugu ingerlaannartumik aalajangiisinnaanermik pisinnaatitsinerup kingunerissagaa atuisinnaatitsineq pissasoq aningaasaliissutaasutut killigititaasut iluanni.

Taamaalilluni massakktulli nunaqarfiit siulersuisuinut aalajangiisinnaatitaanermik tunniussisoqarsinnaavoq aningaasaqarnikkut akisussaaffeqarnermik malitseqanngikkaluartumik. Nunaqarfinni siulersuisut aningaasaliissutit atorneqarsinnaatitaasut nungullugit atorsimalerpatigit, aalajangiisinnaassuseq aningaasaliissutaasunut taakkununga attuumassuteqartoq taamaalilluni aamma atortussaajunnaassaaq. Kommunalbestyrelsili, soorlu nalunaarneqartutut iliuuseqarsinnaassusermik annertunerusumik imm. 2 naapertorlugu aningaasatigut pisinnaatitsineq qaangerlugu tunniussinnaassavaa imaluunniit aningaasanik atorneqarsinnaasunik amerlanerusunik ilassutit aningaasaliissuteqarsinnaalluni. Tamannali qaqutiguinnaq pisinnaasariaqarpoq, siunertaammat aningaasanik atuisinnaasunik illikartitsinerup nunaqarfinnut allaffissornikkut oqilisaassutaanissaa killiliilluni aqutsinerup atulerneratigut. Killiliilluni aqutseriaatsimut akerliussaaq aqutsinikkut ingerlanerliorneq pissutigalugu aalajangiisinnaassusermik tunniussinikkut ingerlanerliorneq "nersorniarneqassappat". Aningaasat atorneqarsinnaatitaasut ingerlatsinerliorneq pissutigalugu nungunneqarpata tamatigut kingunerisariaqarjaa ilassutissanik aningaasaliissuteqaqqittoqannginnera aammalu ilassutaasumik aalajangiisinnaassusermik tunniussisoqaqqinnginnera. Aningaasaliissutit killingi tikillugit atuneq pisassaaq pineqartumik inatsisiliornermi killiliunneqartut iluanni. Tamatumani pingaaruteqarput kultureqarnermut aamma qaammarsaanerup kiisalu isumaginninnerup tungaatigut attuumassuteqartuni aningaasanik atuisinnaatitsissutissanik illuatitsisarnerit.

Imm. 3-mut:

Aalajangersakkap siunertaraa nunaqarfinni siulersuisut suliaannik kommunalbestyrelsip ilisimasaqarnissaa qulakkiissallugu. Nunaqarfinni siulersuisut suleriaasissaanni ilassutaasunik ilanngusisoqarsinnaassaaq uppersaait misissorneqartarneranni iliusissanik annertunerusunik, aamma imm. 2 naapertorlugu taaneqartuni nunaqarfik aningaasatigut piginnaatinneqarsimanngikkaluartoq.

§ 54-imut

Imm. 1-imut:

Aalajangersagaq maannamut atuuttumut § 53-imut naapertuuppoq, nunaqarfinni siulersuisut siulittaasuat tassaasoq nunaqarfinni siulersuisut ingerlatsinerannut akisussaasoq. Inatsimmi innersuussutigineqarput inatsimmi matumani malittarisassat aammalu pisortat ingerlatsineranni sulat suliarineqartarnerat pillugu Inatsisartut

inatsisaannut aammalu pisortat ingerlataanni ammasumik ingerlatseriaaseqarneq pillugu inatsit.

Aalajangersakkap aamma kingunerissavaa nunaqarfinni siulersuisut siulittaasuata kommunalbestyrelsimut attaveqaatit atuuuaannartussaana.

Imm. 2-mut:

Aalajangersagaq nutaajuvoq ilanngunneqarnissaalu siunnersuutigineqarluni erseqqissarniarlugu kommunalbestyrelsi nunaqarfinni siulersuisunik nakkutilliisuusassaasoq. Massakkumut nakkutilliisuutitatu oqartussat nunaqarfinni siulersuisunik toqqaannartumik nakkutilliinissaminnik periarfissaqassanngillat kisiannili nakkutilliineq kommunalbestyrelsi aqqutigalugu ingerlattussaallugu. Naalackersuisut nunaqarfinni siulersuisut suliaannik paasisaqarusullutik kissaateqarpata tamanna kommunalbestyrelsi aqqutigalugu pisassaaq. Kommunalbestyrelsi nunaqarfinni siulersuisunut pisinnaatitsisuuvoq, kisiannili taamaaliornikkut suliat, aningaasaliissutit aamma pisinnaatitsissutit naapertorlugit ingerlanneqarnerannik akisussaaffimmik tunussisinnaanngilaq.

§ 55-imut

Imm. 1-imut:

Aalajangersagaq maannamut atuuuut § 17, imm. 1-imut naapertuuppoq, nunaqarfinni siulersuisut akissarsiaqartinneqarneri pineqartillugit.

Naalackersuisut aalajangersakkami siunnersuutigaat kommunalbestyrelsini ilaasortat akissarsiaqartinneqartut pillugu aalajangersakkamiit aalajangersagaq avissaartinneqassasoq, taamaaliornikkut ersarissarniarlugu nunaqarfinni siulersuisut kommunalbestyrelsip akisussaaffigaat.

Imm. 2-mut:

Aalajangersagaq maannamut atuuuut § 17, imm. 2 naapertuuttumik nunaqarfinni siulersuisut ilassutinik akissarsiaqartissinnaasariaqarput. Ilassutit akissarsiat kommunalbestyrelsimut akuerineqartut ataasiakkaat nalilersuiffigereernerisigut tunniunneqarsinnaapput. Naliliinerni siulittaasup akisussaaffia aamma suliaqarnikkut nammatai immikkut isiginiarneqartassapput.

Imm. 3-imut:

Naartunermi, erninermi meeravissiartaarnermilu inatsit tamatumunnga tunngasoq naapertorlugi nunaqarfinni siulersuisut sulinnigiffeqarnissamut pisinnaatitaapput akissarsiaminnik annaasaqaratik. Tamanna Inatsisartut Aaqqissuusseqqinneq pillugu Ataatsimiititaliaata kissaataa malillugu ilanngunneqarsimavoq.

§ 56-imut

Imm. 1-imut:

Aalajangersakkap maannamut inatsisartut inatsisaanni § 54, imm.1 taarserpaa.

Inatsisissatut siunnersuut manna naapertorlugu Naalackersuisut kommunit ingerlatsinerinik nalinginnaasumik nakkutilliisuussapput. Naalackersuisut kommuninik aqutsinermi malittarisassanik tiguisartussaapput, tak. § 1, imm. 4, kommunalbestyrelsip qaqugukkut sumilu ataatsimiinnissaanik ilisimatinneqartassallutik, tak. § 8, imm. 1 aamma 3, kommunalbestyrelsip matoqqasumik ataatsimiinnerani peqataatitaqarsinnaallutik tak. § 9, imm. 4, aamma Naalackersuisut kommunalbestyrelsit ataatsimiinnerannit imaqarnilianik tigusaqartartussaapput tak. § 16, imm. 3, kiisalu Naalackersuisut ilisimatinneqartassapput kukkunerisuisut nalunaarutaannut akissuteqaaatit pillugit, tak. §§ 46 imm. 2 aamma 47, imm.2.

Imm.2-mut:

Aalajangersagaq nutaajuvoq, ilanngunneqarnissaa siunnersuutigineqarpoq immikkut naammagittaalliornissamut periarfissaqartoqarnera erseqqissarniarlugu imaluunniit suliani aalajangersimasuni nakkutilliinermik oqartussaqaqarfeqartoqartillugu Naalackersuisut pineqartuni nakkutilliisuusinnaassanngitsut. Assersuutigalugu taaneqarsinnaavoq inunnik isumaginninnermi inatsit naapertorlugu Isumaginninnermi sulianut Naammagittaalliuuteqartarfimmi aalajangiiffiusimasumi naammagittaalliuutigineqarsimasut taamaalilluni nakkutilliisuutitatus oqartussaasunut anngunneqarsinnaasarnatik.

Imm. 3-mut:

Aalajangersagaq nutaajuvoq, ilanngunneqarnissaa siunnersuutigineqarpoq Naalackersuisut nakkutilliisussaataitanerata atorfinitsitsinermi malittarisassat pineqartillugit atuutinnginnera erseqqissarniarlugu.. Apeqqutit atorfinitsitsinermi malittarisassanut tunngasut pineqartillugit tamakku atorfinitsitsisarnernik isumaginnittunut innersuunneqartassapput.

§ 57-imut

Imm. 1-imut:

Aalajangersagaq nutaajuvoq, siunnersuutaallunilu ilanngunneqassasoq Naalackersuisut nakkutilliinerannut atatillugu atortut kommunalbestyrelsimit piumasarineqartut pinngitsoorani tunniunneqartartussaananerata erseqqissarniarlugu. Kommunalbestyrelsi aamma pisussaavoq nakkutilliisuutitatus oqartussanut uppersaarnaatit piumasarineqartut tamaasa tunniuttassallugit, pineqartut qanorluunniit ilusilerlugit saqqummiunneqaralarpata.

Imm. 2-mut:

Aalajangersagaq nutaajuvoq, siunnersuutaallunilu ilanngunneqassasoq kommunit aningaasaqarnikkut ingerlatsinerini immikkut pisoqartillugu Naalackersuisut misissuinissaaminnut periarfissaqaqqullugit.

Imm. 3-mut:

Aalajangersagaq nutaajuvoq, siunnersuutaallunilu ilanngunneqassasoq sulianik pilertornerusumik Naalackersuisut Kommunit Nakkutilliisoqarfiannut apuussisinnaanerat periarfissaqaqqullugu, piffissaliussap kissaatigineqartup iluani Naalackersuisut nakkutilliinermut atatillugu uppersaatinik tigusaqarqarsimatinnagit. Piffissamik aalajangiineq pisut ataasiakkaat naapertorlugit ingerlanneqartassaaq aammalu suliap qanoq paasiuminartiginera sumiiffimmilu sumi inissisimanera apeqqutaatillugit.

Imm. 4-mut:

Aalajangersagaq nutaajuvoq, siunnersuutaallunilu ilanngunneqassasoq kommunalbestyrelsip suliamik paasissutissiineranut atatillugu sulinerup iluani pappilissat, sulinerup iluani pappilissatut inissisimaneri innarlingikkaluarlugit Naalackersuisunut tunniunneqarsinnaaniassammata.

Imm. 5-imut:

Aalajangersagaq nutaajuvoq, siunnersuutaallunilu ilanngunneqassasoq nakkutilliinermut atatillugu Naalackersuisut suliaqarneranni atugassarititanik pitsaanerpaaniik qulakkeerinnittoqaqqullugu. Aalajangersakkap qulakkiissavaa nakkutilliinermi suliamut imaluunniit suliarineqarusuttumut tunngasuni ilisimasaqassutsip aammalu suliami paasissutissat eqqortut paasissutissiissutigineqarsinnaaqqullugit.

Nakkutilliisutut oqartussat assersuutigalugu akileraartarnermi paasissutissanik oqartussanit attuumassuteqartunit piunasaqartarsinnaassapput.

§ 58-imut

Aalajangersagaq nutaajuvoq, siunnersuutaallunilu ilanngunneqassasoq Naalackersuisut nalinginnaasumik nakkutilliisuusuunermik suliaqarnerat erseqqissarniarlugu, taamaalillunilu taamaallaat suliap suussusia naapertorlugu Kommunit Nakkutilliisoqarfiannut anngunneqarnissaa aalajangersinnaallugu pineqaatissiisoqarnissamik isumaliuteqarnissaq siunertarlugu.

§ 59-imut

Aalajangersagaq maannamut atuuttumut § 55-imut naapertuuppoq.

Imm. 1-imut:

Aalajangersakkakut aalajangerneqarpoq Kommunit Nakkutilliisoqarfiata katiterneqarnerata qulakkiissagaa ingerlaavartumik sulinerup Naalakkersuisunut Inatsisartunullu annertuumik attuumassuteqannginnissaa.

Imm. 2-mut:

Nalinginnaasumik nalunaarneqarpoq ilaasortap peqataasinnaannginnerani sinniisussap aggersarsinnaaneraniq periarfissaqarnera aammattaaq aalajangeeqataasinnaannginnermi sinniisussap aggersarneqarsinnaanera. Sinniisussat toqqarneqarnerini imm. 1-imi pineqartuni oqaasissaqartitaasut aamma ilaasortanik nalinginnaasunik toqqaasuusut toqqaasuussassapput.

§ 60-imut

Aalajangersagaq maannamut atuuttumut § 56-imut naapertuuppoq.

Imm. 1-imut:

Aalajangersakkakut aalajangerneqarpoq minnerpaamik ukiumut ataasiarluni ataatsimiittoqartassasoq. Aalajangersakkakut aamma aalajangiunneqarpoq Kommunit Nakkutilliisoqarfiat ataatsimiissinnaasoq siulittaasup imaluunniit ilaasortat pingasut tamanna pisariaqartippassuk, taamaattorli minnerpaamik ukiumut ataasiarluni. Siulittaasooq ataatsimiigiaqqusisussaataavoq, tak, imm. 2, taamaalillunilu aamma ilaasortat pingasut piimasaqarneritigut ataatsimiigiaqqusisussaataalluni.

Imm. 2-mut:

Siulittaasooq ataatsimiinnernut aggersaasussaataavoq aammalu piffissamik sumilu ataatsimiittoqarnissaanik aalajangiisussaalluni.

Imm. 3-mut:

Aalajangersakkakut aalajangersarneqarpoq siulittaasooq pisussaasoq ataatsimiinnermi suut suliarineqassaneriniq Kommunit Nakkutilliisoqarfiata ilaasortai ilisimatissallugit aammalu paasissutissat suliassanut attuumassutillit nassiussorneqarnissaat isumagissallugu.

Imm. 4-mut:

Kommunit Nakkutilliisoqarfiata siulittaasuata ataatsimiinnermi aalajangernerit imaqarniliorneqarnissaat pisussaaffigaaq ataatsimiinnerit tamarmik naammassinerisa kinguninnguagut erngertumik ilaasortanik peqataasunit atsiorneqartartussamik. Kommunit Nakkutilliisoqarfianni ilaasortaq kinaluunniit imaqarniliamut

allaanerusumik isumaqarnerminik ilanngusisinnaatitaavoq, soorlu kommunalbestyrelsimi ilaasortat pisinnaatitaaffiat § 16, imm.1 naapertorlugu.

§ 61-imut

Aalajangersagaq maannamut atuuttumut § 57-imut naapertuuppoq.

Imm. 1-imut:

Aalajangersakkakut aalajangerneqarpoq Kommunit Nakkutilliisoqarfiat aalajangiisinnaassuseqartoq, Nakkutilliisoqarfiup siulittaasua aammalu minnerpaamik ilaasortat marluk najuuppata.

Imm. 2-mut:

Aalajangersakkakut aalajangerneqarpoq aalajangernerit amerlanerussuteqarnikkut pisassasut. Aamma aalajangersakkakut aalajangerneqarpoq taasinerni naligiittoqartillugu siulittaasup taasina aalajangiisuusassasoq.

Aalajangersakkakuttaaq aalajangerneqarpoq Nakkutilliisoqarfiup ilaasortaata kialuunniit aalajangerniarnerup ingerlanneqarnera unitsissinnaagaa suliaq Naalackersuisunut tamarmiusumut aalajangigassanngoqqullugu piumasaqarnermigut.

Imm. 3-mut:

Aalajangersakkakut erseqqissarneqarpoq kommunimi kommunalbestyrelsimut ilaasortaaffigisami pissutsit Nakkutilliisoqarfimmi oqaluuserineqartillugit tamanna aalajangeeqataasinnaajunnaarnermik kinguneqartassasoq.

§ 62-imut

Aalajangersagaq maannamut atuuttumut § 58-imut naapertuuppoq.

Imm. 1-imut:

Aalajangersakkap Nakkutilliisoqarfiup siulittaasua suliarineqartuni apeqquserneqarsinnaanngitsuni suliarineqartunilu kinguartinneqarsinnaanngitsuni aalajangiisinnaanngorlugu pisinnaatippa.

Aammattaaq aalajangersarneqarpoq Nakkutilliisoqarfiup siulittaasuata Nakkutilliisoqarfiup aalajangigaasa piviusunngortinneqartarnissaat akisussaaffigaa.

Imm. 2-mut:

Nakkutilliisoqarfiup siulittaasuata aalajangigai Nakkutilliisoqarfiup ataatsimiinnerani tulliuuttumi saqqummiunneqartassapput.

Imm. 3-mut: Aalajangersakkami allanneqarpoq Nakkutilliisoqarfiup allattoqarfia Naalackersuisunit toqqakkanik inuttaqartinneqassasoq, taamaattorli Naalackersuisut allaffissorneranni ilaatinneqarnissaat pisariaqanngitsoq.

Allattoqarfiup sulinermini Naalackersuisunut pituttorsimanninnissaa naatsorsuutigineqarpoq, taamaalillunilu Nakkutilliisoqarfiup siulittaasuanut taamaallaat attuumassuteqarluni aammalu ingerlatsinermi aalajangersakkat nalinginnaasut tunngavigalugit suliassani ataasiakkaani suliassallu aalajangersimasut ilaanni allattoqarfik sinnerluni aalajangiisinnaanngorlugu kissaateqartarsinnaalluni..

§ 63-imut

Aalajangersagaq maannamut atuuttumut § 60-imut naapertuuppoq, aalajangersarlugulu Nakkutilliisoqarfiup sulinerani aningaasartuutit landskarsimit akilerneqartassasut.

§ 64-imut

Aalajangersagaq maannamut atuuttumut § 61, imm. 1 aamma 2-mut naapertuuppoq.

Imm. 1-imut:

Aalajangersakkap naqissuserpaa, kommunalbestyrelsip, aningaasaqarnermi ataatsimiititaliap imaluunniit taakkua ilaasortaannit imaluunniit ataatsimiititaliap ataavartup, imaluunniit taassuma ilaasortaannit aalajangiinerit Nakkutilliisoqarfiup atorunnaarsissinnaagai.

Imm. 2-mut:

Aalajangersakkap Nakkutilliisoqarfik periarfissippaa erseqqinnerusumik piumasarisat arlallit tunngavigalugit kommunimi aalajangikkamik atorunnaarsitsigallarsinnaanngorlugu, tassa imm. 1 naapertorlugu atorunnaarsinneqavissanerani aalajangerneqarnissap tungaanut.

Aalajangersagaq atulersinneqarpoq kommunip aalajangernera inatsisinik tulluurtumik eqqortitsilluni aalajangiisoqarsimanerani paasiniaanissamut Nakkutilliisoqarfik pisariaqartitaanik piffisalerumallugu, tassa aalajangernerup piffissap ingerlanerani piviusunngortinneqarsimanerata kingunerani atorunnaarsitsisariaqalernissaq pinngitsoortumallugu.

Malittarisassakkut peqqussutigineqarpoq aalajangigaaq piviusunngortinneqarsimasooq taamaallat atorunnaarsinneqarsinnaasooq piumasarisat erseqqinnerusumik

tungavissiissutit malillugit, tamannalu pissuteqarpoq aalajangigaq piviusunngortitaasimasoq aallaavittut innuttaasunit tatigineqarsinnaasariaqarmat.

Aalajangikkat piviusunngortinneqarsimasut atorunnaarsinnissaannut inerteqqut taamaattoq isumaqarfigineqarpoq killilertariaqartoq soorlu pissutsit nr.1-miitut 2-miittullu naammassineqarsimagaangata. Taamaalilluni tungavissaqanngilaq ingerlatsinermi aalajangikkap inatsisitigut eqqunngitsup innuttaasup eqqunngitsuliorfigineqarsimasup atorunnaarsikkumallugu kissaatigisaata atorunnaarsikkallarnissaanut inerteqquteqarnissaq. Taamatut pisoqartillugu maalaaruteqarfissaqanngippat pingaarutilinnillu allanik mianerisassaqanngippat pingaartumik inuttaasunik allanik, aalajangernermik piviusunngortitsinerup kommunalbestyrelsip atorunnaarsitsinissaa piviusunngortittariaqanngilaa, taamaaliornikkullu innuttaasup inatsisitigut inissisimanera pitsaannginnerulersillugu.

Innuttaasumit atorunnaarsitsinissamik imaluunniit atorunnaarsitsigallarnissamik piumasaqaatit allagaanissaat piumasarineqarmat nalinginnaasumik ingerlatsiveqarfinit aalajangernerit iluaqusiisut piviusunngortinneqarsimasullu atorunnaarsinnissaat pisariaqanngilaq.

§ 65-imut

Imm. 1-imut:

Aalajangersakkap maannamut atuuttuusup § 17, imm. 1 taarserpaa.

Akissarsiat suut matussusissaneraat inatsimmi toqqaannartumik allanneqassasut Naalackersuisut siunnersuutigaat. Naalackersuisut misilittagaqarfigaat akissarsiat aalajangersarsimasut suut matussuserturneraat sukumiinerusumik aalajangersarneqarsimannginneri pissutigalugit kommunini allaffissornikkut annertuumik ajornartorsiutigineqartartoq. Namminersorlutik inuussutissarsiuteqartunut, namminersortuni akissarsiaqarlutik sulisunut aammalu pisortat suliffeqarfiutaanni sulisut kommunimi qinikkatut sulinissamik sammisaqalernissaasa kajungernarnerulersinnissaa siunertaralugu akissarsiat aalajangersarneqarnerisa qaffasissusissaasa qulakkeerneqarnisaat siunertaasariaqarpoq. Akissarsiani aalajangersimasuni sulinerup annertussusaa soorunami eqqarsaatigineqartariaqarpoq. Naalackersuisut imm. 7 naapertorlugu akissarsiat qaffasissusissaat pillugu nalunaarusiussapput.

Borgmesterip akissarsiai § 66, imm. 1, nr. 1-imi aalajangersagaavoq. Borgmesterip tulliinik akissarsiaqartitsineq pillugu § 66, imm. 1, nr. 2 innersuussutigineqarpoq.

Imm. 2-mut:

Aalajangersagaq maannamut atuuttumut § 17, imm. 2-mut naapertuuppoq, kommunalbestyrelsilu periarfissillugu ataatsimiititaliat ataavartut siulittaasuinut naliliinerit ataasiakkaat tungavigalugit akissarsianik ilassutissanik aalajangersaasinnaaneranik. Aalajangersagaq eqqarsaatigineqarpoq

atorneqartassasoq siulittaasoq suliassanik nalinginnaasutut suliarineqartussanit immikkuullarissuteqartunik suliaqaraangat.

Imm. 3-mut:

Aalajangersagaq maannamut atuuttumut § 18, imm. 4-mut naapertuuppoq, ilanngunneqarlunilu akissarsiat aalajangersimasut sinniisunut nuunneqarsinnaanerat qulakkeerumallugu sinniisooq kommunalbestyrelsimi sivikinnerpaamik qaammatinik marlunnik ilaasortaasimatillugu, ilaasortap aalajangersimasup ataatsimeeqataasinnaannginnera § 15, imm. 1-imut imaluunniit § 15, imm. 2-mut innersuussutigineqaraluarpalluunniit.

Imm. 4-mut:

Aalajangersagaq maannamut atuuttumut § 17, imm. 5-imut naapertuuppoq, aalajangersakkamullu imm. 4-mut assingusuulluni. Aalajangersagaq atuuttuovoq kommunalbestyrelsimut ilaasortanut, ataatsimiititaliani ataavartuni sivikvinnerpaamik qaammatini 2-ni siulittaasuuffeqarsimasunut.

Imm. 5-imut:

Aalajangersagaq maannamut atuuttumut § 17, imm. 6-imut naapertuuppoq, aalajangersakkamilu qinigaasut atorfimmuut tunngatillugu angalanermik ingerlataqartut, qanorluunniit akissarsiaqartinneqaraluarpata, uninnganermut aamma angalanermut ajunngitsorsiaqarnissamut pisinnaatitaanerannik periaaseq nalinginnaasoq ingerlateqqinneqarpoq.

Aalajangersagaq pingaaruteqarpoq kommunalbestyrelsimi aamma ataatsimiititaliat ataatsimiinneranni nunaqarfimmiut peqataaserneranni. Tassungali atatillugu eseqqissarneqassaaq Naalakkersuisut naatsorsuutigimmassuk kommunerujussuarni ataatsimiinnerni telekkut attaveqaatit annertunerusumik atorneqalissasut.

Imm. 6-imut:

Aalajangersakkap naqissuserpaa akissarsiat aalajangersimasut, akissarsianut ilassutit, ataatsimiinnersiat aamma sulinermi akissarsianik annaasaqarnernut matussutissat kiisalu taakkua akilerneqartarnerannut aamma missingersuusiortarnerannut aalajangersakkanik sukumiinerusunik Naalakkersuisut suliaqassasut. Akissarsiat amerlassusiisa aalajangersarneqarneranni aaqqiussuseqqinneq pillugu Inatsisartut aalajangernerat maannamut aningaasartuutit sanilliullugit sipaaruteqarnissanik kinguneqarnissaa aallaaviussaaq.

Akissarsianut aningaasartuutit taamaalilluni maannakkut kommunit aningaasartuutaannut killigititaasut qaangersinnaanngilaat.

Imm. 7-imut:

Aalajangersagaq maannamut atuuttumut § 17, imm. 8-mut naapertuuppoq, ilanngunneqarlunilu kommunalbestyrelsimut, nunaqarfiit aqutsisuiunut, aammalu sumiiffinni siunnersuisoqartigiinni ilaasortaasut tamarmik naligiissinneqarnissaat qulakkeerumallugu.

Imm. 8-imut:

Naartunermi, erninermi meeravissartaarnermilu inatsit tamatumunnga tunngasoq naapertorlugu kommunalbestyrelsit sulinngiffeqarnissamut pisinnaatitaapput akissarsiaminnik annaasaqaratik. Tamanna Inatsisartut Aaqqissuusseqqinneq pillugu Ataatsimiititaliaata kissaataa malillugu ilanngunneqarsimavoq.

§ 66-imut

Aalajangersagaq maannamut atuuttumut § 37-imut naapertuuppoq.

Imm. 1-imut:

Inatsisip matuma atulersinneqarneranut atatillugu kommunani qinikkanut akissarsiasat aalajangersarneqartarnerisa nalinginnaasumik allannortiterneqarnissaat siunertaavoq.

Borgmesterit akissarsiaasa aalajangersarneqartarneranni borgmesterip kommunalbestyrelsimi ilaasortatut sulinera sillimaffigineqariissaaq.

Nr.2-mi aalajangersagaq maannamut atuuttumut § 37, imm. 2-mut naapertuuppoq, borgmesterit tulliisa aammalu pisariaqassappat kommunalbestyrelsimi ilaasortat allat borgmesterit peqataasinnaanginnerini atuutsinneqarneri pillugit malittarisassanik aalajangiinissaq Naalakkersuisunit isumagisassanngorlugu, tak. § 23, imm. 4-mut nassuiaatit.

Imm.2-mut:

Aalajangersagaq maannamut atuuttumut § 63, imm. 5-imut naapertuuppoq.

§ 24 naapertorlugu borgmesterip tunuartinneqarneranut atatillugu akissarsiat annikillisinneqarnissaanut imaluunniit akissarsiaarutitinneneqarnissaanut tunngasumik kommunalbestyrelsi aalajangiisinnaavoq. Aalajangiineq pissaaq naammassinnikkusunnginnerup annertussusaa qanorlu ittuussusaa sillimaffigereerlugit.

Imm. 3-mut:

Kommunalbestyrelsip aalajangiinera Imm. 2 naapertorlugu kommunalbestyrelsip aalajangiinera borgmesterip piumasaqarneratigut kommunalbestyrelsip eqqartuussisunut tunniunneqarneqanik kinguneqartassaaq.

§ 67-imut

Imm. 1-imut:

Aalajangersagaq maannamut atuuttumut § 65-imut naapertuuppoq.

§ 68-imut

Imm. 1-imut

Aalajangersagaq maannamut atuuttumut § 59-imut naapertuuppoq aalajangersarlugulu Nakkutilliisoqarfiup ilaasortai akissarsiaqartinneqassasut aalajangersakkat Inatsisartunut aamma Naalackersuisunut il.il. ilaasortanut akissarsiat pillugit Inatsisartut inatsisaat naapertorlugu. Aaqquissuussineq ajunngitsumik ingerlanneqarsimavoq taamaattumillu allannguuteqangitsumik attatiinnarneqarluni.

§ 69-imut

Imm. 1-imut:

Aalajangersakkakkut aalajangiunneqarpoq kommunalbestyrelsimi ilaasortat sulianik pineqartunit akisussaaffigineqartunik suliarinnikkusunngitsunut Nakkutilliisoqarfiup pinngitsaalisaasumik akiliisussanngortissinnaagai. Aalajangersagaq assersuutigalugu atorneqarsinnaavoq kommunalbestyrelsi § 68 naapertorlugu Naalackersuisunut paasisutissanik aammalu pappilissanik uppersaatitinnit tunniussiumanngippat.

Imm. 2-mut:

Aalajangersakkakkut aalajangerneqarpoq Nakkutilliisoqarfiup kommunalbestyrelsimut ilaasortanut kommunip annasaqarsimaneranut akisussaasunut taarsiissuseqarnissaq siunertaralugu eqqartuussisunut tunniussisinnanera. Taarsiissuteqarnissamik suliasanngortitsinermut atatillugu annaaneqartut aamerlassusissaannik aalajangersimasunik killiliisoqarsinnaanngilaq. Taarsiissuteqarnissamik suliasanngortitsinissami annasaqaatit qanoq amerlatiginissaat pisuni ataasiakkaani nalilersorneqartassaaq.

Imm. 3-mut:

Aalajangersakkakkut siunertarineqarpoq taarsiissuteqartarnerni akiliisitsisarfirmik eqqartuussisutigut suliasinissamut taarsiussinnaasumik pilersitsisoqarnissaa. Taamaakkaluartoq suliasinissamut piumasqaatit naammassineqarsimasussaapput, tassa imaappoq kommuni anaasaqarsimassaaq, aammalu ilaasorta q taarsiissuteqarnissaminut akisussaasuussaaq Kalaallit Nunaanni eqqartuussisarnerni aalajangersakkat nalinginnaasut naapertorlugit.

Pineqanngilaq ilaasortat akiligassap annertussusianik akisussaaqatigiillutik akiliisussaaqatigiinnissaat, akiliutissallu amerlassusissaat ilaasortanut ataasiakkaanut aalajangerneqartassallutik.

Ilaasortat arlallit akiliisussanngortinneqarpata taakkulu ilaannaasa akiliinissaq akuersaarumappassuk, taava Nakkutilliisoqarfiup suliassaq taakkununga tunngatillugu uninngatikkallarsinnaavaa ilaasortanut akiliinissamik kissaateqarsimanningsunut eqqartuussiviup aalajangiinissaata tungaanut.

Kalaallit Nunaata eqqartuussiviata nalunaarutigaa uani aalajangersagaq malillugu pinngitsaaliilluni akiliisussanngortitsineq ingerlaannaq pisinnaasoq Kalaallit Nunaanni eqqartuussiveqarnermi inatsimmi kap.VII, § 1, imm. 3 malillugu.

Imm. 4-mut:

Aalajangersakkami malittareqquneqarpoq ilaasortaq pinngitsoorani isumaqataalluni taaseqataassasoq aalajangigassamut kommunalbestyrelsip aalajangiiffisariaqagaatut ilaasortap nalunngeriigaanut nalunngereersimasariaqagaanulluunniit, akerlianilli ilaasortaq aalajangigassamut akerliulluni taasissasoq nalunngikkuniuk nalunngittariaqaruniulluunniit tamanna inatsisunik saneqqutsinerusoq.

Ilaasortaq taarseeqataannginnerminut akisussaatitaaginnarani aammali pissutissaqarani ataatsimeeqataasimannikkuni ilisimallugulu ilisimasariaqarluguluunniit ataatsimeeqataasimagaluaruni inatsisunik sanioqutitsilluni aalajangerneq akornusersinnaagaluarlugu pinngitsoortissinnaagaluarluguluunniit.

§ 70-imut

Aalajangersagaq maannamut atuuttumut 62-imut naapertuuppoq.

Imm. 1-imut:

Aalajangersagaq periarfissiivoq annaasaqarnikkut taarsiissutissanik ikililerisinaanermik, tassa pisuussuteqarneq sakkukinnerulersitsinissamik ersersitsippat, ajoqusiinerup annertussusia aallatigullu pissutsit tunngavigalugit.

§ 71-imut

Aalajangersagaq maannamut atuuttumut § 67-imut naapertuuppoq.

Imm. 1-imut:

Aalajangersakkakkut aalajangerneqarpoq Inatsisartut inatsisaat manna aqutugalugu unioqutitsinerit annertuut pinerluuteqarnertut isigineqartussanngornerat kommunit

aalajangigaannik atorunnaarsitsisarnermik atorunnaarallartitsisarnermillu, pinngitsaaliiluni akiliisitsisarnernut, inuttullu akisussaaffeqarnermut malittarisassanut siunertaqarluartumik ilassutaasoq, aammalu tassaalluni Naalackersuisunut ilaasortat akisussaaffeqarnerannik malittarisassanut isumatusaartumik naleqqiunneqartoq.

Imm. 2-mut:

Aalajangersagaq ilanngunneqarpoq aqutsineq pillugu inatsit pillugu politiinut nalunaarutiginnittarnerit tunngavissaqanngitsut, suulluanngippallaartut nalorninartullu pinngitsoortikkumallugit.

§ 72-imut

Imm. 1 imut:

Siunnersuutigineqarpoq inatsisissatut siunnersuut 1. januar 2009-mi kommunit kattunnissaasa atortuulersinneqarneranut peqatigitillugu atortussanngortinneqassasoq.

Imm. 2-mut

Maannamut kommunalbestyrelsit, nunaqarfḷḷni aqutsisut il.il. pillugit Inatsisartut inatsisaata nr. 20-ip, 3. november 1994-imeersup tamatumunnga peqatigitillugu atorunnaarsinneqarnissaa siunnersuutigineqarpoq.

Imm. 3-mut:

Kommunernes Revision (tassa Danmarkimi kommunit kukkunerisuiisui) ukiorpassuit ingerlaneranni kommunit naatsorsuutaannik kukkunerisuiisuusimapput. Kisiannili maannakkuugallartoq kukkunerisuiisut pillugit inatsimmi kukkunerisuiisoqarfiit kukkunerisuiisunit naalagaafimmit akuerisaasunit taamaallaat pigineqarsinnaaneramik aalajangersagaq Kommunernes Revision A/S-imit naammassineqarsinnaanngilaq. Kommunernes Revision A/S kukkunerisuiisut pillugit inatsisip aalajangersagaanik naammassininniarluni sulissuteqarpoq, kisiannili tamanna aatsaat naammassinnaavaa 2011-p naanerani.

Taamaattumik siunnersuutigineqarpoq kukkunerisuiisunut piumasaqaatit sakkortusineqarnissaat aatsaat 1. januar 2012-imiit atuutilissasoq.

Imm. 4-mut:

Naalackersuisut naatsorsuutigaat piffissami qanittumi Inatsisartut inatsisaata matuma kingunerisaanik nutaanik nalunaarusiortoqassasoq, kisiannili nalunaarutit maannamut atuuttut atuutitinneqarallassasut nutaanik taarseneqarnissaasa atorunnaarsinneqarnissaasaluunniit tungaanut.

Nalunaarutit maannamut atuuttuusut tassaapput:

- 1) Kommunit missingersuusiortarnerat, naatsorsuutaat, kukkunersiorneqartarnerat aamma karsii naatsorsuuseriveqarnerallu pillugit nalunaarut nr. 29, 18. september 1995-imeersoq
- 2) Borgmesterit utoqqalillutik tunuartarnerini qinigaajunnaareeralutillu taakku aappaasa qitornaasalu pensionisiassaat pillugit nalunaarut nr. 23 12. september 1997-imeersoq.
- 3) Kommunini il. il. Namminersornerullutik Oqartussat suliassaqarfini kukkunersiuisarnerit pillugit nalunaarut nr. 14 23. august 1999-imeersoq.
- 4) Kommunalbestyrelsinut nunaqarfinilu aqutsisunut il. il., borgmesterinut taakkulu tullinut akissarsiaqartitsinerit pillugit nalunaarut nr. 35 5. oktober 2001-imeersoq.